

CÌKÈÈNÀ-KUMÒNA CYÀ PAATÈMÒ

 ...ànu mùvvwà Mwanèètù Neville ùfila mamanyisha awu ne... Mwanèètù Moore ùwwa wàmba ditùkù adi, wàkula bwà Nyumà wa Mukalenge, wàkabwela...ùbwela mu nzùbu. Yéyè ne: “Bìwwa byà butùmbi menemene mu mùshindù wà ne mêmè kudyambidila ne Dyambwibwa dyénzèkì too ne pa ngààlu kukenzakana ki, mêmè kumònà bakwàbò basòmbe mwab’ewu,” ki mêmè ne, “to, kí ndyanji ànu kwenzeka to, bwalu pììkalabi ne bàcìdi mwab’ewu dìbà adi ndi mumanye ne ncidi ànu mwab’ewu.” Pa nànku misangu mikwàbò Nyumà wa Mukalenge ùtu ùtùùmvwija bilenga mùshindu awu.

² Tudi ne disanka dyàbûngì dyà kwikala ne balunda bààbûngì batùdì tumònà mu nzùbu emu. Bapite bûngì bwà kuteeta kubâtèèla’s. Ndi mfuma ku dimònà, Mwanèètù Carpenter, ubwela mu ciibi amu, muntu wàkatùsèlesha mêmè ne mukàjàànyì’s. Mwanèètù Carpenter, ùtu dibènesha dinène mu èkèleeziyà emu’s, ne ùtu dibènesha kutùdì mu njila wa mudimu wà bwambi, ne ùtu uyiisha myaba yônsò, pàmwè ne myaba yônsò nkòòng. Nènku tudi ne disànkà dyà kwikalaku nendè muneemu, kaa, ne bakwabo bûngì cyanàànà’s.

³ Mpindyewu kudi lukonko lukwàbò kaaba aka lùvvwàbo bampèèshe makèèlèlà diloòlò awu ne:

Mwanèètù Branham, virgo yìtaanu mikùtàkàne yà mu Maatààyì 25 mmibadiùbwé bu bàshààdilè bàà Bisàmbà byà bendè anyì? Ndi ngumvwa ne virgo yìtaanu mikùtàkàne yàkasùngidiibwa kàdì yìdi ne cyà kupicila mu cikondo cyà dikenga dinène. Mmwômò anyì? Byôbì nànku, ndekeelu waayi neikalè cinyì? Yidi mwà kwikala mikòòkò yìdi mitápulula ne mbuji mu Maatààyì 25:33 ne 34 anyì?

⁴ Mmwena tèòlòjì mulenga wa dikema bilondèshile cîndì... [Katùpà kàà mukàbà wà mèyì munda mutupu—Muf.]...wela meeji nànku kàbìdi’s, bwà ne mbàshààdilè, virgo mukùtàkàne awu’s ki bàdì bashààle bàà mu Bwàkabuulwibwà; bàà diminu dyà mukàjì bàdì balamè mikenji yà Nzambì ne biikale ne bujaadiki bwà Yesù Kilstò. Mukàjì kampànda neàngate ci-cipese cyà cilàmbà ne kucyàdija pansi; èè, mpindyewu, s’ki cidiye ukosela...anyì wàngacilapu cententwidì ne ucítèèka mwaba kanà wônsò udiye ujinga awu’s, mùshindù wíkalaye mwà kucikosa awu’s. Nènku dìbà adi cidiye mushiyé mwaba awu aci’s ki cìdibu bàbìikila ne bìshààdilà, kàdì yéyè ùdi usungula bwà kucikosela ku mwaba kampànda ku budìswilè bwà meeji èndè. Kàdì bìdì bishààle abi s’ki bìdìbo bàbìikila ne bìshààdilà.

⁵ Mpindyewu, bu nwénù mwà kumònà, kuvwa virgo yìtaanu mikùtàkàne ne yìtaanu yà lungenyi; yônsò yìvwà virgo,

myangacila ku cintu cîmwècîmwè. Kàdi, ku disungula, Nzambì wàkasungula Mukàj'Èndè-musèla ku disungula kumpàlà kwà difùkà dyà dyulu ne buloba, kufunda ménà ààbo mu Mukàndà wà Mwoyi wà Mwânà wa mùkòòkò mushebeya kumpàlà kwà difùkà dyà dyulu ne buloba; kumpàla mene kwà dyulu ne buloba kubangabi, Nzambì mu meeji Èndè, mwikale kàyì ne mikalu.

⁶ Nènku misangu mikwàbò tudi tukwàta mudimu ne mwaku, wà “didyanjila-kulongolola,” kàdi ùdi bushùwà cilendwishi mu cikondo cyà èkèleезiyà citùdimu ne mwoyi eci. Ncyà bushùwà menemene ne civwa ncintu cinène kale mu matùkù à bafwile diitabuuja, bwalu bàvwa baciìtabuuja bushùwà. Kàdi cikaadi kule ne Cyôcì aci mpindyewu, ku mmwènenu yà beena ne ànu mikensi ayi, dilongesha dyà beena ne ànu mikensi mu èkèleезiyà udi ulwa . . . Civwa cintu cîmpè, bwalu byônsò bikaavwa bishàâle byà cyèna Calvinistes mu Angleterre mu mùshindù wà kabaciìyì kabidì ne matabuluja to, ki John Wesley kulwaye uyiisha dilongesha dyà beena Arméniens dyàkacifikisha ku dicincika dyà maalu's. Misangu yônsò Nzambì neàcincike maalu's.

⁷ Nànkú dîbà adi virgo mukùtakàne ewu's ki bàvvwa kabayì ne maanyì mu myêndù yàbo abu's, mûndì ngeela meeji ne yeyè's ki wàkiipaciibwa mu mîdimà ya pambelu mwikalà myadi, ditwa dyà mikemu, ne disumakaja dyà ménù. Nènku nwènù baswe kufwànyìkija aci, anyi mèyi ènù à kwinshi kwà mabeji awu, necinwaluje cyàkàbìdì buludi ku dikenga dinène. Nènku ndi ngeela meeji ne bôbò s'ki bâdi bashàâle paanyimà apu bwà kupicila mu dikenga dinène abu's. Nènku mwaba awu ndileesona ànu dyètu dyà menemene edi, bu twètù ne dîbà dyà kubwelamu. Bu nwènù . . .

⁸ Mpindyewu, vùlukààyi ne, ngâmbì dyàmbedi ne, mwaba unùdi nutèèlejila mikàbà yà mèyi ayi ne: “Bintu ebi bìdi ànu bilondèshile mùshindù wûndì mêmè ngiitabuuja ne mmudibì mu bulelèlè's.” Nwamònou anyì? Mpindyewu, pììkalabi ntupàkànyi, ncyêna—ncyêna mumanye ne bìdi nànkú to. Ndi . . . Nènku ndi ànu mwà kwamba cîndì mêmè ngiitabuuja. Nènku ncyêna ne meeji à kutapa ní nganyi ní nganyi ku mwoyi to. Tudi ne cyà kubitéèka ànu ku luseke patùdi tubwela apa, ne pashiìshe kwangata cintu cîdì cyambiìbwé aci, ne kucìkenketa, bwà kumònà cyà bushùwà ne m'Mifundù anyì to. Ki mùshindù mutàmbe bwîmpè wà kucyenza ngwôwò awu. Dîbà adi . . . Bwalu mu ditùkù bu ditùdì ne mwoyi mpindyewu emu, mu ditùnga mùdì mupùmbulula mpàla ne nyimà ne emu ne emu kùdì bintu byà mishindù yônsò, èè, mbikolè bwà kufikisha bantu bulelèlè kudicyùmvwa, mùdìbo bacyùmvwa mu cipaapu cyà buloba cîdì kaciìyì cyanji kulenga. Udi ubàmbila, bâdi baciìtabuuja, ki mùshindù udìci cyenda awu's.

⁹ Kàdi, mpindyewu, ewu neàlwé ne meeji *kampànda*, ne ewu neàlwé ne meeji *kampànda*, nènku tudi ne èkèleeziyà yà cyena màngumba mitwè ku nkamà citèèmà ne byà mu njila

mishiìlèshììlàngàne, ne edi dilewishangana (ku dilongesha dyàdi) ne dikwàbò; nènku kùdì ne cyà kwikala muntu kampànda udi mu ntupàkànyì, ne muntu kampànda mu bulelèlà. Pa nànku mpindyewu cijaadiki cimwèpelè cìdiku, ncyà kudyàluja ku Bible; nwamònù's, kulekeela Bible ùkòsa. Mpindyewu, misangu yàbûngì, bantu bàtu beela dyumvwija dyàbò bôbò. Kadi twêtù tudi tuteeta ne mwètù mwônsò, bwà kubenga kwelamù dyumvwija dyà buntu nànsha dìmwè. NùCibalààyi ànu mùdìCi amu, nwamba ne: "Ki mùdìCi."

¹⁰ Ne pashiìshe mêmè nkààdikù mumònè misangu yônsò ne, bu nwénù mwà kwangata ànu cyàkambaYe aci, nebyènze ne bintu byônsò binwàngane ànu menemene ne Mifùndu's. Mbyenze ànu bu kusambakaja bitùpà byà cisolù pàmwè's, bìdì bìkèngela kwanji kutangila citentwidì bangabanga ne wêwè kutuutakaja bitùpà byà cisolù aci. Kabiyi nànku to, ntu misangu yônsò ànu ngàmبا ne: "Udi mufwànyìne kupeta... Mu mbôdi webè amu, udi mufwànyìne kupeta ngombe munkaci mwà kudiìla mashinde ku lusongo lwà mucìs." Dibà adi kî—kî ncifwànyìne ànu kumwèka cijaalame nànsha.

¹¹ Nènku bu twêtù ànu mwà kulekela Nyumà Mwîmpè... Udi mufunde Bible nganyì? Nyumà Mwîmpè wàkakwàta mudimu ne bantu ne kufundabo Bible. Dibà adi kakùyì Nyumà Mwîmpè to, nànsha wêwè mulonge túlaasà twà bishi, kwâdyàkuMùmvwakù to. Bwalu nànsha Yesù mene wàkasàkidila Nzambì bwà mùvwaYè muCisokòke beena lungenyi ne batàlame, kàdi kuCibuuwlwia bânà bu aba bâdi baswè kuyiila. Ne bayidi bônsò bavwa bantu batàmbe kwikala kabàyi balonge kàlaasà anyì kabàyi bamanye mukàndà to pa kuumusha umwèpelè, ne mwine awu m'Pôlò. Nènku Pôlò wàkamba ne byàkamukèngela bwà kupwàye mwoyi byônsò bivwàye mumanye abi bwà kupeta Kilistò. Pa nànku kwambilayè èkèleeyìa wa beena Kolintò ne, yéyè "kààkalwa ne lungenyi lwà bantu ne muyiiki munène nànsha," bwalu díbà adi diitabuuja dyàbò—dyàbò divwa difwànyine kwikala mu lungenyi lwà bantu, kàdi yéyè wàkalwa kùdìbo mu bukolè ne dileejibwa patòòke dyà Nyumà Mwîmpè, bwà diitabuuja dyàbò dyàmónaku mwà kushindameena pa byenzedi byà Nyumà Mwîmpè bilondèshile Dìyì dyà Nzambì. Nènku ke mwaba awu utùdì tuteeta kushààla batàmbe kukùlàmina menemene, mpindyewu mene, bwalu kumpàla kwà lumingu kujika, anyì cikondo cyàmbà lumingu kujika, nenùcímònè, ki cyôci aci menemene civwaku, kaanshinga kà bwânda kakesè kàdì kapicila mu bikondo byônsò aku.

¹² Twasàkidilaayi bwà kuteeka mbôdì kuulu ndambù. Aci's cìdi cimweneka citàmbe bwîmpè's.

¹³ Mpindyewu, kaa, tudi... Mvwa njinga bwà twîkalakù naabì ànu mu muvù wà mashìka mujima emu's, bwà twamònaku ànu mwà kwangata Mukàndà mujima wà Bwàkabuwlwibwà ne kuWùkenketa ànu cyanàànà. Mmalongesha malenga à dikèma

muntwamu. Nènku ndi mvùluka, ngeela meeji ne kukaadi bidimu makumi àbìdì anyì makumi àbìdì ne bitaanu, pacìvwa èkèleeziyà mucikale mupyamùpyà, twêtù kutwadija umwe... ànu ne mbangilu wa muvù wà bintu bimata, ne twêtù kwàmba kushààlamu ne ku muvù wa bintu bimata uvwa ulonda, twàbwela twàpatuka mu Mukàndà wà Bwàkabuulwibwà.

¹⁴ Mpindyewu, ndi mvùluka mungààkangatà Mukàndà wà Yobò. Kaa, Mwanèètù Wright! Mêmè kushààlapu mukÙngùlù mule be too ne ndekeelu wa byônsò muntu mukàjì kampànda kumfùndilaye unkonka, wàmba ne: "Mwanèètù Branham, kwénàku muswè kuumusha Yobò pa mushikì wà butù awu anyì?" Èè, mvwa nteeta kupatula cíntu kampànda, bwalu ànu mwaba awu mene ke ùvvà bintu byônsò bikuupuka, pa mwaba awu mene; lwà pa mwaba mene ùvvà Nyumà wa Mukalenge mumutuulukile awu's, pashìishe pààkabanga mukenyi kopenya ne mikungulu kukungula, Nyumà kutuulukilayè mupròfetà ne kumònaye dilwa dyà Mukalenge. Nènku mvwa muswè kuumvwija aci menemene, ki bwà cinyi mvwa mumulame pa mushikì wà butù mukÙngùlù mule, bwà-bwà twamòna mwà kutòòkesha bwalu. Nènku ndi mumanye ne bìdi mwà kucyòkeshaku kakesè, ndambù. Mêmè pàànyì, ntu mbinduluka's, pàntù nguumvwa muntu kampànda wàtwà ànu mu nsampù wàtwà mu kaleji pa bwalu kampànda, pamutù pàà kuyaye ku cyena bwalu. Kàdi pàmwàpa Nzambì ngudi ulombola muntu awu bwà kiipacila kampànda bwà bwalu abu.

¹⁵ Mpindyewu twàlukilààyi ku bàshààdilè aba, kumpàla kwà twêtù kuumuka ku lukonko elu. Ndi ntekemena ne ndi mucìtòòkeshe. Eci... Ndi ngiitabuuja bulelèlè ne bàshààdilè abu mbasungùdiibwe kùdì Nzambì. Ndi—ndi nciìtabuuja ne, Nzambì wàkasungula bàshààdilè kumpàla kwà difùka dyà dyulu ne buloba; ne ku "didyanjila-kumanya" Dyèndè. Kî ndiyì... Mpindyewu tàngilààyi *didyanjila kulongolola*, nwamònu's, bwalu mmwaku mukesè ùdì utapa munkaci mwà bantu. Nwamònu anyì? Kàdi Nzambì, kumpàla kwà difùka dyà dyulu ne buloba, mu meeji Èndè manène adi kaàyi ne mikàlù awu, kusungula Èkèleeziyà, kusungula Yesù, kusungula Èkèleeziyà, ne mwikàle mwà kudyanjila kwamba ku cibangidilu civwaci mwà kwikala ku ndekeelu. Yéyè... Piìkalabi ne Yéyè kêna ne mikàlù to, kakwenaku cíntu nànscha cìmwè cìdìYe kàyi mumanye to. Yéyè ùvwa mumanye dínà nkupà yônsò uvwa mufwanyine kwikala pa buloba awu, ne misangu bûngì kaayi yivwaye mufwanyine kutuuta mipòdi. Mpindyewu, aci's ki mùshindù... ne bûngì bwà mafuta avwayi mifwanyine kupatula, ne bûngì kaayi buvwayi mifwanyine kupatula pàmwè. Ki cìdì kaciyi ne mikàlù ncyaci, cìdì mu mùshindù wà kawùyi ne mikàlù to; udi—udi... kakùyi ànu mùshindù wà kuCyùmvwija to. Nènku Nzambì, ki cìdìYe ncyòcì aci, Nzambì wa kàyi mikàlù awu.

¹⁶ Pa nànku, bu nwènù mwà kumònà, Bible mmwambe ne mu matùkù à ndekeelu mùvvà mufwìlakanyi ne Kilistò ùvwa ne cyà kulwa pa buloba awu...

¹⁷ Mpindyewu tèèlejààyi ne ntéma! Ki cilèma cìmwèpelè... Ngeela meeji ne yéyè ùvwa mwà kupeta mìliyô mu àànyì mayiisha. Kàdi bwà Mwanèètù wa balùme wa mushinga mukolè Billy Graham, ditùkù adi, diyiisha dyà pabwâdi dyàkayiishayè dyàlumingu dishààle adi, ne mvwà cyà bushùwà ndyàmbidila ne cìvwa diyiisha dyà cikondo. Nènku... kàdi yéyè wàkamba ne "Sàtaanà ùdi mene useeswisha Basungula."

¹⁸ To, Bible mmwambe ne: "Yéyè mmufwànyne kuseeswisha Basungula *bu ne* bìvwa mwà kwenzeka." Kàdi kabyèna mwà kwenzekaku to, bwalu Nzambì wàkabàsungula kumpàla kwà difùka dyà dyulu ne buloba. Nwamònù anyi? Mwànà wa mùkòòkò... Yesù Kilistò nguvwa Mwànà wa mùkòòkò mushebeya kacya ku difùkà dyà dyulu ne buloba. Pàdì nànscha Nzambì mutèèke mu meeji Èndè, pàdìYe wàkula Dìyì adi apu, Dyôdì kadyèna mwà kushintulukaku nànscha, Dyôdì kadyènaku mwà kushintulukaku nànscha to. Nwamònù's, bwalu Yéyè—Yéyè kêna—Yéyè kêna ne mikàlù to, ne Mèyì Èndè neikalè mwà kwenzeka.

¹⁹ Anji elààyibi ànu meeji, ànu mene...buloba butùdì basòmbèlepù dilòòlò edi ebu's n'Dìyì dyà Nzambì dimwènèshìlbwè. Buloba ebu bwàkafwìmbiibwa ku bintu bìdì kabiyi nànscha bimwèka to. Yéyè wàkamba ànu ne: "Kwikala," pààbù kwikalabù. Mùshindù mwine ùdibi bipeepèlé bwà Nzambì kondopa mubidi ùdî ùsaama dîbà adi's, piìkalabi ne Üdi mwà kwenza bufuki ànu kudibwàkula cyanàànà. Nwamònù's, Dìyì Dyèndè. Bu twétù ànu mwà kupetaku diitabuuja bwà kumònà cìdì Dìyì Dyèndè! Tudi batàmbe kuswìkàkana ne buloba ne babwelakane mu meeji ètù mu mùshindù wà twétù... Kaa, ncyêna mumanye to. Tudi batàmbe kupacishiibwa ne malongesha bùngì cyanàànà, batwa cisàlù cyà ku edi nùnku, ne batwa cisàlù cyà ku cyàcya nùnku, ne—ne mbikatufikishe ku dikonyangajibwa bônsò. Kàdi bu nwènù mwà kunyungisha cintu cyónsò mu kaabujimà kusùùlukaku, kwalukila bwà kumanya ne Yéyè ùdi Nzambì, ne Mèyì Èndè kaèna mwà kupangilaku to ànu mùdìYe kàyi mwà kupangila. Nènku piìkala Dìyì adi dipangila, dîbà adi Nzambì's mmupangile; kàdi piìkala Nzambì upangila mwaba awu... Yéyè kêna Nzambì to. Nwamònù anyi? Pa nànku... Nènku nudi bavùlùke ne, Yéyè kêna mwà kwamba cintu *apa* ne cintu cikwàbò lwà *apa* to; Bikèngela àshaale ne dipangadika Dyèndè dyà kumpàla bwà kwikalà Nzambì. Pa nànku, twétù tudi ànu tu... .

²⁰ Ne Yéyè mmutulòmbe cintu ànu cìmwèpelè, bwà kwitabuuja ne cìdìYe mwambe aci m'Bulelèlè, ne Yéyè neàcifikishe ku dyenzeka. Kaa, bilenga kaayipu's wè! Uvwa mutèkèmene ne cintu cyà cìmpicìmpi cyenzeke; misang mikwàbò bikèngela

ànu ndambù mukesè wa diitabuuja. Kacyàkwenza cishìma to, kàdi bu wêwè ànu mwa kushààla mukwàtakù, necikupatule mu lutàtu; shààla wêwè ànu naaci. Ànu mwàkambaYe ne: “Lutete lwà mütâdà, lùdì lutàmbe bukesè munkaci mwà nteta yônsò.” Kàdi nukaadiku bamònè ne, mütâdà wôwò kawàdyàkusambakanaku ne cintu nànsha cìmwè to. Kwêna mwà kusambakaja mütâdà ne cintu nànsha cìmwè to, kawàdyàkusambakanaku to. Nènku wêwè ne diitabuuja, ànu ndambù mukesè wa diitabuuja dìdì kadiyi mwà kusambakanaku ne bupidyà kanà bwônsò anyì bwena èkèleeyiyà anyì mèyi maswika, shààla wêwè ànu ne Nzambì, shààla wêwè ànu naaCi, neCìkulòpòle ànu mu mafwima amu, cìkupàtula buludi pambelu. Èyowà! Shààla wêwè ànu ne diitabuuja adi.

²¹ Mpindyewu, cibangidilu, pàdì Nzambì... Bible mmwambe, mu Bwàkabuulwibwà, ne: “Mufwilakanyi ne Kilistò, mu matùkù à ndekeelu...” Mpindyewu tàngilààyi èkèleeyiyà eyi mùdiyi yônsò yenda yìdisanga. “Mufwilakanyi ne Kilistò, mu matùkù à ndekeelu, neàseeswishe bônsò bàvva pa buloba beena ménà àvwa kaàyi mafunda mu Mukàndà wà Mwoyi wà Mwânà wa mùkòòkò kacya ku difùka dyà dyulu ne buloba.” Ndibà kaayi dyàkafundiibwa dínà dyèbè mu Mukàndà wà Mwoyi? Kumpàla mene kwà twêtù kwikala ne buloba, nuvwa basÙngùdÌibwe bwà kupeta Nyumà Mwîmpè mu cikondo eci.

²² Mêmè ndi mutwè ku cyà Eddie Perronet ne:

Ndi mwele lwongo lwà musùùkà wànyì mu
mwaba mutualale wà diikisha,
Ncyàdyàkwendela ne mazuwa pa mbû
mutomboke, wa mpatà ya kayiyi kwamba
ayi kàbìdì to;
Cipeepèlè cikole cìdì mwà kujuuka eku ne eku,
cipeepèlè cyà cipupu cikolè,
Kàdi mu Yesù tudi bakùbiibwe kashidi ne
kashidi.

²³ Kakwèna cintu nànsha cìmwè cìdì mwà kutupandulula to (Nzambì kêna mwà... kàtu walukila pa Dîyi Dyèndè to. Nènku pìkalàYe kàyi ne mikàlù, ne ùkupà Nyumà Mwîmpè *mwab'ewu*, mumanye ne Yéyè neàkujimije lwà *mwab'ewu*, mmudimu wà mùshindù kaayi ùdìYe wenza awu's?), pawikala kuyi museeswishiibwe mu dilabula dyèbè to, pawikala mupete Nyumà Mwîmpè. Kàdi tàngilààyi cìdì Bible mwambe, Efèso 4:30 ne: “Kanùbungamiji Nyumà Mwîmpè wa Nzambì to, unwàkatwibwà nendè citampì too ne...” Ditabuluja dìdì dìlondà anyì? Aci cìdi cyùmvwiaka cijaalàme anyì? “Udi mutwìbwè citampì too ne ku ditùkù dyà bupikudi bwèbè!” Too ne dìbà kaayi? Too ne ku bupikudi bwèbè.

²⁴ Angàtaayi dikaadika, nuduja pa njanja, ne pàdìdi dyùjiibwa patapata... Mpindyewu, kabeena mwà kukanga

dìkaadìkà adi to, bìvwa bìkèngela bwà mukòntononyi àpìcile mwaba awu. Nènku ùdi ùnkòntonona, ne ùmònà ní kùdi cintu kampànda cìdì cidilekele cikalà mwà kunyungakana. Dìkaadìkà cìdì mwà kwikala... Dìkaadìkà dìdì mwà kwikala dyuja patapata, kàdi dyôdì diikale munda amu ne myaba yinyungakana, nebikèngèle bwà wêwè kudipayulula cyàkàbìdì. Nènku s'ki lutatu ndwòlù alu, bààbûngì bëètù kabéena bapeta Nyumà Mwîmpè to; pàdì mukòntononyi ûfika, Ùdi ùpeta myaba yâbûngì ne bintu binyungakana, nudi numònà's, pa nànku Yéyè kààkudìkàngakù to.

²⁵ Mwena tèòlòjì munène mmulwe kûndì ditùkù adi, anyì kî nditùkù adi, kukaadi bidimu bìsàtù anyì binaayi, ki yéyè ne: "Ndi muswé nkukonkèku cintu kampànda." Yéyè ne: "Abraham wàkitabuuja Nzambi, ne bààkamubadilaci bu bwakàne."

Mêmè ne: "Aci's mbulelèlè, cyà bushùwà."

Yéyè ne: "Ncinyì cikwàbò cìdì muntu mufwànyìne kwenza pa kuumusha kwitabuuja?"

Mêmè ne: "S'ki cyônsò cìvwàye mwà kwenza aci's."

²⁶ Yéyè ne: "Dìbà adi kuyaayà ne cintakanyi cyà Nyumà Mwîmpè eci pambèlù pa aci mpenyi's?" Mpindyewu, s'nudi bamanye ne yéyè ùvwa Baptiste. Ki yéyè ne—yéyè ne: "Mpenyi paùdì ukafika ne Nyumà Mwîmpè ewu?" Yéyè ne: "Muntu yéyè mwitabùuje! Kasunsa kaùdì witabuuja, udi mupete Nyumà Mwîmpè."

Mêmè ne: "To, to. Mpindyewu, wêwè—wêwè udi wenza ne Mifundu yìbengangane, pààbi Mifundu kayèna yìbèngangana Yôyi miine to. Nwamònù anyì? Pôlò wàkabakonka ne: 'Nukaadi bapete Nyumà Mwîmpè kacya nwîtabuuja anyì?'"

Ki yéyè ne: "Èè..."

²⁷ Mêmè ne: "Ncyà bushùwà ne Abraham taatù wa diitabuuja wàkafila... ùvwa ne mulayi wà Nzambi ne mwitabuuje Nzambi, ne bààkamubadilaci bu bwakàne, kàdi Yéyè wàkamupa citampi cyà ditengudiibwa bu cimanyinu cyà ne Ùvwa mwakidile diitabuuja dyèndè."

²⁸ Mpindyewu, pìikalaYe kacya kavwa mwanji kukutwa citampi cyà Nyumà Mwîmpè to, kacya Yéyè katu mwanji kwakidila diitabuuja dyèbè mu Yéyè to, udi ne yìmwe myaba ne bintu bilekelela. Nwamònù anyì? Ùdi mufwànyìne kwitabuuja, èyo, kàdi kùdi myaba ne bintu bilekelela bûngì cyanàànà. Kàdi paùdì upatakaja bintu mu myaba milekelela ayi mudibi bikèngela, dìbà adi Yéyè ùdi ùkutwà citampi cyà Nyumà Mwîmpè too ne ku ditùkù dyà bupikudi bwèbè. S'ki dishindika dyà Nzambi dyà ne mMwakidile diitabuuja dyûdì mujikule mu Yéyè's.

²⁹ Abraham wàkajikula diitabuuja, ki Nzambi kwamba ne: "Nénkupèèshè cimanyinu mpindyewu cyà ne wêwè..."

ne Ndì mukwakidile.” Ne Yéyè wàkamupa cimanyinu cyà ditengudibwa.

³⁰ Mpindyewu, paùdì wakidila Kilistò bu MusÙngidi wà sungasunga ne uMwitabuuja ne uMulòmba bwà kukezula mwoyi wèbè, ne pashiishe pàdiYe wàlukila ne Nyumà Mwîmpè ne ùkupèësha cimanyinu cyà Nyumà Mwîmpè, dîbà adi udi mutwìbwé cítampì too ne ku bupikudi bwèbè.

³¹ Dìkaadìka edi edi, dyôdì ne bintu binyungakana... Paanyimà pàà dimana kupaya dyónsò ne bakange ciibi aci ne batwepu citampì, nènku ndi–nditwà citampì too ne kwàdì kuyààyàdì, kumpanyi yà njanja mmifwànyine kukukwacisha bwà matükù èbè ônsò à mwoyi wèwè mwà kukosa citampì aci. Kabyèna mwà kukoshiibwa to. Ncítwà citampì too ne kwaci kuyààyàci; kí mbwà muntu yônsò udi mu njila wa njanja amu mufwànyine kucikangula bwà kutangila munda mwàdì amu, ne ku dikenketa ne kuditangilula, ne kwimansha ndambù wa bintu, anyi kusàkidilamu ndambù mukwàbò wa bintu to. To, to!

³² *Ewu* èkèleeyìà neàmbè, èè, dîyî diswika adi ne: “*Eci* kî ncîmpè to, *cyàcyà* kî ncîmpè to.” Pàdi Nzambì ukupèësha Nyumà Mwîmpè, bwalu mbudikòse! Udi mumanye mwaba wûdì mwimanyine, udi mumanye cyàkenzekà, ne udi mutwibwe cítampì too ne ku ditükù dyà bupikudi bwèbè, kwèbè kuyààyà bwà Iwendu lwà pa buloba elu. Kaa, ekèlekèle! Abi’s bìvwa bikèngela kufikishabi muntu ku dipeta diitabuuja bwà kwitabuujaye Nzambì, kujuuka ànu mu bukolè mu Nyumà Mwîmpè.

³³ Mpindyewu, virgo yìvvà kayìyì mipete Nyumà Mwîmpè ayi, (Nudi bavùluke anyì?) cintu cìmwèpelè civwàbo bapangile mmaanyì mu myêndù yàbò. Neyà bushùwà anyì? Bible mmwambe ne *maanyì* ncimfwànyì cyà “Nyumà Mwîmpè,” ki bwà cinyì tutu tulaaba babèdì maanyì, ne bikwàbò, bwalu ncimfwànyì cyà Nyumà Mwîmpè. Mpindyewu, nènku dîbà adi piìkalàbi ne–piìkalàbi ne Nyumà Mwîmpè kî mmulwe kùdibo to, bôbò kabàvwa baMupete to. Nènku pashiishe pààkalwàYe, kwambabò...Mpindyewu, kùdì virgo yìvvà ne maanyì, kwambabo... .

³⁴ Nudi numònà’s, kwalukilabo mu cikondo cyà èkèleeyìà; kùvwà bâmwè bàà kudibo muntwamu bàvvà bantu bîmpè kadi kabàvwa mu Bukènkè bwà mùtootò to, cíndi muswè kwamba, ne kabàvwa ne mukàbà wa mwêndù mutükija mu maanyì to. Nwamònù’s, nènku ûvvà pambelu. Ùvvà mujime, bâvwa batàpuluke. Pôlò wàkamba, mu ditükù dyèndè ne: “Bààkatàpuluka neetù, byenze bu ne kabeena ne diitabuuja to.” Nwamònù’s, nènku kubashiyabo ne: “Baakuumuka kutùdì bwalu kabàvwa bàà ku twêtù to.” Mpindyewu, byàkabanga kale mu cikondo cyà kumpàla cyà Efèso aci ne kutungunuka ne kubwela mu eci cikondo leelù ewu. Cintu cìmwècimwè aci,

cyônsò cyà ku bikondo abi, cyàkenzekamu cyàkalunguluka too ne mu bikondo ebi. Netondole cyôci aci mu katancì kakesè emu.

³⁵ Mpindyewu, mònayai ne virgo ewu, nànsha nànkù, wàkabwela mu mwaba ùvvà myadi, ditwà dyà mikemu, ne disumakaja dyà ménù awu.

³⁶ Lekela ngàmbè bwalu ebu, wêwè mulunda wanyì munanga wa mushinga mukolè; bwalu pa ciibidilu ku èkèleziyà eku, pântù ndwa mwab'ewu, Ntu ànu ndwa cyanàànà kaaba aka bwà kwenza disangisha dyà dyondopa ne kusambidila babèdì, ne mu ditunga dijima mwaba kampànda. Kàdi eci ncikondo, cíntù nngènzà kunwambila kukaadi ntàntà mule ne, tükijàayi. Mpindyewu tudi bàswè—tudi bàswè kulwa ne kwikala ne meeji matòòke mutu ne lulamatu kùdi mukwèndè, bwalu tudi ku ditùkù dyà ndekeelu. Èyowà's!

³⁷ Mpindyewu, ki mwaba ngwôwò awu unùdì nwénù ba-Nazaréens bàà mushinga mukolè ne ba-Pèlerins de la Sainteté bapangile mu dijidiibwa. Nwamònù anyi? Mpindyewu, nutukù bamanye ne Yudààsè Mpongoloki uvwa ne nsòmbelu mwîmpè too ne mwaba ûmwèùmwè awu anyi? Yudààsè ùvwa mwitàbùuje Mukalenge Yesù bu MusÙngidi, muMwitàbe bu MusÙngidi. Ne yéyè wàkajidiibwa kàbìdì. Yéyè uvwa mujidìbwè, mu Yone 17:17, pààkamba Yesù ne: “Taatù, ùbajidilè ku Bulelèlè, Dìyì Dyèbè m'Bulelèlè.” Ne Yéyè ùvwa Dìyì. Eyo!

³⁸ Mu Maatààyì 10, bààkapèèshiibwa bukolè bwà kwondopa babèdì, kubiìsha bafwè, kwipata badémons. Ki kupàtukabo kuya mu bitùpà byônsò byà—byà ditunga kàdi kwipatabo badémons, ne kwalukilabo bënda bàsàンka ne bëla mbilà ne bâtumbisha Nzambi. Ki Yesù kubambilà ne: “Kanùsanki ne bwalu démons mminùkòòkèle to, kàdi nsàンkaayi bwalu ménà ènù àdi mu Mukàndà wà Mwoyi.” Ncyà bushùwà anyi? Ne Yudààsè ùvwa naabo, Yudààsè ùvwa naabo, kàdi aci cìvwa cidimu ne ngondo yìsambòmbò kumpàla kwà Yesù kupoopediibwayè pa nkùruse.

³⁹ Mpindyewu, pashiìshe pààkafikàbi ku Mpenta, bwà Yudààsè àpete Nyumà Mwîmpè ne bikwàbò, yéyè kuleeja diikala dyèndè. Yéyè—yéyè kuvilaye Yesù, ne kushààlaye muMutungidi. Nènku ki mwaba awu menemene wàkalwa nyumà awu's; ûfumina buludì mu Luther, Wesley, kufikisha èkèleziyà awu ku dijidiibwa ne nsòmbelu wa bu virgo (bantu bakezuke, basukula, bàà cijila, balenga, batàmbe bulenga banütùku kacya batwilangane naabu), kàdi pàkaadìbi bikafika ku... pàdibo bayá ku dyakula dyà mu myakulu ne dipeta dyà Nyumà Mwîmpè, ba-Nazaréens, ba-Pèlerins de la Sainteté, ba-Méthodistes Badishikamine, dìbà adi kwambabo ne: “Aci's ndyabùlu” Nènku ànu pa dìbà adi mene ke paùdì upenda Nyumà Mwîmpè ne utapuluka bwà kashidi; “Bwalu ewu yônsò wâkula dìyì dibì bwà Mwânà wa mutu neàfwìdiibwe

luse, kàdi ewu yônsò udi wakula bibì bwà Nyumà Mwîmpè kàadyàkufwidibwaku luse to.”

⁴⁰ Vùlukààyì ne, bayiidi bônsò bàvwa bàákula mu myakulu. Yesù Kilstò wàkafwà pa nkùruse, wàákula mu myakulu. Uh-hum. Pa nànku pawikala kùyì mwà kupetangana naabo mwaba ewu to, kwikala naabo kalolo mwab'ewu, nebikale munyì bwà mwaba awu? Bwàbo bôbò... Piikalabi ne bôbò aba mba-démons, s'ki muvvàbò pààbo. Pa nànku nudi numònà mwaba ùdici cileeja diikala dyàci anyì? Ke mwaba ulwalwà virgo awu, musukula bu bakwàbò abu, ne nsòmbelu mukezuke. Nêngàngatè èkèleезiyà yà cyena kale yà ba-Nazareéens, ba-Pèlerins de la Sainteté, bâdì biitùbùujè menemene dijidiibwa abu, kwêna mwà kufunkuna munu pa kantu mu nsòmbelu yàbo to; bakezuke ne mwàbo mwônsò. Ncintu címpè be mutùdì bônsò bàfwànyine kwikala ne nsòmbelu wa mùshindù awu. Ncyà bushùwà, bikèngela ànu wêwê kwikala nendè.

⁴¹ Mpindyewu, tudi bamanye ne tudi ne bantu bûngì cyanàànà mu beena Mpenta bu batentudi. Aci's ncyà bushùwà. Kàdi paùdì ànu umònà ndola wa mafi, udi mumanye ne awu's mmwenzela pa wa mwîmpè, wa mulelèlè. Ncyà bushùwà. Nènku kùdi—kùdi Nyumà Mwîmpè mulelèlè, Mulelèlè udi wakula mu myakulu ne uleeja bimanyinu ne maalu à kukèma, ne nkacya ànu ku Mpenta too ne leelu. Pa nànku bìdi bìkèngela bwà twêtù kwikala ne batentudi. Bìdi bìkèngela bwà twêtù kwikala ne mukàjì mubì udi kàyì mwîmpè to, bwà kufikisha mukàjì wa bushùwà ku dikenka. Bìkèngela twikale ne mêmà a bufuku, mîdimà mifiike, bwà kuleeja ne muunya ngwà butumbi. Ncyà bushùwà. Nènku bìkèngela bwà úsaamè, bwà wêwê kusàンka bwà mubidi tumatuma. Nènku cìdi mmukenji wà címpè ne cibi; nènku cidi—nènku cìtukù misangu yônsò, ne neciikaleku misangu yônsò, bwà pàcìdiku ànu cikondo apa.

Mpindyewu, pa nànku, ki mwaba ngwôwò awu udi èkèleезiyà mukafike's.

⁴² Mpindyewu, Yesù kààkambaku ne “Mu ditùkù dyà ndekeelu,” mu Maatààyì 24, “ne nyumà yìbìdì ayi neyììkalè mifwànàngane menemene mu mùshindù wà bifwànyine kuseeswisha ne Basungula mene bu ne bivwa mwà kwenzeka anyì”? Uh-hum. Kàdi ewu uvwa musungula kacya ku difükà dyà dyulu ne buloba awu ùdi ne Mwoyi wà Cyendèlèèlè. Mwoyi wà Cyendèlèèlè, kwêna mwà kuumukaKu to. Ngwà Cyendèlèèlè ànu mùdi Nzambi amu, kwêna mwà kulekela kwikalaku to ànu mùdi Nzambi kàyì mwà kulekela kwikalaku amu. Ncyà bushùwà. Bwalu udi citùpà cyà Nzambi, udi mwânà wa balùme ne wa bakàjì wa Nzambi, mwoyi wèbè mmushintùlùdiibwe ne udi citùpà cyà Nzambi, udi ne Mwoyi wà Cyendèlèèlè. Kaa, mêmè's ndi muMunange. Kàdi wêwè?

⁴³ Mpindyewu, muntu kampànda ùvwa mumpèeshe kabeji mwab'ewu, cìdi ànu lukonko lukesè cyanàànà. Katwàkwangata díbà dyàbûngì mpindyewu bwà kukàndamuna to. Nènku vùlukààyi ne, musangu wônsò wunùdì ànu nwela lukonko lukesè, Nénteetè ne mwanyi mwônsò bwà kufikaku bu mêmè mwà kukùmbana. Kàdi eci cìvwa ndukonko lwà mushinga mukolè:

Muntu kampànda uvwa muswè kumanya ní mbibì bwà bakàjì kufilabo bujaadiki, anyì kwimba, anyì kufila mikenji mu myakulu, kwandamuna mikenji ayi, anyì cipròfetà kampànda, mu èkèleезiyà.

⁴⁴ To, kî mbibì to, cìdi... pàdibi ànu ne bìdi byenzeka mu bulongame. Nwamònù anyì? Èkèleезiyà ùdi mu bulongame, ne ànu pàdì... Mùshindù mulelèlè, wà bushuwà wà kucyènza wùdi bwà aba bàdì bâàkula mu myakulu ne bikwàbò, mikenji yábo yìdi yifidììbwé kumpàla kwà diyisha dyà ku cyambilu, kabiyiku mu ciine cikondo aci to; bwalu Nyumà Mwîmpè udi ùkwàtà mudimu mu kaaba kàmwè ku musangu, bu mwàkambà Pôlò amu. Kàdi bakàjì bàdì ne mapà à cipròfetà, ne bàdì ne mapà à myakulu ne dyandamuna, ne bikwàbò byónsò pa kuumusha ànu kwikala bayiishi. Kabèna ne cyà kwikala bayiishi to. Mbakàndìkììbwé bwà kuyiisha mu maékèleeziyà, ncyà bushuwà, kwangata mwaba awu, anyì kwikala mulongeshi anyì cintu kanà cyónsò mu èkèleeziyà. Kàdi bwà pa bìdì bitangila mapà, mukajì ùdi naawu ônsò, ùdi mwà kwikala ne dìmwè anyì dyónsò dyà ku mapà à nyumà citèèmà bilondèshile Kolinto wa Kumpàla 12, ne kakwena cìdi cikandika bwà mukenji wendè kusatukawù pa kaaba kààwù nànscha. Nudi numònà's, mukenji wônsò udi windila cikondo cyàwù.

⁴⁵ "Kwôkò kwikale muntu udi wakula mu myakulu, kakùyi mwandamuni to, ashààle mupuwe too ne pààpetekaku mwandamuni." Nwamònù anyì? Ne mikenji eyi yìdi yifidììbwé, pa ciibidilu, ànu kumpàla menemene kwà disangisha kutwadijadì, díbà adi mupròfetà, anyì, muyiishi awu, udi mupròfetà wa Dipungila Dipyadipyà awu, muyiishi, pàdiye ùpatuka apu Nzambi ùdi ùbanga kukwàcila mudimu mu yéyè amu, nwamònù's, díbà adi pàdiye mumane kujikija díbà adi mikenji yìdi yìbanga, mukwàbò, ànu kumpàla menemene, bìdi misangu yônsò ànu mu bulongame, misangu yônsò; kàdi mukajì ùdi ne bukenji.

⁴⁶ Lùdì lulonda, ndi muswè ànu, kwangata ndambù wa díbà bwà kwandamuna elu, nêmbalè mutù wa bwalu:

**NKUDIMWINU UMWE WA BIBLE WA MIITABUUJA
ÀSATU ÙDI ÙBANGA.** Washington, dyà matùkù 15 à ngondo wa kaswà-mansènsè. Bamanyi bàà mabàla bàà cyena Kàtòlikè, beena Mishòonyì ne beena Yuda bàdì munkaci mwà kukwàtà mudimu bu kasùmbù mbabangishe

nkudimwinu mupyamùpyà wa cyàpàmwè wa Mifùndu udi mwà kwikala mujààdikìibwe bu Bible wa nsangilu mwindilandila.

⁴⁷ Kudi bikwàbò bintu mwab'ewu bîndì njinga kulonga ndambù kumpàla kwà mêmè kufila dimanyisha dyà bwalu abu. Mu ngààkwìlù mukwàbò, nudi numònà's ànu menemene citùdì twamba, ànu menemene cîdì Mufùndu wàmба ne necyènzeché mu matùkù aa, ne bintu nebidiswike pàmwè bwà kwenza cimanyinu cyà nyama wa lwonji's. Menemene. Mbacítèete, ne bakwatepu mudimu, kàdi mpindyewu mbapete mpùngà mulenga mutàmbe wa kacya bwà kucileeja, bwalu cidi ànu mu byanza byàbò bôbò. Nènku ke kabingilà kândì ntwàdila mayiisha à cipròfetà aa, mbwalu ndi ngeela meeji ne mpa dîbà menemene.

⁴⁸ Nènku kwôkò muntu kampànda udi mufwànyìne kwalukila dîlòòlò dyônsò, netûteete bwà kubanga kumpàla kwà dîbà ne kupàtuka kumpàla kwà dîbà. Nènku mêmè nciyi mujikije cyenabwalu aci to, dîbà adi nêmmayishè pàacyabu mu dindà. Twétù katuyi bajikije ditèèka dyà cishimikidi cyà mvensa wa 19 to, mvensa wa 9 too ne ku wa 20 dîlòòlò edi, netùcìbangishe mu dindà pa dîbà dikumi jaajaaja. Netùnùmanyishe ku ndekeelu kwà masangisha, mùshindù utwàfikaku.

⁴⁹ Nènku dîbà adi mààlabà dîlòòlò netwìkale pa èkèleelzìyà wa Efèsò, mbangilu, tukenketa mu malòòlò mwandamutekète awu: Efèsò, Cikondo cyà Èkèleelzìyà wa Efèsò; ne cyà Seemùnà; ne Peegàmò; ne Twatìlà; ne Sààdì; ne Filàdèlèfiya; ne Laòdikìyà, mu dyàlumingu dîlwalwà edi.

⁵⁰ Nènku mudibi ne masàngà manène à ngolo aa mmaadija mu njila amu, mbikolè bwà mêmè kuumushapu byanza too ne ku ciine cikondo aci. Mvwa ànu ngàmònà mwaba awu, mwikale ngumvwa Nyumà udiiisha munkaci mwà cisàmba, bìdi byenza ne ndyumvwé ànu mwà kutupika ne lubilu lukolè menemene ne—ne kwambaku cintu kampànda pa byôbì abi's; kàdi ndi ànu ne cyà kudikandaku ne kubitèèka mu cikondo cyàbì ne pa dîbà dyàbì. Pa nànku wêwè mupangile mwà kulwa bufuku, ikala mutwìshiibwe bwà kupeta mukàbà wà mêyì awu anyì mùshindù kampànda ûdì mwà kuCìbakula, bwalu ndi muswè bwà kuyawù myaba yônsò. Ne ndi mwenze eci bwalu ndi ndyùmvwa mulombòdìlbwe kùdì Nyumà Mwîmpè bwà kwenza nànku; ki kabingila kàmwè kândì ncyenzela. Nènku mêmè, bu ne ncivwa ngeela meeji ne ncifwànyìne kukwacisha èkèleelzìyà to... Nènku mu ditùkù edi, vùlukààyi ne, dîbà dîlwalwà àbìdì àdì pansi aa ditwikala katuyi mwà kwenza masangisha aa to, nènku bìkèngela nùéñzè mpindyewu patùcìdì ne dîbà dyà kuènza apa. Nwamònù's, katwèna bamanye ne ndîbà kaayi dìikalàbo mwà kwimanyika cyôcì eci to, mpindyewu.

⁵¹ Nènku dîbà adi nekwikale didìsanga munkaci mwà maèkèleelzìyà ne nebàdisange pàmwè, nebènze mutù wà nsangilu

wa maèkèleeziyà, mwine awu ngunùkaadi nendè ne nzùbu munène wa Nations Unies ewu ne dingumba dyônsò dìdimù. Nènku nebikèngèle anyì bwà kwikalà wa ku dìmwè dyà ku màngumba awu anyì kwikalà mwedìibwe pambelu. Nènku's ki cikondo cìdì cikèngela bwà twêtù kuleeja citùdì ne kwikalà batwìshìibwe ne tudi bamanye, kî ndicinka dyà maalu to, kàdi bamanye EMU MMÙDÌ MUKALENGE WÀMBA mûdì mwimanyine. Èkèleeziyà mukèsè ewu ùtu misangu yônsò ànu wa banyààbanyà, nkasùmbù kakesè menemene kàdì... kaanshinga kakesè kàà bwàndà, byenze bu—mwonji mukunze ùdì upicila mu Bible emu, kàdi's ng'Èkèleeziyà misangu yônsò. Nènku mbîmpè twikale bacìvùluka.

⁵² Mpindyewu ànu kaabwalu kakesè kàà dyela nsèke kumpàla kwà twêtù kubala cyàkàbìdì. Mu dìndà emu twêtù kwangata Bunzambì bwà Kumutù kwà bwônsò bwà Dibuulula dyà Yesù Kilistò, mùvwa Nzambì muMubuulule kutùdì mu dìndà emu bu Bunzambì bwà Kumutù kwà bwônsò: NDI Munène awu (kî *Mwva* anyì *nêngììkale* to), NDI, misangu yônsò. Nènku tudi tumòna mu nshapità wa 1 wa Bwàkabuulwibwà ewu, wa Bwàkabuulwibwà... Ndbuulula dyà cinyi? Yesù Kilistò. Cintu cyà kumpàla cìdì Ye ùDibuulwila kaaba aka ncinyi? Nzambì wa mu Dyulu. Kàyi nzambì mu busàtu to, kàdi Nzambì umwe. Nzambì umwèpelè, ne Yéyè ùdi ùDibuulula mùshindù awu mu nshapità wa mbangilu wa Bwàkabuulwibwà. Nènku ùcyàkula misangu yinaayi mu nshapità wa 1 bwà kakwìkadi ntùpákànyì nànsha. Cintu cyà kumpàla cìdì cikèngela bwà wêwè kumanya, ncyà ne: Yéyè kî mmupròfetà to, Yéyè kî kaanzambì kàà—kàà kânàkâna to, Yéyè kénéa nzambì wa mùshindù mulondèle to, Yéyè ùdi Nzambì! Yéyè ùdi Nzambì. Nènku ki bwà cinyi Dibuulula dyàkapàtuka, ne twêtù tucìdì ànu tutungunuka naaDi dilòòlò edi ànu nànkú bu mutùdì tupeta mìshindù Yèndè mwandamutekète yà bwikadi Bwèndè.

⁵³ Nènku, kaa, Nzambì àtùkwacisheku patùdì tulongesha Mèyi aa apa. Ndi—ndi—ndi mucìlongèle mu mmwènenu wa maalu-malonda, kadi ndi mwindile too ne pângààbandà mu cyambilu emu bwà disonsodiibwa. Bwalu ndi ndyumvwa ne tudi basòmbe pamwè mu myaba yà mu Dyulu mu Kilistò Yesù, ne Nyumà webè, citùpà cyèbè, ludimi lwà kapyà (Nyumà Mwîmpè) udi pa wêwè apu ulwa pa mukwàbò, ne mukwàbò ne kùdì mukwàbò, Üdi ùteemesha Mubidi munène wà Nzambì awu ne Üwùlakusha kapyà, nènku's ki mwaba ùdi mabuulula's... .

⁵⁴ Mpindyewu, cintu citùdì twamba eci, lukonko elu lùvwa lungela ne: “Bìvwa bikèngela bwà bakajì...ne bikwàbò anyì?” Ki cyôcì aci menemene cyàkabweja èkèleeziyà mu cimvundi cyèndè ku cibangidilu, bàvwa buumùshe butùmbuke bwônsò kùdì batèèleji ne babütèèke mu cyambilu. Kàdi Nzambì n’Nzambì wa batèèleji. Üdi ùkwàcila mudimu mu muntu ne muntu, Üdi ne mwoyi mu mwoyi ne mwoyi

wônsò mùdìYe mwà kubwela amu. Ùdi usangana bantu bâdi ne mapà abu ne ùkwacila mudimu mu bôbò. Mpindyewu, dyabùlù yéyè kàyi mwà kubàbakwila pa cintu cîmwèpelè to, dîbà adi ùdi ulwa ne ubavwija nsangilu munène wa bintu cyanàànà ne ùnyemesha bantu. Bu mwàkambà Pôlò ne: “Panûdì nudìsangisha, nwênu bwônsò baakule mu myakulu, ne udi kàyi mulongèshiìbwe kubwelai munkaci mwènù, yéyè kààkwambaku ne: ‘Nudi bapâle! Bakùtakana anyì!?’ Muntu kampànda wàkula mu myakulu, ne *cikampànda* ne *cikansanga* kaciyi mu bulongame to, ne bikwàbò byônsò, abi kabyàkukumbanaku to. Kàdi,” mwàkambaye, “nènku muntu yéyè wàmба cipròfetà ne usokolola bwalu busokòme bwà mu mwoyi, dîbà adi neàmbè ne: ‘Bulelèla Nzambì ùdi neenù.’” Kàdi muntu yéyè wakula mu myakulu ku dibuulula kampànda ne ûfila dyumvwija dyâci, cintu kampànda bwà kwibaka èkèleeyiyà, dîbà adi èkèleeyiyà mujima mmwibakiìbwé ku cyôcì aci. Cintu kampànda cìikalà mwà kwakula ne Nzambì wàkula mu myakulu yitùdì katuyì bamanye to ne ùcìfila kùdi ewu ne ùcyàndamwina kùdi mukwàbò, ne wàmба cintu kampànda cìdì cyenzeka menemene ànu mudici cyamba amu, dîbà adi nudi ne Nyumà wa Mukalenge munkaci mwènù. Nènku, kaa, tùdyenzéjaayi bwà cyôcì aci, balunda bàanyì; tù-tùlamààyi kapyà aku ànu kâteemà’s.

⁵⁵ Mpindyewu, kumpàla kwà twêtù kubuulula... nsangilu munène wa Mufundu ewu, ndi ndikonka ní mbifwànyìneku kwikala bitàmba kunùcyòkesha bu twêtù mwà kujuukila kuulu bwà kwololaku mibidi yêtù bwà tusunsa tukesè cyanàànà patùdì tusambilà apa.

⁵⁶ Nzambì wa Bukolè bwônsò wâkabiìsha Mukalenge Yesù ku bafwè ne kutùleejaYe (paanyimà pàà bidimu cinunu ne nkàmà citèèmà) bu Nzambì wa mu Dyulu ùdi kàyi mwà kupangila, tudi tuKusàkidila bwà ciine eci ne bwà Bwikadi Bwèndè pàmwè neetù ku ditùkù ne ku ditùkù mu lwendo lwètù lwà ku ditùkù ne ku ditùkù. Nènku tudi ne disànkà dyàbûngì dyà kumanya ne mu dîbà edi dyà cibwejàkàjì dîdì bàà pa buloba kabàyì bamanye cyà dyenza, mbaditwe mu kumbula biinà mu buloba, ne badìkolesha mu ngumbu yà nshààmenda, kàdi, Éyi Nzambì wa yààyà, kabeena mwà kusokoma ciji cikolè cyà Nzambì to. Kùdi bwanga ànu bùmwèpelè—bùmwèpelè, Mukalenge, nènku tudi ne disànkà dyàbûngì bu mutùdì baBwîtâbe: “Pângààmònà Mashì Nêmpicile pamutù pèènù.” Kaa, mùshindù mwine utùdì ne disànkà bwà dikùbiibwa dikumbanyine dyônsò adi dilòòlò edi dyà Mashì à Mwânà wa mùkoòkò wà Nzambì, Mwakwidi Munène, mwimane mu Butùmbi dilòòlò edi mwikale wùtwàkwila pa dijikula dyètù. Tudi ne disànkà dyàbûngì dyà kwikala Nendè munkaci mwètù dilòòlò edi, Mwakudi munène awu, Nyumà Mwîmpè munène awu, mufidi munène wa dilaabiibwa awu, mufidi munène wa Mwoyi awu.

⁵⁷ Nènku mpindyewu, Mukalenge Nzambì, ànu bu mündì mubiikile bantu aba kaaba aka mwinshi mwà musàkà ewu dilòòlò edi emu, ne tudi badìsangishe kaaba aka bu èkèleeyiyà anyì citùpà cyèndè, katwèna badìsangishe mu dînà dyà tabernacle ewu anyì mu dînà dyà muntu kanà yônsò ewu to, kàdi mu Dînà dyà Yesù Kilistò. Swaku bwà Nyumà uvwa ne bukòokeshi mu mubidi Wendè ne meeji Èndè, ne ùMukontonona awu, àbweleku munda mwètù dilòòlò edi ne ùmvwije Dîyì ne ayiisheku Dîyì, ne àDìpèèshèku myoyi yètù yìdì ne nzala eyi patùdì baMwindile apa. Bwalu tudi tulòmba nùnku mu Dînà Dyèndè ne bwà butùmbi Bwèndè. Amen. (Sòmbelààyi pansi.)

⁵⁸ Mpindyewu bwà nwènù bàdì ne Bibles yènù abu, buulùlaayi ku nshapità wa 1 wa Bwàkabuulwibwà nubangile ku mvensa wa 9; crayons yènù ne mabei, nènku nênteetè bwà kunùpèèshakù matùkù ne bikwabo pândì ngenda nya apu.

⁵⁹ Mpindyewu, eci mu bushùwà bwà bwalu cìdi... Mu dindà emu cìvwa citambe kwikalà diyiisha, mwikale ntèèka cishìmikidi pa Bunzambì, bwà Dibuulula; Nzambì mwikale mubuulùdìlbwe mu Kilistò. Mbanganyì bàdì bàCìtabuuja? Nzambì wàkabuuludiibwa mu Kilistò, Yéhowàh mubuulùdìlbwe mu Kilistò. Mpindyewu mpenyi pàdibi bikèngela bwà Nzambì kubuuludiibwaye? Mu Èkèleeyiyà Wendè, pàmwè ne cisàmbà Cyèndè, munda mwètù. Nyumà umwèumwè awu, byenzedi bimwèbimwè abi, dimwèneshiibwa dimwèdimwè adi, dinanga dimwèdimwè adi, difwilangana dyà luse dìmwèdìmwè adi, mwoyi mule ùmwèumwè awu, kalolo, lutùulu, ditalala, luse, byônsò bivwa mu Kilistò abi bidi mu Èkèleeyiyà. Vùlukààyi ne, lamààyi eci mu meeji ne: cyônsò cìvwa Nzambì aci Yéyè wàkacipòngolola mu Kilistò (Yéyè ùvwa kaabujima kàà Bunzambì mu mùshindù wà mubidi), ne cyônsò cìvwa Kilistò aci Yéyè wàkacipòngolola mu Èkèleeyiya. Nzambì kumutù kwètù, Nzambì neetù, Nzambì munda mwètù. Busàtù bwà Nzambì mu umwe, Nzambì mumwènèshìibwe mu mìshindù yisatu mishììlàngànè: Taatù, Mwânà, Nyumà Mwîmpè.

⁶⁰ Dibuulula kuleejadì ne Yéyè kêna nzambì yìsàtu to, anyì ne mMukosa mu bitùpà bìsàtu to. Kàdi Yéyè ùdi Nzambì umwèpelè uvwa Nzambì mu matùkù à buuTaatù, Yéyè ùvwa Nzambì mu matùkù à buuMwânà, Yéyè ùdi Nzambì mu matùkù à cipungu cyà Nyumà Mwîmpè, Nzambì umwèumwè awu. Kí nyisatu mishììlàngànè to, kí mbantu bàsàtu to, kí mbuumùntù bùsàtu to. Yéyè m'Mupersona ùmwèpelè, buumùntù bùmwèpelè. Kwéna mwa kwikalà buumùntù kùyi muntu to. Bàmwè bantu kwambabo ne: "Yéyè kêna bantu bàsàtu to, kàdi's Ùdi buumùntù bùsàtu." Kanwena mwà kupandulula aci to; bwalu pìkkalaYe ne buumùntù, Yéyè's mmuntu; bikèngela ikale muntu bwà kwikalà ne buumùntù's. Pa nànku Yéyè ùdi Mupersonà ùmwèpelè, buumùntù bùmwèpelè; umwèumwè awu makèèlèlè, leelù, too ne

kashidi; Alpha, Omega; Ewu wàkadiku, udiku, ne wâlwa awu. Kaa, Yéyè's udi ànu BYÔNSÒ. Mêmè ntu munange aci's.

⁶¹ Tàngilàayì ngikadilu Wendè, nsòmbelu Wendè, byenzedi Byèndè. Bivwà ne cyà kwikalà bìmwènèshìibwe mu tabernacle ewu mene, ànu mwàkadibi mu ditùkù Dyèndè amu. (Ncyéna ngàmb'eci bwa kuditambisha to; Nzambì mmumanye aci.) Kabiyì ànu apa to, kàdi mu buloba bujima. Ndi ne disànkà bwà mùdìbi nàñku. Dìbà adi tudi bamanye patùdì biimanyine bwalu tudi ne Nyumà umwèumwè awu munda mwètù, ùtentemuka neetù ne ùleeja ne Yéyè ùdi kaaba aka. Kî ntwêtù to, n'Yéyè; katwena mwà kwenza bintu abi to, n'Nzambì. Pa kuumusha aci, mu beena maalu à mamanya, Yéyè mmwanyishe bwà cimfwànyì Cyèndè kukwaciibwaci foto. Neetù, munda mwètù, mu nyungulukilu wetù, pamutù pèètù, munda mwètù, ùkwàta mudimu munda mwètù ne pambelu pèètù. Kaa, bilenga kaayipu's wè!

⁶² Bavwa ne ciibidilu cyà kwimba kaamusambu kakesè ne:

NDI wàkaakula ne Môsà mu cipuka cìlákuka
Kapyà awu,
NDI Nzambì wa Abraham, Mùtootò ùdi
Ùkenka wa mu Dìndà awu.
NDI Cilòngò cyà Shalòna, kaa, udi mwambe ne
Ndi mulwile penyì?
Nutuku bamanye Taatù wanyì, anyì nudikù
mwà kutèela Dînà Dyèndè anyì?
Kaa, nudi nwamba ne Ndi nganyì, anyì nudi
nwamba ne Ndi mulwile penyì,
Nutuku bamanye Taatù wanyì, anyì nudiku
mwà kwamba Dînà Dyèndè anyì?
NDI Alpha, Omega, mbangilu ne ku ndekeelu,
NDI bufùki bujimà, ne Yesù ki Dînà adi.

⁶³ Kaa, mùshindù mwine ùdibi bilenga bilayà's wè, Dibuulula adi! Mpindyewu, vùlukàyi ne, kwêna mwà kuDìpetela kùdì beena teòloji to, kaDìtu dilwa mùshindù awu to. NeDilwe ànu bu dibuulula. Dibàtiiza dyà mu mâyì, dyenzeka mu Dînà dyà Yesù Kilistò, dìdi mwà kufidiibwa ànu bu dibuulula. Yesù ne Nzambi bìikale Muntu umwèumwè awu dìdi mwà kulwa ànu bu dibuulula. Bible mujimà mmwibakila pa dibuulula. Èkèleезiya mujimà mmwibakila pa dibuulula. Maataàayì 17 ùdi wàmба ne: "Bwalu mêmè Ndi mwambe ne: 'Pa lubwebwe elu (dibuulula dyà nyumà) Néngiùbakilepu Èkèleезiyà wanyì, ne biibi byà iferno kabiyéna mwà kuMutàmba bukolè to.'" Tudi beela muntu kanà yònsò kadyòmbo bwà kutùleejaye, mwaba kanà wònsò, mu maalu-malonda anyì Mifùndu, mùvvàku muntu mubàtiijiùbwè mu dînà dyà "Taatù, Mwânà, Nyumà Mwímpè" pakuumusha èkèleезiyà wa Kàtòlikè too ne ku ditùkù dyà Martin Luther. Pashiishe èkèleезiyà wa Mishòonyì, ùvwa . . .

⁶⁴ Ne bwalu bubì bwônsò, tèèlejààyi, patùdì tubwela mu bikondo byà èkèleeziyà apa, bubì bwônsò bùvvà mu èkèleeziyà wa dyàmbedi abu, mbudifinde mu ùvwa ulonda awu. Kutungunuka ànu ne kuya too ne ndekeelu wa byônsò cikafika too ne ku ditombokela Nzambì mu ditùkù dyà ndekeelu. Bubì bwônsò kacya ànu bwàtungunuka ne kudifinda mu èkèleeziyà yônsò, dînà kasùmbù kakesè kwônsò kààkabanga aku. Byenze bu mu Genèsè, mwoonji wà myinyo awu, kubangawu kwenda kukola, kukonyangalawu munda mwà èkèleeziyà ne kupatuka mu matùkù à ndekeelu aa. Kabyèna bìkèmesha to pàdì Bible mwambe ne: “Bàà disànkà ng’aba bààpanduka mu ditùkù adi.” Eyowà’s, mukalenge, bààpanduka bintu byônsò ebi.

⁶⁵ Mpindyewu lombaayi Nzambì bwà...patùdì twakula pa Dibuulula apa, Mulòmbaayi bwà kunùpèèsha dibuulula dyà Cyôcì eci. Bwalu Cìdi mwà kumanyika ànu ku dibuulula, ne nudi mwà kusÙngidiibwa ànu ku dibuulula. Wêwè udi ne dimanya dyà Cyôcì aci, mu mùshindù wà mamanya à mu mutù, kàdi kwêna mwà kusÙngidiibwa to pàdìCi kaciyì cikubuulwibwe nànsha. “Muntu nànsha umwe kêna mwà kubìikila Yesù ne n’Kilistò to, ànu ku Nyumà Mwîmpè.” Aci’s ncìdì Bible wàmба. Muntu nànsha umwe kêna mwà kwamba ne Yesù ùdi Kilistò pàdìye kàyi mupetè Nyumà Mwîmpè nànsha. Mmufwànyìne kwamba ne: “Mpaasàtà ngudi wamba nànku, Bible ke udi wamba nànku.” Abi’s mmalelèlè. “Èkèleeziyà ngudi wamba nànku.” Aci’s ncilelèlè. Kàdi kwêna mumanye wêwè mwine to pàdì Nyumà Mwîmpè kàyi mukubuulwileCi wêwè to, ne Yêyè mulwe munda mwèbè. “Muntu nànsha umwe kêna mwà kubìikila Yesù ne n’Kilistò to, ànu ku Nyumà Mwîmpè.” Kî nku dimanya to, kî nku mamanya à mu mutù nànsha.

⁶⁶ Mmunyì mwikalabo mwà kwenzeja Bible bwà...Bateeta kuMukama, kuMuvwiija wa beena Yuda, wa beena Kàtòlikè, ne beena Mishòonyi, pààbò bashìlàngànè ànu mùdì muunya ne bufuku. Mvwa ngeela meeji ne beena Yuda bavwa bamanye cyà címpè kutamba aci; ngeela meeji ànu ne pàmwàpa ndìbà dyàcì bwà kulwa, mwaba ùdici ne cyà kubwela cyônsò mu ditombokela dinène dyà Nzambì edi. Pa nànku, ne bintu byônsò vùlukààyi ànu ne, twétù katwéna mwà kucìimanyika to, kàdi cintu cimwèpelè citùdì mwà kwenza nkumwangalaja Bukènchè pambelu pààpa, pàmwàpa kudìfila twêtù biine bu bafwile diitabuuja neukwàta njila kuya, nànku ke mùshindù ùmwèpelè utùdì mwà kucyenza. Kàdi bààbûngì nebìikale ne cyà kwenza nànku. Nànku awu’s ki mùshindù awu ùdì Bible mutèèkiibwe ne bintu bitùdì tukabwelamù abi’s. Mêmè ncìyi mutàngile bîmpè to, nembwelèmu.

⁶⁷ Mpindyewu, cintu cyà kumpàla mu Mukàndà wà Bwàkabuulwibwà, ùdì ùbanga ne Cìdi n’Dibuulula dyà Yesù Kilistò, cìdìYe aci. Mpindyewu, Yesù Kilistò ùdì Nzambì wa Bukolè bwônsò. Bwà aci’s tudi bamanye. Mbanganyì bàdì

baciìtabuuja? Ambaayi ne: "Amen." [Disangisha dìdi dyàmba ne: "Amen."—Muf.] Yéyè ùdi Nzambì wa Bukolè bwônsò, ne Ùdi ne Dînà dìmwèpelè. Dînà adi ki dînà dìmwèpelè dìdi difidìlbwe mwinshi mwà Dyulu kunùdì ne cyà kusùngidiibwa, Yesù Kilistò. "Bâdi baDiciìna bwà cinyì ku ciinà cyà mâyi?" ki cîdî cinkemesha mêmè aci's. Uh-huh. Nwamònú anyì? Mbwalu nyumà awu wàkadifinda lwà mu Cikondo cyà Seemùnà aci; ne kudifindadi buludi too ne mu cikondo cinène cyà mîdîmà aci, ne kucivwija dilongesha, kutungunuka ne kulwa naaci too ne ditùkù dyà ndekeelu edi. Mpindyewu, tàngilààyi ànu maalu-malonda ne Bible patùdì twenda tulonga lumingu elu apa, mùdici—mùdici cipatula bintu abi.

⁶⁸ Mpindyewu cintu cîdî cîlondà. Cyàkapeebwa Yone kûdì Kilistò, ku mwanjèlo, bwà kufidiibwa kûdì (cinyi) Cyèndè? èkèleeyiyà, bwà kuCibuulwila èkèleeyiyà Yèndè. Nenku mîtootò mwandamutekète mu cyanza Cyèndè yìvwa baamisànjeela mwandamutekète bàà èkèleeyiyà mwandamutekète. Ne muntu yônsò wíkaleku ne Mukenji, neàcipete, Mukenji mulelèlà ûmwèùmwè wàkabanga ku cibangidlu awu.

⁶⁹ Ne byôbì biine kâbìdì, patùdì tufika mu myaba yà ndòndò ayi, bwà kumònà mùshindù ùdi Nzambì mubweje bintu ebi, s'mbilenga byà dikema. NeCikweleshe ànu mbila's. Mywa ngènza, ncìbala, ne pashiìshe nyunguluka katancì kakesè ne ndila mwadi, ngalukila ne nsòmbela kâbìdì pansi, pashiìshe nyunguluka katancì. Mwikale ne disankà díkolè pa kumanya ne: Mmuni muvwaku Nzambì mwà kwikala ne luse kutùdì bwà kutùfikisha ku dimònà cintu aci mu dîbà ditùdì ne mwoyi edi? Môna's, mbyenze ànu bu mwàkambà Yesù ne: "Muntu wàkapànyisha byônsò bìvwàye naabi bwà kusùmba dibwa dyà mbongò kampànda." Udi upànyisha maalu à buloba, ne bintu byà pa buloba, ne byônsò bîdî byà cintu cikwàbò kanà cyônsò, bwà kupeta Eci. Ncyà bushùwà, ela lwongo lwèbè lujima ànu pa Cyôcì aci. Cintu's n'lwongo lwà musùkà bwà kumònà dibuulula Dyèndè dyà Dîyì Dyèndè.

⁷⁰ Mpindyewu, ewu yônsò udi uCibala awu mmubènèshìlbwe. Ncyà bushùwà anyì? Kâbìdì tuvwa bambe mu dîndà emu ne, pawikala kùyì mwà kubala to, ewu yônsò udi umvwa bàCibala awu, mmubènèshìlbwe. Mpindyewu, Cidi cìbangà ne dibènesha kûdì aba biìkala mene basòmbe ne bàCitéèleja cibadiibwa, ne mmulawu kûdì ewu yônsò wadìdinga kuteeta bwà kusàkidilaKu kantu kampànda anyì kuKùùmushila kantu. Dîbà adi piìkalà Bible ubuulula bitòoke tòò ne Yesù uvwa Nzambì wa Bukolè bwônsò, dîbà adi dyàkabi kûdì ewu wíkala mwà kucyùmushaku. Èyo. Ndibuulula. Ewu yônsò wadìdinga kusàkidila cintu kampànda...Nsangilu mujimà wa—wa Bwàkabuulwibwà; m'Mukàndà wà ndekeelu wà Nzambì, Mêyì Èndè à ndekeelu, Dyèndè dyà ndek...Ne dibuulula

dyônsò dìdì dilwa bibèngangane ne Cyôcì aci, ndyà cipròfetà cyà mashimi; kî n' Nzambì to, bwalu eci m'Bulelèlà.

⁷¹ Nènku, vùlukààyi ne, ewu s'ke mukàndà ùmwèpelè mu Bible wâkaleejà Kilistò ne mmwitabe, Yéyè mwine. Anji elààyibi meeji pa bwalu abu's! Mukàndà ùmwèpelè, ndibuulula dyà Yéyè mwine. Mukàndà ùmwèpelè ûvwaYe mutwepu cîtampì Cyèndè, ne mutèèke mabènesha Èndè ne milawu Yèndè. Mabènesha kùdì aba biìkalà mwà kuWàkidila, mulawu bwà aba biìkala kabàyì mwà kuWàkidila.

⁷² Mpindyewu—mpindyewu tudi tukafika ku cisanga cyà Paatèmò mpindyewu bwà kubanga, mvensa wa 9. Cyà kumpàla, tudi bâswè kwamba ne cìdi... Mutù wa bwalu wa eci ùdi ne: *Cikèènà-kumònà cyà Paatèmò*. Byàkenzeka panyimà pàà lufù lwà Yesù, pankaci pàà cidimu cyà 95 panyimà pàà lufù lwà Yesù ne cyà 96. Mwaba wùvvà mu cisanga cyà Paatèmò. Cidi cisanganyiibwa mu kilòmèètà makumi anaayi ne mwandamukùlù ku mpengà kwà Asie Mineure, ku wesètè, bitàngilangane ne èkèleeziyà wa Efèso, mu Mbû wa Égée ku mikàlù yà Méditerranée. Ki mwaba udici cisanganyiibwa awu.

⁷³ Elaayibi meeji's! Mpindyewu, kaacisanga kakesè kasanganyiibwa mu ntàntà wa kilòmèètà makumi anaayi ne mwandamukùlù ku mpengà kwà Asie Mineure, mu Mbû wa Égée. Ànu bitàngilangane ne èkèleeziyà wa Filàdelè... anyì èkèleeziyà wa Efèso, mwaba wàkafidiibwa Mukenji wà kumpàla, mùvvà Yone mpaasàtà amu ciine cikondo aci. Mu ngaakwilù mukwàbò, wàkatàngila buludi ku esètè ne yéyè ûvwa ùtàngila buludi ku èkèleeziyà wendè, kuumukila mwaba ùvvwàye ùsanganyiibwa awu. Nènku Mukenji wà kumpàla ûvwa mutùmina èkèleeziyà wendè, uvwa uleeja cikondo cyà èkèleeziyà. Èyo, cikèènà-kumònà aci cyàkafidiibwa kùdì Yone Munsantu wa Nzambì, yéyè uvwa mpaasàtà wa èkèleeziyà ku Efèso pa ciine cikondo aci.

⁷⁴ Ngiikadilu kaayi uvwa cisanga aci dîbà adi's? Cìwva cisanganyiibwa penyì, ne mu ngiikadilu kaayi? Èyo, ncimanyike mu maalu-malonda bu cisanga cyà mabwe cyûle tètentè ne nyoka, tumìnyiminyì, misodya, ne bikwàbò. Kùdì kilòmèètà makumi anaayi ne mwandamukùlù mu nyungulukilu wàcì, ne cyûle tètentè ne mabwe. Mu matükù à Yone amu, bàvvwa bàkwàtà naaci mudimu bu Alcatraz. Mwaba ûvwa Mfùmù wa bukalenge bwalàbale bwa Loomo wutuma benzavi, benzavì bëèbè bàà menemene abu, bàvvwàbò kabàyì mwà kulama mu buloko ne bikwàbò to, bavwa mwà kubeela muntwamu mu cisanga aci bwà kufwàbò; babàlekela muntwamu too ne mùvvwàbò bàfwa.

⁷⁵ Lukonko: Cìwva cyenze ne Yone àsanganyiibwemu ncinyì? Muntu wa difwàna dyà Nzambì, muntu mwakàne, muntu wa luumu lwímpè, wa ngiikadilu mwímpè, kàyì mu ndululu ne muntu to, bwà cinyì muntu ewu uvwa muntwamu? Bible

mmwambe ne: “Bwà Dîyì dyà Nzambì ne bujaadiki bwà Yesù Kilistò.”

⁷⁶ Mpindyewu tudi ne mmwènekelu awu. Cisanga cyà Paatèmò, mu Mbû wa Égée, mu ntàntà wa kìlòmèètà makumi anaayi ne mwandamukùlù ne côte, kìlòmèètà yàmba kutwa ku makumi anaayi ne mwandamukùlù mu nyungulukilu wàcì, ne mabwe, cyûle tèntè ne misodya ne tuminyiminyi ne bikwàbò, kàdi cishìya nzùbu wa lukanu (bu mùdì Alcatraz). Pàdibo bapeta mwena lukanu udibo kabàyi mwà kulamina mu buloko emu, bàdi... nànku mwenzavì wa wenza bwôwà wa mùshindù awu, bàdi bamwela mu Alcatraz.

⁷⁷ Ki mpindyewu kwangatabo Yone munsantu wa Nzambì ewu...wa ndekeelu ku bayiidi abu, ne umwèpelè wâkafwà lufù lwà kaluyi lwà ku byanza byà muntu awu. Yone, kumpàla kwà kuyaye mu cisanga amu, bààkamufunda ne “mmuloji,” ne kumusabishabo mu cipànzà cyà màfutà munda mwà mèbà makumi àbìdì ne anaayi, kaàyì amwenzela bwalu to. Kwena mwà kupatula Nyumà Mwîmpè mu muntu mu dimusabisha pékù nànsha....? Kumusàbisha munda mwà mèbà makumi àbìdì ne anaayi mu cipanzà cyà mafuta, kaàyì amwenzela bwalu nànsha bùmwè to. Ki bôbò ne, kabingìla kàdì beena—beena Loomo bafila, kàvwa ne: “Yêyè ùwwa muloji, ne wàkakika mafuta awu.” Cìdì meeji à musunya mwà kudifwanyikijila’s wè! Mpindyewu, nudi numóna’s, pàdibo batùbiìkila ne “babadi bàà meeji à bantu, ne batempi bàà mbùkù, ne Beelèzèbulà,” nudi numònà mwaba wùdì nyumà wa kale awu ûfùmina anyì? Kàdì nudi numònà kùdì Nyumà mulelèlà ûfùmina anyì? Mbikondo byà èkèleeziyà. Nwamònà anyì? Mèbà makumi àbìdì ne anaayi, ùsàba mu mudilu mukolè, màfutà àtùtuka, kàdi kaàyìku nànsha àmulenga to. Kaa, mùshindù mwine uvwa Nzambì mumunyungulukile mu Yêyè ne Nyumà Mwîmpè Wendè’s. Mudimu Wèndè kawùvvwa mujike to.

⁷⁸ Bààkamutèèka mu cisanga amu mundà mwà bidimu bìbìdì bulubulu. Nènku pàvwa Nzambì mumupatule mu yêyè mwine apu, kufundaye Mukàndà wa Bwàkabuulwibwà ànu mùvwa Mwanjèlò wa Mukalenge mumubuulwileci. Ne pashiìshe mbyenze ànu bijika, yêyè kwalukila mu musoko wàbo ne kushààla mpaasàtà wa èkèleeziyà mu Efèso. Ne wàkafwa ne wàkajikiibwa mu Efèso, Yone wa Nzambì.

⁷⁹ Kaa, mmwènekelu kaayipu mpindyewu’s wè! Èyo, èkèleeziyà dìbà adi mu bukòòkeshi bwà Yone, anyì mu dikèngeshiibwa dinène, Yone ùdi ûfùnda mvensa wa 9:

Mêmè Yone, udi kàbìdì mwanèènù...mu dikèngeshi-...ne nyààneenù mu makèngeshiibwa, ne mu bukalenge ne mu lutùùlu lwà Yesù Kilistò, mwva nsanganyiibwa mu cisanga cìdì cibiìkidiibwa

*ne Paatèmò, bwà dîyì dyà Nzambì, ne bwà bujaadiki
bwà Yesù Kilstò.*

⁸⁰ Mu ngaakwilu mukwàbò, yéyè wàkangata Dîyì dyà Nzambì ne ùvwa ùDijaadika, ne Divwa n'Dîyì dyà Nzambì, ke Kilstò kwalukidila mu yéyè ne kujaadika ne yéyè ùvwa mu bulelèlè. S'ki bwalu mbwôbù abu. Dîyì dyà Nzambì munkaci mwà kumweneshiibwa munda mwèndè, dijaadika ne yéyè ùvwa musadidi wa Nzambì. Dîbà adi kabàvwaku mwà kuvila Aci to, ki kukengelabi bwà bôbò kumwambila ne yéyè "mmuloji." "Wàkakika màfutà ne kaàvwa mafwànyìne kumwenzela bwalu to, ne wàkakika bantu ne kabààkondapiibwa nànscha, ne yéyè ùvwa mutempi wa lubùku uvwa kàiyi mwà . . . Muntu kampànda wa mubì, nyumà mub- . . . nyumà wa cikisu." Nènku ki bwà cinyì bààkamwela pambelu apu, beela meeji ne ngwa njiwu bwà kwikalaye munkaci mwà kasùmbù kàà bantu kasungùlùke aku's. Kàdi yéyè ùvwa ànu mutüngùnuke ne diswà dyà Nzambì, ne Nzambì ùvwa ne kiipàcila mu ngiikadilu yônsò awu.

⁸¹ Kavwa mwà kukwàta nendè mudimu to, ne makèngeshiibwa ônsò awu ne bikwàbò, bwalu bansantu bavwa balwa ne: "Kaa, Mwanèètù Yone, netwènzè cinyì bwà *cikampànda*? Ne netwènzè cinyì?"

⁸² Yone ùvwa mupròfetà, tudi bamanye aci. Ne muvwabo beela nkondo eyi, ki Nzambì kwenza ànu ne Bukalenge bwalabàle bwà cyena Loomo bumwangate ne bumwele pambelu apu mu cisanga amu. Ki yéyè ne: "Mpindyewu, lwâku, Yone, ndi muswè nkuleeje cintu kampànda cììkalà mwà kwenzeka." Wa ndekeelu wa ku bapostòlò, kakùcìvwakù kàbidì mukwabo wa kuCifùnda to pa kuumusha Yone. Ki kumwelabo pambelu apu mu cisanga cyà Paatèmò kutwadijila panyimà pà lufù lwà Yesù ku cidimu cyà 95 too ne ku cidimu cyà 96 panyimà pà lufù lwà Yesù. Nènku yéyè KuWûfunda, ne kwambaye ne:

*Mêmè . . . ndi mwanèènù, nyààneenù mu
dikèngeshiibwa, . . .*

⁸³ Mpindyewu, yéyè kààkaakula bwà Dikènga Dinène to. Aci kacìvwa Dikènga Dinène to, ne kadyêna dìlwa kùdì Èkèleeziyà to. Dikènga Dinène nedilwe kùdì beena Yuda, kî nkùdì Èkèleeziyà to. Pa nànku kacìvwa Dikènga to, Dikènga Dinène adi.

⁸⁴ Mpindyewu mvensa wa 10:

*Mvwa mu Nyumà mu ditùkù dyà Mukalenge, ki mêmè
kuumvwa paanyimà pàànyì apu . . . dîyì, . . . dyà mpungi,*

Mvwa mu Nyumà mu ditùkù dyà Mukalenge, . . .

⁸⁵ Mpindyewu, kwêna mwà kwenza cintu cîmpè nànscha cìmwè paùdì kùyì mwanji kubwela mu Nyumà to; Nzambì kêna mwà kukwàta neebè mudimu to. Udi—udi—udi—udi . . . Diditàcisha dyèbè dyônsò dìdi—didi ànu mu cijèèngù paùdì kùyì mucyenze

mu Nyumà to. “Mêmè ngimba, nêngimbè mu Nyumà. Mêmè nsambila,” mwàkambà Pôlò, “nênsämbilè mu Nyumà.” Ne pashiìshe kwôkò cintu kampànda cìdi cìlwa kündì cyà címpè, bikèngela ciìkalè cimbuulwila kùdì Nyumà ne cishìndika kùdì Dìyì (cimwènèshìibwe ku bipeta bìdici cifila).

⁸⁶ Mpindyewu bu mûdì, mu ngaakwilu mukwàbò, mêmè mwambe ne, Yesù Kilistò wàkalaya mu Dìyì Dyèndè ne mêmè mwà kunyingalala, mubatiìjìlbwe mu Dínà dyà Yesù Kilistò, nêmpetè dipà dyà Nyumà Mwímpè. Cintu cyà kumpàla cyà mêmè kwenza nkunyingalala. Mbacimbuulwile ne mbulelèlè. Díbà adi ubàtijiibwè mu Dínà dyà Yesù Kilistò, díbà adi bipeta bìdi ne: Mêmè nêmpetè Nyumà Mwímpè.

⁸⁷ Piìkalabi ne ndi nsaama, ne Yéyè wàkalaya ne bu mêmè mwà kwitabuuja ne kulombaku bakùlù bàà èkèleeziyà bwà kundaababo maanyì, bansambidila, disambila dyà diitabuuja nedisùngile mubèèdì. “Mukalenge, ndi ngiitabuuja. Ndi ndonda mêtì Èbè à kulonda, mukùlù ànsambidile, andaabè maanyì.” Aci's ncikosè bwalu, tungunuka ànu cyanàànà, nkujike—nkujike menemene.

⁸⁸ “Kaa,” mûdì wamba, wêwè “kwena muumvwe dishìllangana to, nànsha nànnku.” Yesù kààkalediibwa, pààkaMushipa Nzambì kumpàla kwà difùka dyà dyulu ne buloba, pàvwaYe—pàvwaYe Mwânà wa mûkòòkò wà Nzambì, mushipa kumpàla kwà difùka dyà dyulu ne buloba to. Kàdi mu meeji à Nzambì Yéyè mwine, Yéyè ukaavwa mumane kwenza. Ne mêmè ncivwaku díbà adi to, anyì wêwè kuvwaku to; kàdi mu mukàndà wà Nzambì, piìkalabi ne ménà ètù avwamù, àvwa mateèkìibwemu kumpàla kwà difùka dyà dyulu ne buloba.

⁸⁹ Pàdì Nzambì wàmba cintu kampànda, cìdi ne cyà kwenzeka. Díbà adi panùdì nukuumba mishiñgà yà Nzambì, vùlukààyi ànu ne, Nzambì neàDimwènèshè ne neâtàngile bwalu bwà bikwàbò bìdì bishààla abi, tungunuka wêwè ànu ne kuya, mmudimu mumana kujikija. Kaa, aci kî ncilenga anyì? Kaa, ekèlekèlé, elanganaayibi meeji! Ambila ànu Nzambì...Ne Nzambì mmwambe ne: “Enza cikampànda, ne Nêngënzè cikansanga.” Èè, mêmè mukenze cikampànda, bikèngela Yéyè kwenza cikansanga.

⁹⁰ Mpindyewu, dyabùlu ùdi wàmba ne: “Wamònú’s, Yéyè’s ùdi unengesha.”

Aci kacyèna ne cìdici cishintulula to. Dànyèlè wàkasambilà musangu kampànda ne kupitaku matùkù makumi àbìdì ne dimwè kumpàla kwà Mwanjèlò kufikaye kudiye, kàdi kààkateketa mu mabòko nànsha, ùvwa mumanye ne Yéyè neàlwè nànsha byà munyì, ki kwindilaye ànu cyanàànà too ne pààkafikaYe kuntwaku. Ki mmwènenu nyéyè awu. Kaa, ki paùdì upeta diitabuuja mpôpò apu. Mpindyewu bìdi bikèngela bwà twêtù kuumuka mu cyôcì aci, tudi bafwànyìne kuditwa

lùkàsà mu disangisha dyà dyondopa, kî mmwômò anyì? Ncyà bushùwà. Èyowà, dyà diitabuuja's. Kàdi tudi bàswè disangisha dyà dyondopa dyà musùukà, bwà kwondopa cìdì munda, bwalu dyôdî adi ndìdì dinenga, udi upeta Mwoyi wà Cyendèlèlè. Mwoyi wà Cyendèlèlè kawùtu ujimina anyì ukulakaja nànsha, ùdi ushààla, ûshààla wà mwomùmwè.

⁹¹ Mpindyewu, yéyè wàkabwela mu Nyumà kumpàla kwà nî ncinyì kwenzekaci. Cintu cyà kumpàla cyàkenzaye, yéyè uvwa mu cisanga cìdì cibìikidiibwa ne Paatèmò (bintu byônsò byàkenzaye ebi), ke yéyè ne: “Mêmè kuumvwa Díyì,” ne bintu bikwàbò byônsò ebi. Kàdi kumpàla kwà nî ncinyì kwenzekaci, ûvwwa mu Nyumà. Nènku bu nwénù mwà kumònà aci mu Bible wenù, Nyumà ne dileetà dinène, Nyumà Mwîmpè's. Amen! Yéyè wàkabwela mu Nyumà. Kaa, ndi ngeela ànu meeji ne abi's mbilenga byà dikema:

Mwva mu Nyumà mu ditùkù dyà Mukalenge, . . .

⁹² Mu ditùkù kaayi? Ditùkù dyà Mukalenge. Mpindyewu, kùdi dikòkàngana dinène. Twànjààyi ànu kutuuyishaku cilunji, bwà katancì kakesè cyanàànà.

⁹³ Mpindyewu, bu mutwàmbì mu dìndà emu ne, bamwè mbambe ne dibuulula, dyà Maatààyì Munsantu 17, dìvwa “Peetèlo.” Èkèleeziyà wa Kàtòlikè wàkamba ne: “Yéyè wàkiabikila Èkèleeziyà Wendè pa Peetèlo; yéyè nguvwa paapà wa kumpàla.” Mmunyì mùvwàye mufwànyine kwikalà paapà kàdi muselangane? Nwamònù anyì? Ki yéyè ne: “Peetèlo wàkaya ku Loomo, wàkajiikiibwa kwàka.” Pashìishe ngambilaayi mwaba ùmwèpelè, mu maalu-malonda anyì mwaba kanà wônsò, ûvwaku Peetèlo kacya muye ku Loomo. Nwamònù anyì? Pòlò wàkayaku, kàdi kî m'Peetèlo to. Èyo.

⁹⁴ Pa nànkú tudi tusangana ne tusùmbù twônsò etu ne bikwàbò, bikaadi ànu bidifindemu. Nwamònù anyì? Kàdi, ne bantu leelù ewu bàdi . . . kwônsò kûyaayà, bàdi . . . Èkèleeziyà munène kampànda ùdi ne musonso kampànda ûvwà mu cyanza Cyèndè awu. Nudi bamanye ne mmisonso bûngì kaayi yìdibo naayi, misonso myena diìnà eyi, leelù ewu yìvwa mu . . . ? Dikumi ne citèèmà. Bàdi ne mifùba, bàdi ne—bàdi ne tupese twà mìzàbì, nènku yìdibo balenga ne bambula mu byanza. Nènku katwèna—katwèna ne bintu abi to, katwèna naabi dijinga to. Kilistò ùdi ne mwoyi! Yéyè ùdi munda mwètù, kî mmusonso kampànda to, anyì kapese kàà nkûruse, anyì kapese kàà mufùba, anyì cintu kampànda nànsha. Yéyè ùdi Nzambì udi ne mwoyi, mwikâle ne mwoyi munda mwètù mpindyewu, ùDimwènesha Yéyè mwine. Tudi ne kantu kàmwèpelè kàà civùlukilu, s'ke Didyà dyà mèèsà à Mukalenge, bu civùlukilu cyà lufù Lwèndè. Kàdi bwà Kilistò Yéyè mwine, Ùdi neetù ne munda mwètù mene. Nènku s'ki cintu citùdì bàswè kuleeja (butùmbi bwà Nyumà Mwîmpè) kùdi bàà pa buloba. KuMuleeja too ne pàdì Bukénkè bùya. Èyo.

⁹⁵ Mpindyewu, kùdì... Pa nànkú, nudi numòna's, twêtù kwangata luseke lukwàbò lwà njila alu. Nudi bamanye ne ntù misangu yônsò ànu nteeta kwikala eci, ne Mukalenge wetù ùtu misangu yônsò mucìmbuwlile; kùdi luseke lùmwè luya ne mwà nàka, ne lukwàbò luseke luya ne mwà nàka, kàdì ànu lwà munkacìnkaci mwà njila amu's ke mùdì Bulelèlè. Nukaavwaku bamònè Yeshààyì, mwaba ùdi Ye mwambe ne nekwikale cibeeba anyì? Yeshààyì 35. Nènku nudi bavùlùke mùvvwà bânà bëtù bàà mushinga mukolè ba-Nazarées ne ciibidilu cyà kwimba musambu awu, nudi bamanye's, "Cibeeba cyà Cijila. Cibeeba cyà Cijila." Mpindyewu, bu nwènù mwà kubala Bible wenù bîmpè, kî mmwambe ne "cibeeba cyà cijila to." Mbambe ne: "Nekwikale cibeeba ne *njila*, ne nebàmubìikile," kî nne ncibeeba cyà cijila to, kàdì "*njila wa cijila*." Ne mmuwangaji ùdi ùjikija cyambilu cyèbè aci. Nwamònù anyì? "Necìkale cibeeba *ne njila*, ne nebàmubìikile *ne njila wa cijila*," kî ncibeeba cyà cijila to.

⁹⁶ Nwamònù's, njila ùtu wibakiibwa, *njila kampàndà*... Njila mwîmpè ùtu wibakiibwa, citùpà cyà citambe kutumbuka cìtu munkacìnkaci, bwalu bìdi bìkoka bùcyafu bwônsò ku nseke yônsò yìbìdì. Ki cyòcì aci. Pàdì muntu ulwa bulelèlè kùdì Kilistò, ùdi ne mêsù èndè mabangameena pa Kilistò. Yéyè mwikale ndambù ne disaluka, neìkale mukoleshì wa maalu. Yéyè mwikale ndambù ne mashika, neàdisangane ku luseke lukwàbò elu ne kwikala ànu cipèndànsupù cyètu eci, lwàlwa luseke; nwamònù's, byèndè byà mu mutù abi. Kàdì cintu cyà mushinga cìdi ànu munkacìnkaci mwà njila amu, ne Nyumà mukumbane munda mwèbè, ùkulama ne luuya ne ku mudimu. Amen! Ne mwikàle mumanye bikumbane mwà kwikala mudilame mu dikòòkela dyà Nyumà, bwà kutentemuka ànu mùdì Nyumà wenda uya amu; kî nkumudyànjidila anyi kushààdila paanyimà to, ànu mùdì Nyumà utentemuka amu.

⁹⁷ Èkèleeziyà wa Kàtòlikè mmwambe ne: "Dibuulula adi divwa m'Peetèlo."

Èkèleeziyà wa Mishòonyì mmwambe ne: "Ùvwa n'Kilistò."

Kàdi Bible ùdi ùlongesha ne: "Civwa n'Dibuulula dyàkapèèshà Ye (Nzambì mumupèèsha's) dyà Kilistò."

"Wêwè udi Kilistò, Mwâñà wa Nzambì udi ne mwoyi."

"Udi mubènèshìibwe wêwè Simona, mwâñà wa Yona, kî mmusunya ne mashi bìdì bikubuwlile eci to, muntu nànscha umwe, seminérè nànscha umwe, anyì cisòmbedi cyà badyàmbike balùme nànscha cìmwè, cintu nànscha cìmwè, kî ncikulongèsheCì to. Kàdì Taatù Wanyì udi mu dyulu ngudi mukubuwlileci. Wêwè udi Peetèlo, pa lubwebhe elu Néngiùbakilepu Èkèleeziyà Wanyì, ne biibi byà iferno kabyèna mwà kuMutàmba bukolè to."

⁹⁸ Mpindyewu tudi tukafika mwaba mukwàbò apa ùdibo ne mmwènenu yìbìdì. Mpindyewu, ndi mwà kwikala mutùpàkane; byòbì nànkú, Nzambì àmfwileku luse. Kàdì nêmbenganganè

ne ba-Adventistes du Septième jour bâdi bàmba ne: "Divwa nditùkù dyà mwandamutekète divwayemù adi, ditùkù dyà Mukalenge adi." Bânà bèètù bàà ba-Adventistes du Septième jour, ne bààbûngì bàà kùdibo, bâdi bàmba ne cìvwa nditùkù dyà nsabatu dyàkabììkilaye ne ditùkù dyà Mukalenge. Èkèleeyiyà wa beena Kilistò ùdi ùdibììkila, ditùkù dyà Mukalenge adi ne: "Dyà—dyàlumingu, ditùkù dyà kumpàla." Nènku tudi tumònà misangu yàbûngì ne—ne èkèleeyiyà wa beena Kilistò, leelù ewu, beena Mishòonyì abu, bâdi baleedilakù bu "Ditùkù dyà Mukalenge, dyàlumingu's." Aci kacyèna mu mifùndu to. Dyàlumingu dìvwa ditùkù dyà kumpàla dyà lumingu mu Bible, kî nditùkù dyà Mukalenge to. Nènku kadìvwa ditùkù dyà mwandamutekète, dyà nsabatu to. Kî mbifwanyine kwikaladi dimwè dyà ku matùkù awu to bwalu byàkangata Yone bidimu bibìdì bwà kufunda Dibuulula. Divwa nditùkù kaayi adi's? Nkufwànyìne kwikala matùkù à mwandamutekète awu bûngì cyanàànà ne matùkù à kumpàla mu cikondo aci's.

⁹⁹ Bible, Dibuulula adi dyàkafùndiibwa mu cidimu cyà 95 panyimà pàà lufù lwà Yesù too ne ku 96, bidimu bìbìdì. Dìvwa nditùkù dyà Mukalenge. Ditùkù dyà Mukalenge dìdi menemene ànu cìdìdi dyamba aci, nènku's ki cìvwàdi. Yone wàkangaciibwa mu Nyumà mu ditùkù dyà Mukalenge. Edi nditùkù dyà muntu, kàdi ditùkù dyà Mukalenge nedìlwe. Patùdì tulondesha Mifùndu netùjandule ne yéyè ùvwa mu ditùkù dyà Mukalenge, mwambwibwe mu Nyumà ne mwangaciibwe mu ditùkù dyà Mukalenge. Amen! Ncyà bushùwà. Nwamònù's, yéyè ùvwa mu ditùkù dyà Mukalenge. Bible ùdi wàkula bwà ditùkù dyà Mukalenge. Tudi tufikaku mu katancì kakesè emu, ne Mifùndu yàbûngì.

¹⁰⁰ Cintu cyà kumpàla, ditùkù dyù nsabatu, mutùdì twakula bwàdì, ditùkù dyà nsabatu kî nkulama ditùkù kampànda to. Katwèna ne mukenji bwà kulama diisambòmbò bu nsabatu to. Katwèna ne mukenji wà kulama ditùkù dyà kumpàla bu nsabatu to, mu Dipungila Dipyadipyà. Bible mmwambe, mu Ebèlu nshapità mwi4 ne: "Bu Yesù mwà kwikala mubàpèèshe diikisha, Kavwa mwà kwikala mwakule paanyimà bwà ditùkù dikwàbò nànsha." Ncyà bushùwà. Kàdi kùcidi kushààle diikisha, anyì dilama dyà nsabatu, bwà cisàmbà cyà Nzambì. Bwalu twêtù bâdi biitabùùje, kàbìdì, tudi babwèle mu diikisha Dyèndè; tudi tujikija midimu yéti bu mwàkajikijà Nzambì Yèndè.

¹⁰¹ Tàngilààyi's wè! Kaa! Mukalenge àtumbe. Ndi mubange kudyumvwa ànu bìmpè be, ndi nya mutangile kumpàla mêmè mwine.

¹⁰² Mònaayi, mu ditùkù dyà nsabatu. Nzambì wàkafùka buloba mu matùkù àsambòmbò, ne ditùkù dyà mwandamutekète Wàkabwela mu diikisha ne kààkapinganaku kàbìdì bwà kufwìmba buloba nànsha. Pashiishe kucipèèsha Ye bantu bu civùlukilu. Bwalu kanwèna mwà kucìlama mpindyewu to, bwalu

panùdì nulama nsabatu kunweku apu, luseke lukwàbò lwà buloba lùdi cyàkàbìdì mu dyàlumingu. Nwamònú anyì? Pa nànkú civwa cileeja ne civwa bwà cisàmbà kampànda, cipòolo ne cikondo bwà Izàlèèlè. Kàdi díbà adi kùcidi kushààle dilama dyà nsabatu bwà cisàmbà cyà Nzambi.

Bwalu twêtù bâdì...bâàkii tabuuja bwà kubwela mu diikisha Dyèndè,...nànscha mùvvwà byenzedi... (Ndi munkaci mwa kutèèla Ebèlu, nshapità mwi4)...nànscha mùkaavwà midimu mijikè kacya ku difùkà dyà dyulu ne buloba.

Bwalu yéyè wàkaakula mu mwaba kampànda...mu ngaakwili ewu,...ditùkù dyà mwandamutekète...

Nènku kàbìdì, yéyè wàkakosa ditùkù kampànda, wàmba mu Davìdì,...(nwènù bâdì bafunda, Ebèlu 4)

Kàbìdì, yéyè wàkatèèka ditùkù kampànda, wàmba mu Davìdì ne, Leelù ewu, paanyimà pàà ntàntà mule; mùdìbi byumvwika ne, Paùdì umvwa...anyì mwambe ne: Paùdì umvwa dîyì dyèndè, kupapishi mwoyi wèbè to.

Bwalu bu Yesù mwà kwikala mubàpèèshe diikisha adi, (ditùkù)...yéyè kavwa kwikala mwakule pashiishe bwà ditùkù dikwàbò to.

Kàdi kùcidi kushààle...diikisha (anyì dilama dyà nsabatu)...

¹⁰³ Mwaku ewu “diikisha.” Nsabatu mmwaku wa pabwawu kutùdi, üdi ùmvwija ne “diikisha.” Mmwaku wà cyena Ebèlu üdi ùswa kwamba ne ditùkù dyà “diikisha”, ditùkù dyà nsabatu; kwenji mudimu to, ikìsha.

Bwalu bu Yesù mwà kwikala mubàpèèshe diikisha,...yéyè kàvwakù mufwinyine...kwikala mwakule bwà ditùkù dikwàbò to.

Kàdi kùcidi kushààle...diikisha (anyì dilama dyà nsabatu) kùdì cisàmbà cyà Nzambi.

Bwalu twêtù bâdì babwele mu diikisha dyèndè abu,...tudi twikisha ku...midimu yêtù, bu mwàkikishà Nzambi ku yèndè amu.

¹⁰⁴ Katwénaku tukupingana mu ditùkù dyà lumingu dìdì dilonda bwà kudibangulula kàbìdì to, tukaadi babwele mu Diikisha. Pàvwa Yesù wàkula pa masànkà, Wàkamba ne: “Nwakuumvwa bàà kale bàmبا ne: ‘Kushipyanganyi.’ Mêmè ndi nnwambila ne, ewu yônsò, udi ukwacila mwanaàabò ciiji kakuyi bwalu to, ukaadi mumane kumushipa. Nwakuumvwa bàmبا, kùdi bàà kale abu ne: ‘Kwendi masandi.’ Aci’s mmukenji. Kàdi Mêmè ndi nnwambila ne, ewu yônsò ukaatangidi mukàjì bwà kumwalakana wàmanyi kwenda nendè masandi munda mwà mwoyi wèndè.” Mmwômò anyì?

¹⁰⁵ Pa nànku bintu byônsò ebi bivwa mbivùlukilu, ànu bimanyinu patupu, maalu à kukema, bindile cikondo cilelèlè cìvwà cìlwa. Mpindyewu, pàkajikijà Yesù cyôci aci, Maataàyì 11, (masànkà), Wàkamba ne:

Lwâyi kûNdi, nwénù bônsò bàdì bâkwàta mudimu mukolè, bacyòke, ne bambule majitu makolè, nènku Mêmè nênnùpèèshè diikisha dyà misùùkà yènù.

Ambulaayi cikookedi cyànyì pa mêmè, ne nungeyèmène; bwalu Même ndi mupole ne mupwekele... (mmwômò anyì?)

Lwâyi kündì, nwénù bônsò bàdì bâkwàta mudimu mukolè ne... bambule majitu makolè, ne mêmè nênnùpèèshè diikisha dyà musùùkà wènù. (“Pawikala mukwâte mudimu ditükù dìmwè, matükù dikumi, bidimu bitaanu, bidimu makumi àsàtu ne bitaanu, bidimu makumi ataanu, bidimu makumi citèèmà, ne ukaadi mucyòke ne muzengele, Iwâku kûNdi, Nênkupèèshè Diikisha. Nênguumushe bujitu bwônsò bwà mpèkaatù abu pa wêwè, ne kubwela munda mwèbè, ne kukupa diikisha dipwàngànè ne disankishiibwa.”)

¹⁰⁶ Mpindyewu, diikisha adi ncinyì? Twanjìbi—twanjìbi kutangila eci kakesè, tumònè ne bwalu bùdi cinyì. Bâmwè bàà kùdibo bàdì bàmba ne: “Môna’s, nda ukashâàle wa mu èkèleeziyà.” To! “Fundà dînà dyèbè mu mukàndà.” To! “Èè, dibatiiza dyà mu mâyì dyà mùshindù kampànda.” To! Twanjìbi ànu kubútàngila bwà kumònà ne bwalu bùdi cinyì. Nudiku bàswè kwenza aci mwab’ewu mene patùdì bindile apa anyì? Netùmònè kwâkaya Yone. Mmu ditükù dyà mùshindù kaayi mwàkayàye?

¹⁰⁷ Pààkafwà Yesù pa buloba apa, ne mudimu Wèndè kujikawù, Yéyè wàkabwela mu mwaba kampànda.

¹⁰⁸ Mpindyewu twàlukilààyi ku Yeshààyì nshapítà wa 28, ku mvensa wa 8. Ngeela meeji ne mmwômò, mpindyewu, Yeshààyì 28:8. Nènku túbalààyi, Yeshààyì 28, mupròfetà mwikâle wàkula bidimu nkàmà mwandamutekête ne dikumi ne bibidì kumpàla kwà kwenzekaci. Mpindyewu, mbanganyì bàdiku baswè kumanya cìdi nsabatu mulelèlè, cìdi diikisha dilelèlè? S’ki cyôci eci. Mpindyewu, mwaba wùdì mu pròfetà mucyàmbè ngwôwò ewu, nènku mêmè nênnùleejè mwaba wàkenzekaci. Tàngilààyi, Yeshààyì 28:8:

Bwalu bônsò... (mupòfetà wàmba cipròfetà cyà matükù aa)

Bwalu mèèsà ônsò mmûle tènte ne bilushì ne bukooya, (bantu bangata mèèsà à Mukalenge, biikale banwa mfwankà ne maala ne bàshima ne biibà)... mu mùshindù wà ne kakwèna mwaba mukezuke to.

Nganyì wâlongeshayè dimanya? . . .

Nganyì ûdì mwà kulongesha dimanya leelù ewu's?

¹⁰⁹ Mbanganyì bavwa bumvwé Billy Graham leelù ewu? Cìvwa diyiisha dilenga divwaye muysihe pa ne, mmunyì mùdì bantu mwà kwitabuuja dishima ne kutungunuka ànu mu dishima adi ne—ne kudìbingisha mene ne beela meeji ne bavwa benza cìvwa cijaalame. Bantu bàà beena Àmèrikè bàngata, mwàkambayè, bàmba ne: “Kasengulu kàà muntu wa lungenyi, ne mucì wa mfwanka wà munù wa mfwanka,” biìtaba dìmwè dyà ku mashimi à dyabùlù, kàdi pamutù pàà kumuvwija mukutakane, cyônsò cìdìye aci, bwà kunwa cintu bu nànku kàdi kuteeta kumuvwija muntu wa lungenyi. Yéyè's mmupâle ànu bwà kumunwa aku, pàdì... pàdiye mûle tènte ne lufù ne kansérè ne bikwàbò byônsò, kàdi úcidi ànu umupwita umubweja mu bisùlusulu byèndè amu. S'mmukùtakane. Kî—kî—kasengulu kàà muntu wa lungenyi to, ne cintu bu nànku kacìtuku to. Muntu wa lungenyi kàtu ulenga cintakanyi aci to.

¹¹⁰ “Kakùyi Oertel 92, s'ndufù,” anyì cintu bu nànku. Pambelu pàà Kilistò kakwéna Mwoyi nànsha wà kânà to, s'ki Mwoyi mulelèlà wà cyà bushùwà ngwôwò awu. Cìdi cìfikisha balùme ne bakàjì ku dinwa cintakanyi aci ncinyi? Mbwalu bàdi bateeta kusankisha nyòota yìdì munda amu yìvwa Nzambì mutèèkemu ayi bwà kwikala ne nyòota Yèndè, kàdi bàdi bateeta bwà kuyìsankisha ne maalu à pa buloba. Nènku ki bwà cinyì tudi ne bintu abi. Ki bwà cinyi bantu bàtu benza maalu mùshindù awu, bwalu bàdi bateeta kumana nyòota yìdì munda mwàbò bwà Nzambì ayi, nènku dyabùlu ûdì ùbapa lufù pamutù pàà Mwoyi.

...mèèsà ônsò mmûle tèntè ne bilùshì... . . .

¹¹¹ Balombodi bàà èkèleziyà, bikwàbò byônsò, bàdi bààkula bwàcì ne: “S’ mbîmpè bwà kupicishaku ànu dìbà dilenga ndambu.” Cintu bu nànku kacìtuku to!

Nganyì wâlongeshaye dimanya? ne nkùdì nganyì kwíkalayè mwà kwenza... kuumvwija dilongesha? kùdì aba bácidì bafúmina ku dilekela dyamwa mabèèle, ne bafúmina ku dyumuka ku mabèèle. (Mpindyewu katucyèna kàbìdì bâñà bàà mu mabòko to.)

Bwalu bìdi ne cyà kwikala kanungu pa kanungu, kanungu pa kanungu; kalongo pa kalongo, kalongo pa kalongo; ndambù apa, ne ndambù pàpa:

Bwalu ku mishiku yìdì yìkukuminà ne mu myakulu mikwàbò nkùkwilaye ne cisàmbà eci.

Cyakambilaye ne: Edi s'ki... (cinyì? dilama dyà nsabatu!)... diikisha munùdì mwà kufikisha bazengele... (“Lwâyi kûNdi nwénù bônsò bàdi bazengele ne bambule majitu makolè.”) . . . mwà

kufikisha bazengele bwà kwikisha; nènku eci's ki cyashima: nànsha nàndu kabààkaswa kutèèleja nànsha.

¹¹² Aci cyàkenzekà dîbà kaayi? Bidimu nkàmà mwandamutekète ne dikumi ne bìbìdì paanyimà pààkashikama mishiku yìvwa yìkùkumina pa bantu mu Ditùkù dyà Mpenta ne bônsò bààkuujiibwa tèntè ne Nyumà Mwîmpè ne kubangabo kwakula mu myakulu mikwàbò ne, Nyumà Mwîmpè kwangataye myoyi yabo ku bokòòkeshi, ne kulekelabo bintu byà pa buloba abi. Pashiishe kubwelabò mu Diikisha ne Kilistò. Pôlò wàkamba, mu Ebèlu nshapità mwi4 ne: "Twêtù bâdì babwèle mu diikisha Dyèndè tûkaadi bamane kulekela byenzedi byônsò byà pa buloba bu mwàkenzà Nzambì mu ditùkù dyà bufùki Bwèndè, Yéyè wàkabwela mu diikisha Dyèndè, ne twêtù tudi tubwelamu Nendè paanyimà pàà byenzedi byètù byà pa buloba bimane kujika." Ke Nsabatu webè wa cyà bushùwà, ne mulelèlà nyêyè awu's.

¹¹³ Pa nàndu Pôlò wàkambwibwa ne wàkabwela mu Nyumà wa Nsabatu awu, ne wàkatùntumunyibwa kùdì Nyumà Mwîmpè too ne mu ditùkù dyà Mukalenga.

¹¹⁴ Tudi ne mvitâ bwà cinyì? Tudi ne ndululu bwà cinyì? Ditùnga dìdi dilwishangana ne ditùnga bwà cinyi? Yesù wàkalwa, Mfùmù wa Mwoyi, ne bààkaMushebeya.

¹¹⁵ Mu mbingu mikesè emu, anyì mene ànu mpindyewu, nekwìkale milongo yà ngulungu ne Baataatù Noël ne-ne tungonga twà tudila ne bintu byà mìshindù yônsò bilembeleja, biine abi s'mmushìngà wà cimpàngaanu. Ncintu cyà èkèleeziyà wa Kàtòlikè. Bantu biikale bafuta mishinga minène ne bâshintakajilangana matabishi ne bintu byà mùshindù awu, s'mbumpàngaanu! Noël's nditùkù dyà dikuukwila.

¹¹⁶ Nenku byôbì mene, Kilistò kààkalediibwa mu ditùkù dyà makumi àbìdì ne dîtaanu dyà ngondo wa ciswa-munène to. Kabìvwa mwà kwikalala nàndu to. Bu nwènù bafwànyìne kwikalala mu Yùdaaya, tukùnà ntûlé tèntè ne nêjè, bibì bitambe ne mùdìbi kunweku eku. Mulela mu ngondo wa cisanga nkàsu pàdì bufùki bwônsò butoloka.

¹¹⁷ Mpindyewu, kàdi's ncilèlè cyàbo bôbò. Kàdi bwà cinyì—bwà cinyì tudi twenza bintu abi's? Bwalu tudi tulonda bilèlè byà bantu pamutù pàà mikensi yà Nzambì. Bôbò... Cintu bu nàndu kí ncifwànyìneku kwikalala ne bwalu to, kàdi mbadivwije ànu ditùkù dyà bungèndààmushìngà cyanàànà's. S'mbundu be, bundu bwàbù bôbò bwà kwenza bintu byà mùshindù awu. Mushìngà wà cimpàngaanu's wè! Ndîbà kaayi dikaatuku Taatù Noël ne cyà dyenza ne Yesù? Ndîbà kaayi dikaadiku kalulu kàà Paasàkà anyi nzòolo anyi...kafiita mpencì wa diikala dyà mùshindù kampànda anyì cikampànda, anyi kàlulù kakesè kàà mùshindù kampànda katòòke kiikaleku

ne dipetangana kampànda ne dibìkà dyà ku lufù dyà Yesù Kilistò? Kanwenaayiku numònà mùdì bangèndààmùshingà . . . ?

¹¹⁸ Ki bwà cinyì bâdi bàsùmbisha mikàndà yà kale yà bìdùndadùnda eyi, ne fòtô yà manyaanu, ne yà bushààdile, ne bintu byà mûshindù awu, mbwalu ngiikadilu wa bantu ùdi ùjinga bikolè bintu byà lukutukutu bu nànkú awu. Mbwalu kùdi cintu cìdì kaciyi mu cyôcì mu mwoyi, kacya kabàtukù babwele mu Diikisha adi ne Nzambì ne biikishe ku bintu ebi to. Pàdibo babwela mu cyôcì aci ne bapeta Nyumà Mwîmpè, dîbà adi kwàbò nkujike ne maalu à pa buloba ne bintu byà pa buloba.

¹¹⁹ Nzambì kumutùntumunaye. Kaa, mpindyewu, ncyéna ngeela meeji ne wàkangaciibwa bu Pôlò nànsha, mubande mu dyulu dîsààtu ne mumònà bintu. Èyo, Nyumà Mwîmpè wa mushinga mukolè awu wàkenza kukaadi ndambù wa mbingu, mwaba ewu, tumònebi's . . . Mu ngaakwilu mukwàbò, Mvwa ne bwôwà bwà lufù, ki Nyumà Mwîmpè kungangata e kundeeja ne civwalù. Nukaadi bûmvwe bujaadíki abu. Pashiìs pangààkalukila ne: "Dîbà adi, lufù, kalonda kèèbè kàdi penyì?" Mutùntumuna bwà kumònà ànu civwa dyàmwamwa dyà rìdô. Wàkangaaluja bwà kunwambila ne dyàmwamwa adi katwàkwikalà mikishi ne nyumà to, tudi bantu balùme ne bakàjì, nsonga, katùyi tufwà, katùyi tusaama, ànu dyàmwamwa dyà cilùlù cikudika aci. Lufù kalwèna ne cîngà cyà kukwenzela to ànu kukupulumuna ne mu Mwaba awu.

¹²⁰ Mpindyewu, Yone wàkatùntumuniibwa mu cisanga cyà Paatémò aci, mu Nyumà, too ne mu ditùkù dyà Mukalenge. Edi nditùkù dyà bantu, bantu bâdi bàlwangana mvità, kàdi ditùkù dyà Mukalenge nedilwe pìikala makalenge aa mwà kuvwijiibwa makalenge à Mukalenge wetù ne à Kilistò Wendè, pashiìs nekulwe Bukalenge bunène bwà bidimu cinunu. Ditùkù dyà Mukalenge, ditùkù dyà dilwa Dyèndè, cilumbulwidi Cyèndè, ki cìikàla ditùkù dyà Mukalenge adi.

¹²¹ Edi nditùkù dyà bantu, ki bwà cinyì bâdi banùdyula ne banwenzela bìdîbo baswe kwenza abi, kàdi nekùlwè cikondo . . . Bâkubìikila . . . bâdi bâkubìikila mpindyewu ne, "monsantu mubunguluki wa mu malaba ne mukoleshi wa maalu," kàdi kulwalwa cikondo, nwamònù's, cììkalàbo kabàyi mwà kwenza nànkú to. Nebeele mbila batwa mikemu ne bapona ku makàsà èbè. Bible mmwambe, mu Maalàki 4 ne, nenwèndele mene nè pa butù paanyimà pàà bôbò bamane kwoshiibwa; kabwàkubashìila nànsha muji anyì ditàmbà to. Ki cyôcì aci menemene cìdì Bible wàamba ne: "Baakane nebendelè pa butù bwà beena lwonji." Ncyà bushùwà menemene. Kakwàkubashààdila muji anyì ditàmbà to, cintu nànsha cîmwè cyà kwalukidilapu. Kwàbù nekwìkale kujike. Mpindyewu edi nditùkù dyà muntu (midimu yà muntu, byenzedi byà muntu, èkèleeziyà wa muntu, mmwènenu yà muntu), kàdi ditùkù dyà Mukalenge dilwalwà.

¹²² Mpindyewu, yêyè ùvwa mu Nyumà mu ditùkù dyà Mukalenge. Èyo, nènku cintu cyà kumpàla cyàkuumvwaye pàvwaye mu Nyumà mu ditùkù dyà Mukalenge... Mpindyewu tudi ku mvensa wa 10:

...mu Nyumà mu ditùkù dyà Mukalenge, ki yêyè kuumvwa...diyì, bu...mpungi,

¹²³ Mpindyewu, katupicishiku lusumwinu nànsha lùmwè to. Byôbi bìkèngela bwà twêtù kulwàngata mààlabà, tudi mwà kucimònna, nwamònú's. Muntu kampànda wàtàngilaku dìbà, bwà ncilù kujikija pashìishe nànsha.

¹²⁴ Èyo, mpindyewu: "...ùvwa mu Nyumà mu ditùkù dyà Mukalenge." Mpindyewu vùlukààyi ne, cintu cyà kumpàla cìdì cikèngela bwà wêwè kwenza ncinyì? Kubwela mu Nyumà. Mmunyi mwikalala mabuulula aa mwà kulwa kunùdì? Bwelaayi mu Nyumà. Mmunyi munwàpeta Nyumà Mwímpè? Bwelaayi mu Nyumà. Bwelaayi mu Nyumà!

¹²⁵ Paùvwa ngènzàmpèkààtù ne uya ku dija dyà maja, s'uvwa ubwela mu nyumà *awu*. Kaa, ekèlekèle, s'uvwa utwadija kutuuta bikàshì ne utuuta makàsà pansi, ne udyela udyàkidila, ne wela cifulu cyèbè pansi apu, ne unyunguluka eku ne eku, wenza maalu à lukutukutu's. S'uvwa mu nyumà waci. Nudiku mwà kudìfwànyìkijila muntu wetù ewu, munangi wa maja wa kalàndààmùsèngà, uya ku dija dyà maja, wàmba ne: "Èè, nènku's nudi bônsò nupicila mu cikondo címpè be, ngeela meeji's."

"Kaa!" mudibo bafwànyìne kwamba. "Wêwè kuyi muswè kuja to, pàtukà mwab'ewu!" Nwamònú anyì?

¹²⁶ Ndabi ku dinaya dyà ndundu, muntu kampànda àdìdìngébi òbeshè, anyì cintu kampànda cikwàbò, wêwè kushààla musòmbe mutàngile, kàdi kwamba ne: "Èè, ngeela meeji ne abi's mbímpè be." To, kwêna mufwànyìne kwikala munangi wa ndundu to, kwêna mufwànyìne kwikala wa cyà bushùwà... kwêna mufwànyìne kwikala mu nyumà wa ndundu to. Pàdì ànu muntu wòbesha, udi ulandapuka kàdi kwela cibingu ne: "Yoyòyò! Ekèlekélée! Twòbèshi's wè!" Ubakula cifulu cyà muntu kampànda ku mutù kwèndè aku mùshindù *ewu*, kakùyi muntu nànsha umwe ùkwela diyì to.

¹²⁷ Dìbà adi mu èkèleziyà paùdì ubwela mu Nyumà, ùjuuka wèla lubìlà ne: "Butùmbi's wè! Àlèluuyàh! Mukalenge atumbe's wè!"

Muntu kampànda ukudimuka, wàmba ne: "Munsantu mubunguluki wa mu malaba." (Kaa, Mwanèètù Wood...)

¹²⁸ Nênnweleku lukonko. Patwìkale bansantu babunguluki bàà mu malaba ne mbwalu tudi twenza nànkú, dìbà adi bôbò abu's mbabunguluki bàà mu malaba *bakooyike* mwab'awu. Mbipiciibwe ne mêmè mwikalala munsantu mubunguluki wa mu malaba (Ki mmwômò anyì?) pamutu pàà kwikala muntu

mukooyike's. Ekèlekèle! Cyà bushùwà's! Babunguluki bàà mu malaba bakooyike abu.

¹²⁹ Mpindyewu, yéyè ùwwa mu Nyumà. Ükaavwa mubwele mu Nyumà, díbà adi maalu àdi abanga kwenzeka. Ne pashiìshe mmwenze ànu ubwelamu, kuumvwaye mpungi. Mpindyewu, mpungi ùtu misangu yônsò ànu ûmanyisha dissemena dyà cintu kampànda. Byenze bu panudi nulwa... Mfùmù kampànda—kampànda wenda useemena, nebadidishe mpungi. Pààseemena Yesù, Yéyè neàdidishe mpungi. Ncyà bushùwà anyi? Pàvvà Yòzefù upatuka, bàwwa badidisha mpungi. Nènku mpindyewu cintu kampànda cidi munkaci mwà kulwa kumpàla eku, Yone kubwela mu Nyumà ne kuumvwaye mpungi. Kuumvwaye mpungi, ki kukudimukaye bwà kutangila civwa paanyimà pendè pààkuumvwaye mpungi awu; paanyimà pàà yéyè mumane kubwela mu Nyumà.

¹³⁰ Pàmwàpa ùwwa munkaci mwà kuja maja, ùtùpika, unyeemakanangana eku ne eku kwà cisanga cyônsò aci aku. Ùwwa munkaci mwà kupicila mu cikondo címpè, ùwwa mu Nyumà. Pa nànku, ki yéyè... Aci cidi mwà kuumvwika cyà cinyangakaja cijila, kàdi ncyéna ncyàmba mu mùshindù awu to, nwamònou's. Ùwwa mwà! Aci's cidi... èè, yéyè's uvwa mufwanyine kwikalà wenza nànku. Ngeela meeji ne ùwwa munkaci mwà kupicila mu cikondo címpè mu Nyumà, ànu ùtùmbisha Nzambì, bwalu aci's ke cyàkenzeka menemene pààkabatùùlukila Nyumà bwà musangu wa kumpàla. Pààkabapwekela Nyumà Mwímpè, bààkatetuka bu balùme ne bakajì bakwàcike maala, ne kwenzabo maalu bu bakwàcike, ne bakukumina. Nènku kubiìkil-... bâitungunuka ànu nànku awu mu mùshindù wà ne bantu bààkamba ne: "Bantu aba mbûle ne mvinyo mupyamùipyà." Mùshindù awu ngwàkenzabo musangu wà kumpàla, pa nànku Nyumà kulwa cyàkàbìdì, pàmwàpa ùwwa mwenze mùshindù ùmwèùmwè awu. Nwamònou anyi? Kakwèna cintu cipyacipyà pa bwalu ebu—ebu to, eci nntèndeleelu *wa kale*. Èyowà.

¹³¹ "Mu Nyumà mu ditùkù dyà Mukalenge." Mpindyewu, tudi tucyùmvwa. Mpindyewu ncinyì? Mpindyewu, civwaye wènza ncinyì? Yéyè wàkatuntumunyìibwa mu cisanga amu mpindyewu, mu Nyumà, too ne mu ditùkù dyà Mukalenge òò. Nènku mmwenze ànu ubwela mu ditùkù dyà Mukalenge anyì, kuumvwaye mpungi. Ncinyì ciine aci? M'Muntu kampànda wenda useemena. Munène kampànda munkaci mwà kuseemena. Mpungi udila, Kampànda nyéyè awu ulwa! Kutàngilaye! Alèluuyàh! Mpungi:

*Wàmba ne: Mémè ndi Alpha ne Omega, wa kumpàla
ne wa ndekeelu:... (kabiyyì dimanyisha dyà muntu
mwibìdì anyi muntu mwisàtù to, kàdi Muntu umwèpelè
awu)... Ndi byônsò bìbìdì Alpha ne Omega,...*

(“Bangabanga ne Mêmè kukuleeja ní ncinyi ní ncinyi,
Ndi muswè kukumanyisha ne Ndi nganyì!”)

¹³² Dibuulula dyà ditambe bunène ku ônsò m’Bunzambì, Bunzambì bwà Kumutù kwà bônsò bwà Mukalenge wetù Yesù Kilistò. Kwêna mwà kufika pa cishimikidi cyà kumpàla paùdì kùyì mwitabuuje aci to, kupatukila apu... Ki cyàkamba Peetèlo ne: “Nyingalalaayi, bwà nushiishè kumònà Bunzambì. Nubatijiibwe mu Dînà dyà Yesù Kilistò bwà dilekelediibwa dyà mpèkaatù yènù, ne dîbà adi ùdi pabwîpì ne kubwela mu Nyumà.” Cintu cyà kumpàla cidi cikèngela bwà wèwè kumanya m’Bunzambì bwà Kilistò. “Mêmè ndi Alpha ne Omega! Ndi A ne Z, kakwena mukwabo pakuumusha Mêmè to. Mvwa ku cibangidilu, Nêngììkalè ku ndekeelu. Mêmè ki Yéyè wàkadiku, udiku, ne wâlwa awu, wa Bukolè bwônsò.” Anji elààyibi meeji pa Cyôci aci! Ki cyàkamba mpungi ncyôcì aci.

¹³³ Watàpa ntàala wadimuka Yone! Udi mubwele mu Nyumà, cintu kampànda necìkubuuludiibwe. Ncinyì ciine aci? Mpungi ùdi ùdila, cintu cyà kumpàla ne: “Ndi Alpha ne Omega.” Dyà kumpàla dyà ku mabuulula ônsò. (Kaa, ngènzàmpèkààtù, inama, nyingalala mpindyewu kumpàla kwà dîbà kwikaladi dimane kupita.) “Ndi Alpha ne Omega.” Ki cintu cyà kumpàla cyàkamumanyishà Ye, ne Yéyè uvwa nganyì. (Ùdi wenda useemena ewu nganyì’s? Ewu m’Mfùmù Yesù anyì? M’Mfùmù Nzambì anyì? M’Mfùmù Nyumà Mwîmpè anyì?) Yéyè ne: “Ndi Cyônsò aci! Ndi A ne Z. Mêmè ki cibangidilu ne ndekeelu. Mêmè ki Udi kàyi ûfwa to, Wa Cyendèlèèlè awu!”

¹³⁴ Ànu paanyimà ndambù tudi tuMumòna mu mmwenekelu Yèndè mwandamutekète, tàngilààyi cidi Ye dîbà adi’s. “Mêmè ndi cibangidilu ne ndekeelu. Ndi Alpha ne Omega, wa kumpàla ne wa ndekeelu. Mvwaku bangabanga ne kwikalaku wa kumpàla; ne paanyimà pàà kakùciyi wa ndekeelu, Nêngììkalè ànuku,” mu ngaakwilu mukwabo. “Wà kumpàla ne wa ndekeelu!”

...ne, *Cyûdì umòna aci, cifùnde mu mukàndà, ne utume...kùdì èkèleeziyà mwandamutekète yìdì mu Asie; ku Efeso,...Seemùnà,...Peegàmò,... Twatìlà,...Sààdì,...Filàdèlèfìyà, ne ku Laòdikiyà.*

¹³⁵ Èyo, dyà kumpàla kwà mabuulula wônsò m’Bunzambì bwà Kumutù bwà Yesù Kilistò. Udi ne cyà kumanya ne Yéyè nnganyi paùdì umvwa Dîyì adi. Èyo, Dîyì dìmwèdìmwè dyàkadila pa Mukùnà wà Sinaayì adi, Dîyì dìmwèdìmwè dyàkadila pa Mukùnà wa Dikudimuka dyà mpàla, Dyôdì dìmwèdìmwè adi: “Umwe bu Mwânà wa muntu.”

¹³⁶ Mpindyewu tàngilààyaaku mu mvensa udi ulonda ewu. Èyo:
Ki mêmè kukùdimuka... (Nshapità wa 12
mpindyewu.)

¹³⁷ Netwìkale mwà kushiya èkèleeziyà eyi bwà katancì kakesè cyanàànà, bwalu lumingu lujimà lulwalwà elu mpa èkèleeziyà eyi. Nwamònù's, pa nànku netwìkale ànu mwà kupìcilapù.

¹³⁸ Kàdi Yéyè kwamba ne: “Aba... Nênnùlombòlè bwà kutuma Mukenji wûndì nnuleeja ewu.” Nganyi? “Mêmè ki wa kumpàla ne wa ndekeelu. Mêmè ki Wa Kumutù kwà bônsò awu. Mêmè ndi Wa Bukolè bwônsò awu. Ne ndi mulwè bwà kunwambila ne ndi nnupa Mukenji mutumina èkèleeziyà mwandamutekète. Ndi muswe bwà nwénù kuWùfunda, kuWùlongolola.” Nwamònù anyì? “Ne èkèleeziyà mwandamutekète yìdì mu Asie.” Mpindyewu, yìvvà ng’èkèleeziyà cikondo aci miikale ne ngiikadilu munda mwàyì uvwa uleeja bikondo byà èkèleeziyà bivwa ne cyà kulwa.

¹³⁹ Mpindyewu:

Ki mêmè kukudimuka bwà kumònà dîyì dìvwà dyàkula naanyì adi. Nènku mumane kukudimuka, mêmè kumònà tundeyì twà ngôlò mwandamutekète;

¹⁴⁰ “Tundeyì twà ngôlò mwandamutekète.” Mpindyewu, cidi... Nkudimwinu wa Roi Jacques, unùdì nendè pàmwàpa anyi mu Scofield anyi—anyi pàmwàpa mu Thompson Chain, anyi yìmwè mikwàbò, kí mmu yôyì mwab’awu to. Kabyena byàmba ne bitèèkedi byà myêndù to, bìdi byàmba ne byambudi byà myêndù; biimanyinyi byà myêndù, ngeela meeji, ki mwaku mujaalame, mwímpè ùdì mwamba mu nkudimwinu wa mbangidilu. Nwamònù's, mu ngaakwilu mukwàbò, bitèèkedi byà myêndù mwandamutekète byà ngôlò ebi bìvwa ng’èkèleeziyà mwandamutekète. Yéyè ûdì wàmба pashìshe ndambù, mwandamu... mu mvensa wa 20 emu, “Bitèèkedi byà myêndù mwandamutekète byûdì umònà ng’èkèleeziyà mwandamutekète.” Pa nànku, nudi numònà's, bu cyôci kandeyi, kàvwa mwà kwikala kabutuke lukasa ne kwoshike kwônsò, ànu mu katancì kakesè cyanàànà. Kàdi kí ntundeyì to, cidi nci—nciimanyinyi cyà mwêndù. Cidi cicipatula bu ciimanyinyi cyà mwêndù. “Mumane kukùdimuka mêmè kumona muntu mufwànàngànè ne Mwânà wa muntu mwimane munkaci mwà... munkaci mwà biimanyinyi byà myêndù mwandamutekète.”

¹⁴¹ Mpindyewu—mpindyewu tàngilààyì. Kandeyi nkafwanyine kubutuka, nkafwanyine kwenguluka, kakùvvwaku kufwanyine kushààlaku kantu to, mu mèbà makesè kavwa kafwanyine kwikala kapyè kabutuke. Kàdi ciimanyinyi cyà mwêndù, ciimanyinyi cyà mwêndù cyôci's cidi nùnku ewu,...

¹⁴² Mwab’ewu, twàngatààyì—twàngatààyì Mufundu mwab’ewu, twà—twàngatààyì Zekààyì 4:1, dìbà adi tudi pàmwàpa mwà kupeta mu Zekààyì amu citùdì baswè aci's. Zekààyì 4.1, ne ndi ngeela meeji dìbà adi ne pàmwàpa mu cyôci eci netwìkale mwà—mwà kupatwilamù pàmwè citùdì tujinga aci. Ncyêna mwà

kupeta Zekààyì mu Sefànyà to, mmwômò anyi? Èyo. Èyo. Bible wanyì wa kale ùkaadi musunsuke yônsò. Zekaayi 4:1, tèèlejaayi ne ntèmà mpindyewu, angàtaayi cimfwànyì cilenga mwaba ewu:

Nènku mwanjèlò . . .

¹⁴³ Mupròfetà, mpindyewu, ànu bidimu nkàmà yitaanu ne dikumi ne citèèmà kumpàla kwà Kilistò:

Nènku mwanjèlò wakaakula naanyì awu kulwaye kabìdì, ne kumbiùshaye, bu muntu udibo babìshe ku tulu, (Mpindyewu mupròfetà ùdi mu cikèènà-kumònà.)

Ki yéyè kungambila ne: Udi umònà cinyi? Ki mêmè ne: Ndi mutàngile, kàdi kumònà citèèkedi cyà mwêndù (Mpindyewu, mwaku ùmwèùmwè awu mmukùdimuna ne “ciimanyinyi cyà mwêndù.”) cyônsò cyà ngôlò, ciikale ne nzàbà kwinshi . . . ku mutù kwàcì, (Aci's civwà mwêndù.) ne myêndù yààcìpu mwandamutekète, ne mbungu mwandamutekète ku myêndù mwandamutekète eyi, yìdì pamutù pàà nzàbà awu: (Nwamònù's, bikondo byà èkèleeziyà bìmwèbìmwè bìdì munkaci mwà kulwa abi. Nwamònù anyi?)

Ne mici yìbìdì yà olèvà ku luseke lwàcì, . . . (Mpindyewu, mmùshindù kaayi wà . . . Civwabo bëela mu myêndù ayi bwà kulamayi kadilu mu cikondo cyà Bible ncinyi? Kùdikù muntu mumanye anyi? Maanyi. Maanyià mùshindù kaayi? Maanyi à olèvà.) . . . mici yìbìdì yà olèvà . . . (Ncinyi ciine aci? Dipungila Dipyadipyà ne Dikulukulu; mbibìdì bìdì biimane ku luseke kwàcì aku's.) . . . ùmwè ku dyàbalùmè dyà nzàbà aku, ne mukwabo lwà ku luseke lwà ku dyàbakàjì aku.

Ki mêmè kwandamuna ne kwakula ne mwanjèlò uvwa wakula naanyì, kwamba ne: Mbinganyì ebi, mukalenge wanyì?

Ki mwanjèlò uvwa wakula naanyì awu kungandamuna kungambila ne: Kwêna mumanye cìdì—cìdì bintu ebi anyi? Ki mêmè ne: To, mukalenge wanyì.

Nènku kungandamunayè ne kwakula naanyì, wàmba ne: Eci n'diyì dyà MUKALENGE kùdì Zèélubabèlà, dyàmba ne: Kî nku bukolè, kî nku dikàndà to, kàdì nku nyumà wanyì, mudi MUKALENGE wa bilwìlu wàmba. (Yéyè neàlujulule Yélusàlèmà.)

¹⁴⁴ Mpindyewu, citèèkedi cyà mwêndù ncinyi? Nciimanyinyi cyà mwêndù. Kàdi mónaayi mudibi bilenga's wè. Mwab'ewu, pààkakudimukàye, wàkamònà Ewu uvwa mufwànàngàne ne Mwânà wa muntu mwab'ewu mwimane munkaci mwà biimanyinyi byà myêndù mwandamutekète byà ngôlò, bìdì byumvwija bikondo mwandamutekète byà èkèleeziyà bìcìlwàlwa. Ne lubungu lwônsò, anyi—anyi ciimanyinyi cyà

mwêndù, civwa cìtwa mu lupànzà lunène lwà maanyì alu. Nènku mu maanyi awu's ke mùvvà mubanda too ne ku kaamwêndù kakesè kàà mwenekelu wa pabwàkù kàvvà kashikika ne mukàbà munda amu ne mukàbà awu ùvwa mulembeleja mu maanyi amu. Nènku mu ntàntà yônsò... Bâvwa bapongolwela maanyì lwà ku lusongo lwà ciimanyinyi aci, avwa ûja lushìbàshìbà lunène lwà munkaci alu, ne dyàpa dinène adi, nènku avwa apongoloka too ne mu nshìbàshìbà, mùshindù ewu. Nènku mwêndù ùdì ne mukàbà mulembelejamù awu, lubungu elu—elu munda mwà... utungunuka ne kuteema kapyà muunya ne bufùku. Kabivwakù bikukèngela kuwùteemesha nànsha, kawenàku ùjìma nànsha; bâdi batungunuka ne kupongolwela maanyì mu lubungu lunène alu. Nènku biimanyinyi byà myêndù bìdì bipatukila pambelu mùshindù ewu abi, bivwa ne myêndù mitèèkela lwà ku lusongo kwàbì aku's. Mukàbà wà mu mwêndù ùdi upweka mùshindù ewu, upatwila mwoyi wàwù eku. Kaa, mùshindù mwine udibi bishììlàngàne ne kàndeyì's. Mùshindù mwine ùdibi bishììlàngàne's! Niimanyinyi cyà mwêndù, ne cìdì munkaci mwà kukoka maanyi.

¹⁴⁵ Mpindyewu, biimanyinyi byà myêndù ebi, kapyà kàvvwa pa biimanyinyi byà myêndù ebi mu Dipungila Dikulukulu. Pàvwàbo bateemesha mwêndù umwèpelè, kàbàvwa mwà kuteemesha mwêndù ùvwa ulonda ne kapyà kavwàbo naaku mu cyanza to. Bâvwa bateemesha mwêndù umwèpelè, pashiìshe bawàngata bwà kuteemesha naawù mwêndù mukwabo, pashiìshe bawàluja panshi. Nènku bateemesha ewu mwêndù, ne pashiìshe bawàngata bwà kuteemesha ewu mwêndù ne kapyà kàmwèkàmwè kavwabo babangile naaku ku ntwadijilu aku. Kaa, ndi ntekemena ne kacyèna cinupita mutù to. "Yesù Kilistò umwèumwè awu makèèlèlè, leelù, too ne kashidi," kapyà kàmwèkàmwè aku (Nyumà Mwîmpè) kateemesha yônsò wa ku maèkèleziyà awu munda mwà bikondo.

¹⁴⁶ Yesù kààkambaku mu Yone Munsantu 15 ne: "Mêmè ndi mwonji wa mvinyo, nwènù nudi matamba anyì"? Mpindyewu, Yéyè ke Mwonji wa mvinyo munène, twétù tudi matamba. Mpindyewu, mwonji wa mvinyo kaùtu ukwama mamuma to...

¹⁴⁷ [Katùpà kàà mukàbà wà mêtì munda mutupu—Muf.]... udi mwà kwangata mucì wà madimà, mwenze bu mucì wa orange, ne udi mwà kwapulaku—kwapulaku di—ditàmbà, èè, ndi mufwànyìne kwamba ne, mucì wa mbòmà, kàdi kwondola kaaba kakesè mu mucì wa orange nènku kusomekamu mucì wà mbòmà awu, newùkole. Udi uye lwà eku wangata ditambà dyà mucì wà didimà dyà mpusu bwà kudisomeka mu mucì wà orange, nedikole, anyi wangata mucì wà grenade, nènku uwàngata, anyi, cimuma cyà didimà kanà dyônsò eci, anyì mandeleenyì à màtwile mbidi anyi mandeleenyì manène, cyônsò cyà ku bimuma byà madimà abi, kàdi kubisomeka mu mucì ewu, nènku nebiükadile ne mwoyi ku mwoyi wà mucì wà

orange awu; kàdi kabyàkukwama bimuma byà orange nànsha. Nebìkwame bimuma byà mbòmà, nebìkwame mandèleenyì à manène, nebìkwame bimuma byà mpusu, kàdi bìdi bítancila ku mwoyi wà mucì wà mvinyo mulelèlè, kàdi mwonji wà mvinyo awu wôwò mwà kupatula mwonji mukwabo wà mvinyo... ditàmbà dikwabo, nebìikale ne mwoyi ùmwèùmwè ùdi munda mwàwù awu, nebìkwame cimuma cyà orange. Bwalu, kwônsò kwônsò eku, mu muji wàwù amu mmucì wà orange, kàdi mikwàbò yìdi mwà kuperela mwoyi ku wôwò awu padibi ànu ne nngiikadilu wa didimà. Kàdi kabyèna mwà kukwàma mamuma à ku mucì wà bangabanga awu to, bwalu kayèna yà ku cibangidilu to.

¹⁴⁸ Mùshindù awu ke ùdi èkèleeyìyà. Mbondole mwonji wa Mvinyo ne basomekemù ba-Presbytériens, ba-Méthodistes, ba-Baptistes, ne bikwàbò byà mùshindù awu. Wùdi wùkwama mamuma à ba-Baptistes, mamuma à ba-Presbytériens, mamuma à ba-Méthodistes, kàdi bu wôwò mwà... mucì awu wôwò ànu mudidinge mupatule mwonji mukwàbò wa mvinyò, newìkale mwonji wà mvinyò wà mùshindù ùmwèùmwè wàkaputula Wu mu Ditùkù dyà Mpenta: Mwonji wà mvinyò wà ku cibangidilu awu! Newàkule mu myakulu ne newìkale ne bukolè ne bimanyinu byà Kilistò mubiìshiibwe ku bafwè mu wôwò. Bwà cinyi? Bwalu ùdi unwina ku mushìmì wà ku cibangidilu mùdìwu mukunyiibwe. Mu bulelèlè, kí nne mukùnamù to, kàdi mmulediìbwemù! Mukalenge àtumbe's wè! Kaa, ekèlekèle! Ncìvwa mukweleku meeji to piine apu.

¹⁴⁹ Nwamònù's, bakwabo aba mbasomekamù; badi babàsomeka mu mucì, pa nànkù badi bakwama mamuma à mùshindù wàbò bôbò biine. Kabèna mwà kwangata Eci to. Kabèna biitabuuja Aci to, bwalu kacya kabàtukù bamanyePù kantu nànsha kàmwè to. Kàdi bôbò balediibwe mu Mwoyi ùmwèùmwè wâkapàtuka mu mucì awu, ki cintu cìmwèpelè ncyòcì aci cìdìbo mwà kukwàma, m'Mwoyi wà ku muji awu's.

¹⁵⁰ Ntakù myêndù yônsò eyi yìdi yikumbana mu nzàbà umwèpelè munène bikolè awu, cikwacidi cinène menemene cìmwèpelè, ne citèèma bishììlàngàne... anyi byambudi byà myêndù mwandamatekète bishììlàngàne bipatukilamù. Nènku pàdìbi bipatukamù apu, bônsò bwà ku makénkè awu bùvwa bùsunyna mu mushìmì munène wà mwoyi wàwù. Nènku bukénkè bwàwù bùdi nànkù bwalu kandeyi kààbù nkatumija mu cipanza cinène aci. Kaa, cimfwànyì cilenga kaayi cyà ùmwè wà ku mìtootò mwandamatekète ayi (civwa cileeja cyòcì aci's) ne mwoyi wènde mwikale ulakuka kapyà ne Nyumà Mwîmpè mwab'ewu. Nènku cidi... Ku diitabuuja ùdi ulakuka ne kapyà kàà Nyumà Mwîmpè, ne mwoyi wèndè nkandeyi, anyi kí nkandeyi nànsha, kàdi mmukàbà ùdi mubweja mu Nyumà Mwîmpè (mu Kilistò), ne ku mukàbà awu aku ùdi ukòka Mwoyi wà Nzambì bwà kupeesha èkèleeyìyà wendè Bukénkè.

Kaa, cimfwanyi kaayipu's cyà mwena kwitabuuja mulelèlà's wè! M'Bukénkè bwà mùshindù kaayi bùdiye ufila's wè? Bukénkè bwà mùshindù ùmwèùmwè buvwaku pàvwa kandeyi kàà kumpàla kateema apu.

¹⁵¹ Pààkabangà cikondo cyà kumpàla cyà èkèleeyiyà, cìwwa ng'Efeso. Pôlò, mwanjèlò wa èkèleeyiyà awu, ùmwè wà ku mitootò. Kùdi mitootò mwandamutekète yìdi yùmvwija banjèlò mwandamutekète, "misàanjeelà mwandamutekète." Lumingu elu ndi mwà kwangata Mufundu ne maalu-malonda ne kunujaadikila ne cintu ne cintu cyà ku byôbi ncilelèlà mu mwanjèlò yônsò, ne mwanjèlò yônsò ùvwa ne Bukénkè bùmwèbùmwè abu. Ncyà bushùwà. Ne pashìishe ànu pankaci pàà bikondo ebi, Kampànda munène udi ne cyà kulwa awu.

¹⁵² Mònaayi, mpindyewu bàdi bakòkela ku cipanza cinène cyà Maanyi eci, Bukénkè...mwoyi mmutùkija munda mwà Kilistò. Udi mufwè, ne mwoyi webè mmusokoka mu Kilistò kupicila ku...anyì musokoka mu Nzambì kupicila ku Kilistò, ne mutwibwe citampi kùdi Nyumà Mwîmpè. Kakwenaku mùshindù nànsha mukesè wà kukuumushaku to. Mmunyì mûdì mwà kucyenza? Kakwèna muntu nànsha umwe udi mwà kukwenzela bibì to. Ditengu dyà mwoyi wèbè dìdi dilàkuka kapyà ne Nyumà Mwîmpè; kaa, dìlakuka kapyà, dìfila Bukénkè. Ditengu dikwàbò dyà mwoyi wèbè ndizabika penyi? Munda mwà Kilistò. Udi mufwè ne musokoka mu Kilistò, Nyumà Mwîmpè, mwikale ùjika mwaba awu bwà ne...dyabùlu kénéa mwà kukulengaku to. Amen! Yéyè ùdi mwà kwela nshiba ne kwenza mutooyi. Nànsha lufù lwine kalwèna mwà kukulengaku to: "Wéwè lufù, kalonda kèèbè kàdi penyi? Bucimunyi bwèbè bùdi penyi's? Twasàkidila kùdi Nzambì udi utùpa bucimunyi mu Mukalenge wetù Yesù Kilistò."

¹⁵³ Ndekeelu wa mvensa ewu, tumubalaayi:

*Nènku mumane kukùdimuka, mêmè kumònà bitèèkedi
byà myêndù byà ngôlò mwandamutekète;*

*Ne munkaci mwà bitèèkedi byà myêndù byà ngôlò
mwandamutekète bu... Mwânà wa muntu,...*

¹⁵⁴ Ekèlekèlè! Nuvwaku bamònè anyì? Mitootò, bitèèkedi byà myêndù, myêndù. Cìdi cyumvwija cinyì? Eci cìdi cyumvwija cinyì? Bwà ne cipungu citùdimu ne mwoyi eci ncikondo cyà bufùku, tundeyi ne makénkè ne mitootò bìdi byumvwija ne mbufùku. Kàdi mùtootò wùtu wènza cinyì? Wùtu wùleeja bukénkè bwà dìbà too ne pàdì dìbà dipingana. Dînà dyà Mukalenge dibèneshiibwè's wè! Nènku mwambi mulelèlà wa Nzambì kàtu uleeja bukénkè bwà torché, kaci kàà alameetà kampànda, anyì cizubu kampànda cyôsheka to; ùdi uleeja nsèsà yà Kilistò kùdi Èkèleeyiyà, ne "Yéyè ùdi umwèùmwè awu, ne Üdi ne mwoyi, ne Yéyè ùdi ùnkenkeshila." Amen! Ki Bukénkè bùdiye uleeja abu. Mùtootò wùdi wùleeja bukénkè

bwà díbà, nwamònù's, pa nànku tudi tuleeja Bukènkè bwà Mwânà wa Nzambi. Wènza cintu cìmwècìmwè cyàkenza Ye aci, ùfila Bukènkè. Bukènkè bwà mùshindù kaayi? Bukènkè bwà Èvànjeelìyò kùdì bôbò abu.

¹⁵⁵ Mpindyewu twänjààyi kuMuJooja kàbìdì ndambù, patùdì twangata mvensa wa 13 ewu apa:

*Nènku munkaci (amu's ki munkacinkaci) mwà
bitèekedi byà myéndù byà ngôlò bu... Mwânà wa
muntu, muvwale muzàbì mutwè too ne ku makàsà,
ne musenyena lwà pa cyàdì ne mukàbà wà ngôlò.*

¹⁵⁶ Mpindyewu s'ki cîngà cijaadiki eci cyà ne dilongesha edi ndilelèlà dyà ne civwa mmu ditùkù dyà Mukalenge. Nukaavwaku baMumònè anyì? Kàvwa mwakwidi mu ciine cikondo aci to, anyì Kàvwa mfùmù to, Ùvwa nziji. Mònayi, mwakwidi, mwakwidi munène, pàvwaye ùbwela mu mwaba wa cijila anyì ùbwela bwà kwenza mudimu, ku mudimu, ùvwa ùdìswikila lwà mu cimònù. Muswikile mukàbà wèndè awu lwà mu cimònù, byumvvija ne ùvwa munkaci mwà kukwata mudimu; kàvwa muwùswikile lwà pa makaaya nànsha. Kàdi s'ki Yéyè udi upatuka ewu, wenda upatuka ne mukàbà muswikila lwà kuulu eku, mwikalè ne cibwikilu cyà pa makaaya Èndè apu; cisenyena lwà pa cyàdì, pa mabèèle, ne mukàbà wà ngôlò, cisenyena lwà kuulu eku. Ncinyi aci's? Ndumbùlùlù, nziji. Nziji ne cibwikilu cyèndè cyà pa makaaya, cisenyena lwà kuulu eku, kaciyì lwà kwinshi bu mwakwidi nànsha. Nwamònù's, aci's cidi cileeja ne Yéyè kacìvwa mu bwakwidi Bwèndè mpindyewu to, Yone wàkaya too ne mu ditùkù dyà Mukalenge ne kuMumònà ûlwa bu nziji.

¹⁵⁷ Nudi nwitatuuja ne Yéyè n'nziji anyi? Tubalààyaaku Yone Munsantu 5.22, ne lukasa lwônsò, netùmonè ne Yéyè mmulumbulwishi anyì kî mmulumbulwishi. Yone Munsantu 5:22:

*Bwalu Taatù kêna ùlumbulwisha muntu nànsha umwe
to, kàdi wàkafila dilumbulwisha dyônsò kùdì Mwânà:*

¹⁵⁸ Ncìyà bushùwà anyì? Yéyè's ki nziji, Nziji wa Kumutù kwà bônsò. Ne Yone ùdi ùleeja ne Yéyè kavwa mu ditùkù dyà cipròfetà Cyèndè to, bu mupròfetà, anyì Yéyè kàvvakù mubwele mu matùkù à bumfùmù Bwèndè abu to, kàdi Yéyè ùvwa mu ditùkù dyà Mukalenge bu Mulumbulwishi. Mpindyewu, mbanganyì bâdì bamanye ne mwakwidi yéyè ne mukàbà, ne mwonji mulembeleja mu cimònù cyèndè bìdi byumvvija ne ùvwa ku mudimu? Muntu kanà yónsò udi ubala Mpungila ayi, udi mumanye Dipungila Dikulùkùlù, mmumanye aci. Pâdì mwakwidi musenyene mukàbà lwà apa, ùdi ku mudimu, mmusadidi. Kàdi Yéyè ùvwa musenyene lwà kuulu eku, nziji.

¹⁵⁹ Tutungunkààyi ndambù ne kubala:

...mukàbà wà ngôlò... ùvwa... lwà pa cyàdì...

¹⁶⁰ Ncyà bushùwà, lwà kuulu *eku*, Ùvwa Nzujì.

Mpindyewu netùbalè mishindù mwandamutekète yà butùmbi bwà Mupersona Wèndè. Kaa, ekèlekèle! Eci's cìdi cìngelesha mbìlà kumpàlà kwà mêmè kufikakù. [Katùpà kàà mukàbà wà mèyi munda mutupu—Muf.] Mònaayi! Kaa, eci's ncintu cilenga cyà dikema. Tèèlejààyi ànu cyanàànà:

Ne mutù Wèndè . . .

¹⁶¹ Mpindyewu tàngilààyì, Ùdi ne bintu mwandamutekète, bìdiye utèéla mwab'ewu: Mutù Wèndè, nsuki Yèndè, mésù Èndè, makàsà Èndè, Dîyì Dyèndè, bintu mwandamutekète bìdiye utèéla mwab'ewu ebi, mishindù mwandamutekète yà butùmbi bwà Yesù Kilistò. Nganjibi kuCibala:

Mutù wèndè ne nsuki yèndè bìvwa bitòòke bu myôsà yà mùkòòkò, mitòòke bu nêjè; . . . mésù èndè àvwa . . . ndimi yà kapyà;

. . . makàsà èndè bu mùdì . . . cyamu cyà kabanda cyà cifinunuke, bu ne avwa mwoshìibwè mu cikùtù cyà kapyà; ne dìyì dyèndè . . . bu dìyì dyà mâyì àbûngi.

Nènku mu . . . Nènku ùwwa ne mitootò mwandamutekète mu cyanza cyèndè cyà dyàbalùme: ne mukana mwèndè muvwa mupatuka mwele wà mvità mutwisha ngwengwengwe nseke yìbìdì, ne kwisù kwèndè kùvwa bu mùtu dîbà dikenka mu bukolè bwàdì amu.

¹⁶² Cìkèènà-kumònà kaayipu's wè! Civwaye mumònè mwab'ewu ncinyi? Mwànà wa Nzambì mutùmbishìibwè, ne cimfwanyi. Mpindyewu, twìkalààyi-twìkalààyi ànu badilongolole mpindyewu.

¹⁶³ Kaa, ekèlekèle, mwà ngeela meeji ne tukààvwa dîbà citèèmà's, kàdi's tucìdi ànu dîbà mwandamukùlù's. Ncyéna nànscha mwànji kubanga to. Èyo. Mbîmpè's. Mpindyewu, ndi nguumvwà bibì be bwà mùdì bânà bëètù aba kacya biimana kuulu's, bìdi bimbìndulula bwà kubamònà biimane, nudi numònà's, bwalu ndi mumanye ne mikòlò yàbo's yìdi munkaci mwà kusaama. Bu ne mwaku ànu ne mûshindù mukwabo bânà bëètù wanyi, wà cintu kanà cyônsò cîndì mufwanyine kwenza, nûnku's ndi mucyenze bushùwà. Mpindyewu, ndi muswè bwà eci cìnùfike menemene's. Nènku nwimaneku ndambù mukesè wa dîbà ne Nzambì ànufuteku bibanjìke, ki disambila dyànyì adi.

¹⁶⁴ Mpindyewu—mpindyewu mònaayi, cintu cyà kumpàlà aci, mpindyewu tudi tumònà ne, mutù Wèndè ne nsuki Yèndè bìvwa bitòòke bu myôsà yà mùkòòkò. Mutù Wèndè ne nsuki Yèndè bìvwa bitòòke bu myôsà yà mùkòòkò. Mpindyewu, aci kî mbwena kwamba ne mbwalu Yéyè ùvwa muntu mukùlákàjì, ki cyàkenzà nànku to. Aci kî ncivwa cyenzeje ne bìikale nànku to. Kavwa mutambe kukùlakaja bwà kwenza

nànku to. Yéyè ùvwa... Cìvwa mbwà dilabula ne dikumbana Dyèndè ne lungenyi Lwèndè. Bwalu Yéyè ngwa Cyendèlèlè, ne wa Cyendèlèlè kénà mwà kwikala ne cikondo to. Nudi bumvwe anyi?

¹⁶⁵ Twänjààyibi kukudimuka, nènku nètwì—nètwìkale mwà kuMumòna mwab'ewu mu nùnku, nènku netùjandule cìdìYè wikalangana. Mpindyewu, tubuululààyi mu Danyèlè 7.9, bwà katancì kakesè cyanàanà, nudi numòna cimfwanyi cimwècìmwè aci mu Danyèlè mùdiYè ulwa bu...mwab'ewu kùdì Mukulumpe wa bikondo. Ne pàmwè ne bantu bônsò, bamanyi bàà mabala bàà Bible, mbamanye menemene mwaba wutùdì tuyá batàngile bwà mpindyewu mene. Danyèlè 7, ku mvensa wa 9; nèmbangilè ku wa 8:

Nènku mémè kutàngila lusèngù alu, ne, mònayi
ne, kwàkapàtuka...kaalusèngù kakwàbò kakesè,
kumpàla—kumpàla kwàkù kùvwa nsèngu yìsatu yà
kumpàla yákajoomodiibwa; nènku, mònayi, mu
lusèngu elu amu muvwa mésù bu...à muntu, ne
mukana mwikale mwakula maalu manène.

Ki mémè kutàngila too ne mwàkaadijiibwa nkwasà yà
butùmbi panshi,...

¹⁶⁶ Mpindyewu tèèlejààyi. Tèèlejààyi ne ntéma, mpindyewu. Nudiku mwà kungumvwa lwà paanyimà pààpa anyi? Ambaayi ne “Amen,” panwíkala ne mùshindù. Mémè kwebeja mukàjàànyì paanyimà pààpa. Ngeela meeji ne cikolokolo eci cìdi...cìdi cyumvwika bikolè apa, kî mmwômò anyì? Mpindyewu, ndi ngeela lubila lukolè be, ngeela meeji, ku eci nùnku's.

¹⁶⁷ Èyo, mpindyewu Danyèlè 7.9:

Ki mémè kutàngila too ne mwàkaadijiibwa nkwasà yà
butùmbi panshi, ne Mukulumpile matükù kushikamaye,
muvena bilàmbà bìvvà bitòòke bu nèjè abi, ne
nsuki yà mutù wèndè yìvwa bu...myósà mikezùke:
(Mukulumpile matükù.) nkwasà wendè wa butùmbi
uvwa bu ludimi lwà kapyà lukolè, ne nkata yèndè yìvwa
yìlakuka kapyà.

Ne misùlù yà kapyà—yà kapyà yìvwa yìpweka ne
yìpatukila kumpàla kwèndè: ne binunu ne binunu bìvvà
bìmukwàcila mudimu, ne dikumi...misangu binunu
dikumi biìmane kumpàla kwèndè: ne cilumbuwidi
kutwadijaci, ne mikàndà kukangudiibwayi.

¹⁶⁸ “Nsuki mitòòke!” Bônsò...muntu yônsò ewu mmumanye ne ki banzuji bàà kale mu matükù à kale. Anu muvwa banzuji bàà cyena Anglais ne ciibidilu cyà kuvwala kafulu kàà nsuki katòòke. Mbanganyi bàdi bavùluke aci? Banzuji bàà kale bavwa bàvvàla kafulu kàà nsuki katòòke bwalu bàvvwa... Kàdi's ki Yéyè ewu, ùleeja cyàkàbìdì ne Yone ükaadi mu ditükù dyà Mukalenge, yéyè kuMumòna bu nzujì. Amen! Kàyì bu

mwakwidi to, kàyì bu mfùmù to, kàyì bu mupròfetà to, kàdi bu nzujì. Taatù (N'Yone Munsantu 5:22) mmufile dilumbulwisha dyônsò kùdi Yè. Nènku Yéyè ngudi nzujì mpindyewu, mmulwe bwà kulumbulwisha matunga. Kaa mutùdì tujinga ditùku ditwà Mumòne mùshindù awu's we! Nsuki Yèndè yìvwa mitòòke bu nêjè, Danyèlè wàkà Mumòna ulwa kùdi Mukulumpile matùkù. Mutàngilaayi mùdì Yè utuutakaja bìbìdì ebi pàmwè's. Èyo:

... ne cilumbulwidi kubangaci, ne mikàndà kubuuludiibwayì.

Ki mêmè kutàngila dîbà adi bwa... Ki mêmè kutàngila dîbà adi bwa dîyì dyà myaku minène—minène yìvwa lusèngù... (To, mêmè ndi mu mwaba ùdì kawùyì wôwò to, kî mmwômò anyi?)

¹⁶⁹ Danyèlè 7:9, èyowà, ki twêtù bâfkipù aba:

... ne nkàta yèndè...

Ne musùlù wà kapyà upwekelamù ne ùpatukila... mu... yéyè: ki makumi à binunu kulwawù bwà kumukwàcila mudimu,...

Ki mêmè kutàngila dîbà adi bwa dîyì dyà myaku minène yìvwa lusèngù alu lwàkula: ki mêmè kutàngila mene too ne mwàkashipiibwa nyama wa lwonji awu, ne mwàkabutudiibwa mubidi wèndè, ne kufidiibwawù mu—mu ndimì yà kapyà. (Uhm!)

Nènku bwà cìdì citàngila nyama mikwabo ayi, yôyì yônsò bâkayinyenga bukòòkeshi bwàyì, (aci's ki makolè ônsò ne makalenge à Bisàmbà byà bendè ikala mwà kubùtudiibwa) kàdi myoyi yàbò yàkaleepeshiibwa bwà cipoolù kampànda cyà cikondo.

Ki mêmè kumònà mu cìkèènà-kumònà cyà bufuku, nènku, mònayaì, muntu mufwanangane ne Mwânà wa muntu ùlwa mu... mavuba à mu dyulu,... (Tudi ba Mumòne ulwa munyi mu dìndà emu, mu mvensa mwi3? Ùlwa mu mavuba à dyulu, Mwânà wa muntu.) ... muntu mufwanàngànè ne Mwânà wa muntu ùlwa mu mavuba à dyulu, ne yéyè wàkalwa kùdi Mukulumpile matùkù awu, ki kumuseemejabo pabwípi kumpàla kwènde.

Nènku kwàkafidiibwa bukòòkeshi kampànda, ne butùmbi, ne bukalenge, ne bantu bônsò, matunga,... myakulu, byàkakèngela bwà kumukwacilabi mudimu: bukòòkeshi ebu mbukòòkeshi bwà kashidi, bwikalà kabuyì mwà kupita to, ne bukalenge bwèndè nebwikale... bukalenge bwèndè bwikalà kabuyì mwà kubutudiibwa.

¹⁷⁰ Kulwa Ye kùdi Mukulumpile matùkù uvwa ne nsuki mitòòke bu myôsà yà mùkòòkò awu. Ki Yone kukudimuka e kumònaye

muntu mufwànàngàne ne Mwânà wa muntu mwimane munkaci mwà bitèèkedi byà myêndù byà ngôlò mwandamutekète, mwikale ne nsuki mitòòke bu nêjè, Nzugi awu's! Kàyi musenyene lwà mu cimònù nànsha, kàdi musenyìne lwà pa cyâdi, lwà kuulu eku, nzugi's wè! Mwikale ne cibwikilu cyà makaaya cyà nzugi pa makaaya Èndè apu, kwimanaYe ne mukàbà wà ngôlò, mukezuke, wa cijila, mukezula, ùvwa mukwate bwakane Bwèndè. Cibwikilu Cyèndè! Ùvwa mubwikila too ne ku makàsà. Tàngilàayi mishindù mwandamutekète yà dimweneshiibwa dyà buumùntù Bwèndè ne butumbi.

¹⁷¹ Mpindyewu, ngeela meeji ne, mvensa wa 14:

*Yèndè nsuki... Mutù wèndè ne nsuki yèndè bìvwa
bitòòke bu myósà yà mùkòòkò, mitòòke bu nêjè; ne mésù
èndè àvwa... bu ndimi yà kapyà;*

¹⁷² Mutù, nsuki; “mésù àvwa bu ndimi yà kapyà.” Anji elààyibi meeji’s! Mésù àvwa musangu kampànda mavwijiiwe bitaayitaayi ne binsonji byà buntu, mpindyewu mmashààle ndimi yà kapyà. Mu ciji n’Yéyè awu mwimane mwaba awu bu nzugi ne ciji. Bwà cinyi udi muMubenge? Kaa, ngènzàmpèkààtù wa yààyà, anji elabi meeji bwà bwalu ebu! Anji elabi meeji pa bwalu abu, wèwè cidimba cyà èkèleeziyà cyà civumvu! Anji elabi meeji pa bwalu abu, wèwè mwena Kàtòlikè, Baptiste, Presbytérien, mwena Mpenta! Anji elabi meeji pa bwalu abu, wèwè mwena Kàtòlikè! Byàkakèngela bwà virgo Màriyà webè awu kubandaye ku mpenta ne kwàkidilayè Nyumà Mwîmpè, ne kutetuka ne kwenza maalu bu muntu mukàjì mukwacike maala. Mamwèndè mene wa Kilisto byàkamukèngela bwà kupetaye aci kumpàla kwà yéyè kwanyishiibwa mu Dyulu. Mmunyì munwìkalà nwénù bakàjì mwà kufikaku ne cintu kampànda cishààdile ku aci? Anji elààyi meeji pa bwalu abu, nwénù balùme, muntu ne muntu wa kunùdì!

¹⁷³ Nsuki Yèndè, ne mésù èndè àvwa musangu kampànda mavwijia bitaayitaayi kùdì binsonji byà buntu, kàdi ndi muswè bwà nwénù kumòna cintu kampànda bwà mésù awu. PacìvwaYe pa buloba, àvwa mavwijiiwe bitaayitaayi kùdì binsonji bu muntu, bwalu Yéyè wàkadila ku lukita lwà Lazàrò. Cyà bushùwà! Mûle tèntè ne dyumvwilangana dyà luse; luseke Lwèndè lwà buntu. Ùvwa muvwale, Ùvwa Nzambì muvwale buntu, bwà kuumusha mpèkaatù. Kàdi nànsha nànkù paanyimà pàà buntu abu, Ùvwa ne cintu kampànda paanyimà Pèndè apu cìvwa mwà kutàngila buludi mu mwoyi wa muntu ne kumanya byônsò bidi bìmutàngila. Bwà cinyì? Kuvwa cintu kampànda paanyimà Pèndè apu, nànsha muvwaYe muvwale mubidi wa cifwàkà.

¹⁷⁴ Kàdi kabàvwa bamanye ne ùvwa nganyì to. “Wèwè kùyi mwitabuuje to,” mwàkambaYe, “ne Mêmè ki Yéyè awu, neufwe mu mpèkaatù yèbè.” Ncìyà bushùwà. “Mêmè ncìyì ngenza

byenzedi byà Taatù Wanyì to, díbà adi kanùNgiitàbùùjì to; kàdi Mêmè ngenza byenzedi byà Taatù Wanyi, díbà adi itàbùùjaayi byenzedi panwìkalà kanùyi mwà kungiitabuuja Mêmè.” Kaa, mùshindù mwine ùwwaYe ùteeta kubatwadila Mukenji, dibuulula's wè! Mufwànyìne kupwekesha mêsù mu mwöyi wa muntu, kumanya byônsò bìwà bìmutàngila. Mùshindù ûndì ngeelapu meeji's wè! Mêsù àwwa musangu kampànda matàngile too ne dyàmomwà dyà mikùnà awu, makÙngamangana ne lutatu, ne mafwànyìne kudila bu muntu, kàdi nànsha nànkü mafwànyìne kwangata Nyumà wa Nzambì paanyimà pàà cikèènà-kumònà cyà buntu aci mwaba awu ne kumònà bintu byônsò; bintu bivwaku, bintu byàkadìku—byàkadìku abi, ne bintu bivwa mwà kulwa abi. Kudyanjila kwamba ndekeelu kacya ku cibangidilu, mbwalu Nzambì uvwa paanyimà pàà mêsù à buntu awu. Lekelabi Nzambì abwele mu nsòmbelu webè ne akukòntònonebi, nènku Yéyè neàkuleeje maalu àcìlwalwà. Bwalu kacyena kàbidi wèwè to, n'Nyumà Mwímpè munda mwà nsòmbelu webè amu utangidila mu mêsù à cifwàkà awu bwà kubakula bintu.

¹⁷⁵ Kaa, butùmbi kùdì Nzambì's wè! “Mêmè nêmpongololè Nyumà Wanyì pa musunya wônsò, ne bânà beenu balela balùme ne bakàjì nebàmbè bipròfetà, bansongààlùme bëènù nebàmònè bikèènà-kumònà, bakulakaji bëènù nebàloote bilòòta.” Àlèluuyà! Misangu mikwàbò bìvwa bìkèngela bwà Yéyè kukulààdika tulu bwà Wàmònà mwà kutàngidila ku wèwè aku, kàdi's Yéyè neàkuleeje bushùwà misangu yàbÙngì. “Bansongààlùme bëènù nebàmònè bikèènà-kumònà, bakulakaji bëènù nebàloote bilòòta; pa basadidi Bâànyì balùme ne bakàjì Mêmè nêmpongololè Nyumà Wanyì.” Kî ne: “Pa balami Bâànyì ne bampaasâtà to, kàdi pa Bâànyì...” “Pa ewu yônsò udi muswè, pa mubidi wônsò, Mêmè nêmpongololèpu Nyumà Wanyì.” Nudi nudikonka ne mbwà cinyì ndi ncyàmba ne mbila mùshindù ewu, kàdi's cìlwalwa mu bikondo byà èkèleeziyà ebi.

¹⁷⁶ Kaa, s'ki Yéyè awu mwaba awu, mêsù awu. Kàdi, vùlukààyi ne, díngà ditùkù, mêsù avva mavwija bitaayitaayi ne binsonji awu, mêsù awu neimane ku cilumbulwidi. Mpindyewu mmenze bu ndimi yà kapyà yìtwa eku yìtwa eku pa buloba bujima, ne kakwèna cintu nànsha cìmwè cìdì cyenzeka cìdìYe kàyì mumanye to. Kaa, ekèlekèle, mbikwata pa mikàbà yà mèyi. Abànda apwèka pa buloba atàngila munungakeenu wônsò, ajingulula meeji ônsò, mamanye kantu ne kantu kaùdì munkaci mwà kwenza, mapàngadika à mu mwöyi, cyûdì ujinga kwenza aci. Yéyè mmucimanye cyônsò. Yéyè mmumanye ne udi muMunange. Yéyè mmumanye ne meeji èbè mmajalame, bwà kuMukwacila mudimu. Yéyè mmumanye byônsò pa bwalu abu. Nènku ciìkaleku ncinyì pawimana ditùkù adi piìkala mpèkaatù yônsò mwediibwe patòòke kumpàla Kwèndè, ne Yéyè mwimane mwaba awu ku Cilumbulwidi cyà ku Nkwasa Mutòòke?

¹⁷⁷ Nzambì, ungeepuleku ku mwaba awu! Ncyêna muswè kumònà aci to. Pààpatuka Nzambì mukwate ciji awu ne midilu yípenya mu mésù Èndè, ne bwakane, kafulu katòòke kàà nsuki kumutù Kwèndè müşhindù awu, ne mésù Èndè apena ne kapyà àdì mamanye meeji ônsò à mu mwoyi wèbè, ne cyônsò cyûkaadìku mupàngàdike bwà kwenza aci. Nsokòkèku mu Lubwebwe lwà Bikondo lupanda bwànyì mêmè! Mukulumpe awu ùvwa ne ciibidilu cyà kwimba ne: “Pààkwata buloba bwônsò ebu kapyà, imana ku luseke lwànyì. Imana ku luseke lwànyì, ne ulekeleku cyâdì Cyèbè cìkkale musààmu wànyì. Nsokòkèku mu Lubwebwe lwà Bikondo.” Nzambì, ncyêna muswe cilumbulwidi Cyèbè to. Mêmè ncyêna muswe bwà Cyèbè... Cíndì nkeba n'luse Lwèbè, Mukalenge. Mpèèsheku luse Lwèbè, kí ndilomba Dyèbè dyà bujaalamé to. Mpèèsheku ànu luse Lwèbè cyanàànà. Kí mmikenji Yèbè to, nànsha ùmwè... Mpèèsheku ànu luse cyanàànà, Mukalenge, ki cyônsò cíndìku mwà kulòmba ncyôci aci. Ncyêna ne cyà kulwa naaci mu mabòkò àànyì to (Ncyêna mwímpè to, ncyêna ne pa bwàsà to), ànu ku Nkùruse Webè cyanàànà nkündì kacya ngákùlåma. Mukalenge, ki cyônsò cíndì pàànyì mumanye ncyôci aci: Kampànda wààkalwa bwà kwangata kaaba kàànyì.

¹⁷⁸ Tàngilààyi mmwenekelu mwandamutekète yà buumùntu Bwèndè mpindyewu yà mupersona Wèndè, nènku nenùmòne cyäkenza Ye.

Mutù wèndè...ùvwa mutòòke ànu bu néjè; bu myôsà yà mùkòòkò, ne nsuki mitòòke; ne mésù èndè àvwa bu... (twanjibi kumònà tûng)... Mutù wèndè...uvwa mutòòke bu mùdì...néjè; ne mésù èndè àvwa...ndimi yà kapyà;

Ne makàsà èndè àvwa bu...cyamù cyà kabanda pa cyôci, bu cyôsha mu cikutù cyà kapyà;

¹⁷⁹ Tàngilààyi mpindyewu. Twafumu ku dimona mùdì Ye mubwikila, nudi bamanye's. Mpindyewu tàngilààyi. Mutù Wèndè, mésù Èndè, mpindyewu ùdi ùpweka mutàngile ku makàsà Èndè aku bu cyamù cyà kabanda. Tàngilààyi dipangakana dyà cimfwanyi aci mwaba awu cyàkamònà Yone cyà Yesù aci, ne cyàkamònà Danyèlè cyà makalenge maalàbàle à buloba, mutù wà ngôlò ne bikwabo.

¹⁸⁰ Tàngilààyi numòne cìvwà eci mwab'ewu, ciimàne mwab'awu, cyamù cyà kabanda. Cyamù cyà kabanda cidi cyàkula bwà cinyi? Cyamù cyà kabanda cidi cyàkula bwà cilumbulwidi, cilumbulwidi cya Nzambi. Bidi bîleeja ne kiipacila Kèndè mu kaabujimà nkàà kulwa pa buloba apa bu Nzambì, bwà kuvwijiibwa mubidi, ne Yéyè wàkatùfwila ne kwangata manyooka à Nzambì, cilumbulwidi cyà Nzambì, ne mmupete Bukalenge bwikale bwà cyamù cyà kabanda, ne bukolakane, ne kabwena mwà kunyungishiibwaku to. Kakwena

cintu citambe kupapa bu cyamù cyà kabanda nànsha, ne kacya kabàtuku banji kupeta cìdi kàbìdì mwà kucitekesha nànsha.

¹⁸¹ Cilumbulwidi! Cyamù cyà kabanda cìdi cyàkula bwà cilumbulwidi cyà Nzambì cìdi cyenzeke. Tàngilààyi nyoka wa cyamù cyà kabanda mu cipèèlè. Nyoka wa cyamù cyà kabanda awu ùvwa ùleeja cinyi? Nyoka ùvwa ùleeja mpèkaatù; kàdi, bu muvvaci cyamù cyà kabanda, mpèkaatù mumane kulumbulwisha.

¹⁸² Mpindyewu, mònayayi kàbìdì mu matùkù à Eliyà, pààkabèngàbo Eliyà bu mupròfetà, kaanshinga kàà bwanda kakesè aku, cikondo cyà èkèleeyiyà cyà kale. Dìmwè dyà ku matùkù àdì pansi àà mêmè nêndwè bwà kunùleeja ne Izàlèèlè ùvwa ne bikondo mwandamutekète byà èkèleeyiyà, yéyè pèndè, ne bivwa cifwanyikijilu ànu menemene cyà ebi nùnku. Ne mu cikondo cyàbò cyà èkèleeyiyà, mu matùkù à Eliyà, kumubengabo nènku ke kulwaku bidimu bìsàtu ne ngondo yìsambòmbò yà kakùyikù mvùla nànsha wa kânà to. Ki mupròfetà wa kale awu kwambaye ne “maulu àvwa ne mmwenekelu wa cyamù cyà kabanda,” Cilumbulwidi cyà Nzambì pa matùnga bwà dibenga Nzambì ne ditéèeleja Izàbèlè.

¹⁸³ Cyamù cyà kabanda kàbìdì cìdi cileeja cilumbulwidi cyà Nzambì ku cyoshelu kùvwa mulambu ùshipiibwa, cyoshelu cyà cyamù cyà mitákù, ùshipiibwa. Nshindameenu menemene yìvwa yà cyamù cyà kabanda, cilumbulwidi. Wàkadyata cikaminu cyà ciiji cikolè cyà Nzambì ne kwambula cilumbulwidi cyètù pambidi Pèndè. Buululaayi mu Bwàkabuulwibwà 19.15, bwà katancì kakesè cyanàànà, tumònayayi cyàkenza Ye aci. Bwàkabuulwibwà 19.15, tubalààyibi katancì kakesè cyanàànà bu mêmè mwà kucipeta. Èyo, tubangilààyi lwà ku... twanjìbi kumòna tûng, lwà ku mvensa wa 12:

Mèsù èndè àvwa...bu ndimi yà kapyà, ne pa mutù wèndè pàvwa cifulu cyà butùmbi, bifulu byà butùmbi bûngibì; ne ùvwa ne dînà difunda, dìvwà muntu nànsha umwe kàyì mumanye to, ànu... yéyè mwine.

Ne ùvwa muvvâle cinkùtu cizabika mu mashì, ne dînà dyèndè dìvwà dìbìükidiibwa ne Dîyì dyà Nzambì. (Mpindyewu, vùlukààyi ne, Dînà Dyèndè kàvwa Dîyì dyà Nzambì to, Dînà Dyèndè divwa dìbìükidiibwa nánku. Nwamònu anyi?)... dînà dyèndè dìvwà dìbìükidiibwa ne Dîyì dyà Nzambì.

Ne bilwili...byà mu dyulu...bilwili bìvvâ mu dyulu bìvvâ byenda bìmulonda pa tubalù tutòòke, bìvvale linà mufinùnùke, mutòòke ne mukezùke.

Ne mukana mwèndè mûvwa mupatuka mwele musakisha, bwà wàmòna mwà kutuuta nààwù ditùnga: ne wàbàkòòkesha ne dikombo dyà cyamù cifiìke: ne yéyè neàdyate... (Ncinyì ciine aci?)... àdyate cikaminu

*cyà mvinyo wa lwonji wa ciji cikolè cyà Nzambì wa
Bukolè bwônsò.*

¹⁸⁴ Cyàkenza Ye ncinyi? Ciji cikolè cyà Nzambì cìwva pambidi pètù bwà mutùvwva bangenzàmpékàâtù. Neyà bushuwà anyi? Muntu nànsha umwe kàvwa mwà kudisùngila to. Kakwena cintu nànsha cìmwè citùdì bafwanyine kwenza to, tudi bônsò “Balela mu mpèkaatù, bafwimba mu bubì, balwe pa buloba apa biìkale twakula mashimi.” Kàdi cyàkenza Ye ncinyi? Wàkalwa pa buloba, Àlèluuyàh, ne kudyata mu cikaminu cyà mvinyo! Ciji cikolè cyônsò cyà Nzambì wa Bukolè bwônsò cyàkapòngolodiibwa pambidi Pèndè. “Wêwè udi mukùmbanyine, Éyi Mwâna wa mùkòòkò wa Nzambì, bwalu Wàkashipiibwa.” Kwangata mpèkaatù yà bàà pa buloba pambidi Pèndè, ne Yéyè wàkambula mpèkaatù wetù, mmùmwà ne Nzambì wààkapongolola lwonji lwà ciji Cyèndè cikolè aci pambidi Pèndè. “Ne Yéyè wàkatapiibwa mpùtà bwà dishipa dyètù dyà mikensi, muzaajìibwe bwà bubì bwètù, ne dinyooka bwà ditalala dyètù pambidi Pèndè, ne ku mibündàbündà Yèndè twâkondopiibwa.” Muntu nànsha umwe kààkafwaku bu Muntu awu to! Wàkakenga mu mùshindù wa ne mashi ne mâyì byàkatàpuluka mu mubidi Wèndè. Ne mamata à mashi àpatuka mu mpàlà Wendè kumpàla kwà lufù Lwèndè.

...cikaminu cyà...ciji cikolè...lwà lwonji...lwà
Nzambì wa Bukolè bwônsò.

¹⁸⁵ Dîngà ditùkù makàsà à cyamù cyà kabanda awu (Butùmbi's wè!), pàalwa Ye bu nzujì, Yéyè neàdyate mufwilakanyi ne Kilistò, ne beena lukuna Bèndè bônsò. Àlèluuyàh! Yéyè neéndelè pa buloba ne dikombo dyà cyamù mu cyanza Cyèndè. Amen! Kaa, nyinalala, wêwè mulunda wanyi ngènzàmpékàâtù, paùcidi ne mpùnga wa kunyingalala apa. Udi uteetà, kuciladikija ne wéle meeji ne cidi anu kaabwalu kakesè kiikala kakàyì mwà kwenzeka. Nebyenzeke! “Kabyàkungenzekelaku mêmè to.” Nebikwenzekele!

¹⁸⁶ Makàsà à cyamù cyà kabanda, udyatakaja beena lukuna Bèndè. Bwalu Yéyè wàkakenga ne wàkadyata mu cikaminu cyà lwonji lwà Nzambì bwà kufuta mpèkaatù yètù. Nènku díbà adi twêtù, bapiishiibwe aba, bapèle, misàndà mikèngeledi mutùdì emu, tujuula kaadyùlù kètù kakesè aka muulu ne tubala kaamukàndà kakesè kàà bavidi bàà Nzambì ne kuteeta kwela meeji ne “Nzambì katuku to,” kàdi kwamba ne “kakutu cintu nànsha cìmwe cyà mùshindù ewu to, ne cilumbulwidi kacyèna mwà kulwa to.” Yéyè neàngate makàsà à cyamù cyà kabanda awu ne neàzaaze mwena lukuna Wendè. Yéyè neàdyate ku makàsà mufwilakanyi ne Kilistò. Neàngate èkèleeziyà mividì yà diitabuua ne neàyikupe mu Cyendèlèlè mwàmwa, mwaba kampànda mu kapyà kàdi kwôshà mwikalaye mwà kwôshika ne kubutudiibwa. Ne Yéyè neàkòòkeshè pa buloba, Yéyè ne Èkèleeziyà Wendè kashidi. Butùmbi's wè!

¹⁸⁷ “Mutù, mutòòke bu myôsà yà mùkòòkò,” bwakane, dilabula, ne ngaakwilu wa kapelu, dikumbana, lungenyi. Bukulumpe, butòòke, bìdi byàkula bwà lungenyi, bukulumpe. Mmumanye cìdìYe wenza. Yéyè’s ke—Yéyè’s ke Mpokolo wa lungenyi. Yéyè’s ke Mpokolo wa dilabula. Yéyè’s ke Mpokolo wa cintu cîmpè cyônsò, ki bwà cinyi Yéyè mmuleejìlbwe mu eci nùnku bu Mwânà wa muntu, uvwa muvwale mwikale ne nsuki mitòòke milembèelele. Danyèlè wàkaMumònà kukaadi nkàmà yà bidimu, bidimu nkàmà mwandamutekète, ne kwambayè ne: “Yéyè ùvwa Mukulumpile matùkù. Ne muntu bu Mwânà wa muntu kulwa mu bukolè ne kudisanga ne Mukulumpile matùkù ewu, ke cilumbulwidi kubanga.”

¹⁸⁸ Mpindyewu ndi njinga ànu kunukonkaku cintu kampànda. Ndi nnwambila nwêñù èkèleeyiyà wa civumu. Virgo dikumi yàkapatuka bwà kutwilangana ne Mukalenge, yìtaanu yà ku yoyì yìvwa yà lungenyi, yìtaanu mikùtákane; bu mutwâcyangaci mu dindà emu, mucì musomeka awu. Mpindyewu, vùlukààyi ne, pààkapatukayi bwà kutuutakeena ne Nzambi... Mpindyewu tàngilàayi, Bible mmwambe ne: “Mikàndà yàkabuuludiibwa.” Danyèlè 7:9: “Mikàndà yàkabuuludiibwa.” Ki mukàndà wa ngènzàmpèkààtù ngwôwò awu. “Ne mukàndà mukwàbò wàkabuuludiibwa.” Wàkalwa Nendè nganyi? Èkèleeyiyà uvwa maya mu Dyambwibwa awu. Kaa! “Makumi à binunu kuvudija ku binunu kuvudija ku binunu ne binunu bààkalwa Nendè ne baMukwacila mudimu,” Mukàjèndè, Mukàjì-musèla. Kaa, butùmbi’s wè! Mukàjèndè wàkalwa Nendè, Èkèleeyiyà awu.

¹⁸⁹ Cilumbulwidi cyàkabanga, ne mikàndà yàkabuuludiibwa. Ne mukàndà mukwàbò wàkabuuludiibwa, ùvvà virgo mukùtákane awu, ne muntu yônsò wàkàlumbulwishiibwa bilondeshile mukàndà awu. Newìkale mwenzejìlbwe bwà kufila kabingila kàà cyûvwa kùyì mucyenzele, nènku dìbà adi newambe cinyi’s? Udi mumanye cìdì citambe bwîmpè mpindyewu, udi mumanye cìdì citambe bwîmpè. Uvwa mufwànyine kwikala kùyì muCìmanye kumpàla to, kàdi udi muCìmanye mpindyewu’s. Nwamònou anyi? Ambààyaaku tûng piìkala mwakane ûsùngidiibwa ne lutatu, ngènzàmpèkààtù ne muntu mubì nebìikale penyi? Ewu udi ubenga awu, mmumanye cìdì citàmbe bwîmpè kàdi pashiìshe kuCìbenga. Nebìikale penyi? Makàsà Èndè bu cyamù cyà kabanda, cilumbulwidi cyà Nzambi.

¹⁹⁰ Mpindyewu, twanjì tumònebi, àbìdì aa netwìkale... too ne ku ndekeelu kwà dibeji mpindyewu:

...nsuki bu myôsà yà mùkòòkò, ...ne mêsù èndè àvwa...ndimi yà kapyà;

Ne makàsà èndè bu—makàsà bu...cyamù cyà kabanda,...mwôsha mu cikùtù cyà kapyà; ne dìyì dyèndè...bu dìyì dyà mâyì àbúngi.

¹⁹¹ “Diyì dyà mâyì àbûngì.” Mâyì àdi àleeja cinyi? Nwêñù bàswè kucifunda, buulùlaayi mu Bwàkabuulwibwà 17.15, nènku nenùsangane ne Bible mmwambe ne: “Mâyì awámònu awu mmìntutà, ne misùmbà, ne bantu, ne myakulu.”

Èyo, *Diyì*. Ncintu kayipu cyà cyenza bwôwà bwà musùùkà munkaci mwà kupàmbuka pa mbû wa mwoyi, kàyì mwendeshi wa kumulombola, mupàmbuke, mupulumuna kùdì nkawaka, bwà kuumvwa dikungula dyà bìsàbàsabà, bibila! Ncintu kaayi cyà cyenza bwôwà cìdì cifwanyine kwikala bwà musùùkà munkaci mwà kupàmbuka’s! “Diyì dyà mâyì àbûngi.” *Diyì* Dyèndè ncinyi? Ncilumbulwidi, diyì dyà bambi, ku Nyumà Mwîmpè, didì dikobola kùdì bantu mu cikondo cyônsò, biimane mwab’awu, *Diyì* dyà mâyì àbûngi dyàkakòbola, mintutà ne misùmbà, diyì dyà mítootò mwandamutekète mu cyanza Cyèndè ayi, bwà cikondo cyônsò cyà èkèleeyiyà, bâyiisha dibatiiza dyà Nyumà Mwîmpè, dibatiiza mu Dînà dyà Yesù, dyakula dyà mu myakulu, bukolè bwà Nzambì, dibìika dyà ku lufù dyà Kilistò, Dilwa Diibidì, Cilumbulwidi cyà Nzambì. *Diyì* dyà mâyì àbûngi dyàkapatuka kùdì ewu ûvwa mufwanangane ne Mwânà wa muntu, mâyì àbûngi.

¹⁹² Ciìkalaci bwà kumanya ne udi musòmbe mu masangisha ne umvwa ne udi ne cyà kuditèèka mu bulongame ne Nzambì bwà upete Nyuma Mwîmpè, ne musùùkà munkaci mwà kupàmbuka bwà kuumvwa diyì adi dyàkula patòòke mu disangisha mûdì musòmbe adi amu, ne muumvwe manyooka à Nzambì ayiishiibwa, kàdi kuCibenga. Cibila cinène cìdì ànu pabwípi neebè apu, bisàbàsabà binène biìkala mwà kuya neebè ku kabütù kèèbè kàà Cyendèlèlèlè.

¹⁹³ *Diyì* dyà mâyì àbûngi, buumùntù Bwèndè bwinààyì. *Diyì* dyà mâyì àbûngi. Nenùcyenzè bishi pàdidi dikwaciìbwè mu Butumbi, pàdì diyì dilòòlò edi dikwaciìbwè pa mukàbà wà mêtì? *Diyì* dyèbè ndikwata pa mukàbà. Meeji èbè mmakwata pa mukàbà. “Anu mudi muntu wèla meeji munda mwà mwoyi wèndè amu, ki mudiye.” Mònaayi, diyì dyèbè dìdi ne mwadi mukolè mu Dyulu kutamba dyèbè... Ndi nswa kwamba ne, meeji èbè àdi ne àkula bikolè mu Dyulu kupita diyì dyèbè pa buloba. Ncyà bushùwà, ke mùdìbi’s. Nzambi mmumanye meeji ne mapàngadika à mu mwoyi, Yéyè mmumanye byônsò abi’s.

¹⁹⁴ Wàkambilà Bâfaalèsà ne: “Nwêñù beena lubombo aba, mmunyi munùdì mwà kwakula bintu bîmpè, pàdibi ne bìdì byule tèntè mu mwoyi ke bìdì mukana mwàkula? Numbiikila ne: ‘Mulongeshi, mwîmpè,’ kàdi ndi mumanye ne, ndi mwà kutangila ànu munda mwêñù mene amu ne kumònà ne nudi beena lubombo. Ki ncinùdi nuswa kwamba to.”

¹⁹⁵ Kaa, aci necìikale cinyi mu ditùkù adi pààkungula *Diyì* dyà mâyì àbûngi adi, bikondo byàbûngi byà èkèleeyiyà munkaci mwà kudifwimba?

¹⁹⁶ Mpindyewu ndi njinga kunukonkaku cintu kampànda cikwabo. Lekelaayi nnwâmbilèku cintu kampànda nwêñù bàdi basungidìibwe, anyishaayi nnwâmbilè bwalu ebu.

¹⁹⁷ Mpindyewu, wêwê musùùkà mupàmbuke, wêwê mupàmbuke mukwate ne byà luse udi munkaci mwà kupàmbuka mutangile ku cîsâbàsabà cinène kwaka wàwa, wàdimuka's. Neciìkale cintu cyà cyenza bwôwà paùdì mumanye ne kakwakwikala disùngidiibwa bwèbè dîbà adi to. Kwena mwà kusùngidiibwa dîbà adi to, udi mumanye ne kabütù kèèbè kàdi ànu kumpàla kwèbè aku's. Pèbè mumanye ne mu tusunsa tukesè cyanàànà neùmvwè Dîyì adi dyàkula ne: "Ngumukilaayi apa, nwêñù beena mudimu bâà bubì, mu kapyà kàà kashidi kàdì kàlongolwela dyabùlu ne banjèlò bêndè aku." Neùmanye paùmvwà bibila binène abi bikungula ne mèyì à masangisha awu, pawikala munkaci mwà kupicila ku cintu aci. Kaa, ncintu kaayipu cyà cyenza bwôwà, ncilòòtâlòòtâ kaayipu's wè! Kanwitabiku bwà cinwenzekele to, nwêñù cisàmbà. Nyingàlalaayi, diteèkaayi mu bulongame ne Nzambì mpindyewu, panùcidìku mwà kuditèèka mu bulongame apa.

¹⁹⁸ Mpindyewu ndi njinga kunukonkaku cintu kampànda cikwabo. Ncinganyi cîdìku citambe kusheema bwà muntu udi mwèle lwongo, bu kudyadija lwà mwinshi mwà mucì mubishi, bwà kuumvwa mùdì kasùlù kakesè kàsàba? Kaa! Ki Èkèleziya awu musòmbèle mu myaba yà mu dyulu ne Dîyì dyà Nzambì munkaci mwà kusàba ne kalolo kônsò ne dyàkulangana naabo dîbà adi. Nudi numòna cîdì bwalu anyi? Ndipiìsha dyà ngènzaàmpèkààtù, ne dibènesha dyà musùngidiibwe. Muntu udi mwèle lwongò lwà bwâtù bwèndè pa Lubwebwe Kilistò Yesù, ne musòmbe ànu cyanàànà ne ùtèeleja, mùshindù mwine ùdiye mwà kwikisha's wè! Kubwela mu diikisha adi's.

¹⁹⁹ Mùshindù mene ûntù njinga kufika mwaba ùtù mâyì apweka's. Twêtù bayè mu dilòba anyi nî ncinyi cyônsò, ntu ànu nteeta misangu yônsò bwà kupeta mwaba ùtù mâyì àsàba, bwalu bïdi ànu bikwikishisha. Nudi nucyumvwa ànu cyàkula bufuku bujima. Kaa, ekèlekèle!

²⁰⁰ Kî mbilenga anyi paùdì bulelèlè mwà kwela lwongò lwà musùùkà wèbè munda mwà Kilistò, mu mwaba bu nàñku too ne paùdì mwà kushààla mupùwe kumpàla Kwèndè? Nènku kutèeleja Dîyì Dyèndè dyàkula neebè ne: "Mêmè ki Mukalenge udi ukwondopa. Mêmè ki Mukalenge udi ukupa Mwoyi wa Cyendèlèlè. Ndi mukunange. Mvwa mukumanye kumpàla kwà difùka dyà dyulu ne buloba. Ndi mufundé dînà dyèbè mu Mukàndà, wêwê udi Wanyì. Kùciìnyi to, m'Mêmè. Kùùmvu bwôwà to, Ndi neebè." Pashiìshe ndi ngimba ne:

Ndi mwèle lwongo lwà musùùkà wànyì mu
mwaba wa diikisha,
Ncyàkwendela kàbìdì pa mbû yà lwonji to;

Cipeepèlè cikolè cidi mwà kutuuta eku ne eku
cyà Iwonji, cyà cipùpu cikolè;
Kàdi mu Yesù ndi mu dikùbiibwa kashidi ne
kashidi.

²⁰¹ Vùlukààyi ne, Dìyì mene dìdì dyàkula neebè ne kalolo, nedipiishe ngènzàmpèkààtù. Mvùla wa cipùpu mene wàkasùngila Noà awu, wàkabütula ngènzàmpèkààtù. Nudi buumvwé cíndì muswe kwamba aci anyi? “Dìyì dyà mâyì àbûngì.”

²⁰² Tàngilààyi mpindyewu ne: “Nsuki bu myôsà yà mùkòòkò, ne mésù bu ndimi yà kapyà, makàsà bu cyamù cyà kabanda, ne Dìyì dyà mâyì àbûngì.”

*Ne ùvwa ne mitootò mwandamutekète mu cyanza
cyèndè cyà dyàbalùme: . . .*

²⁰³ “Mitootò mwandamutekète.” Mpindyewu twàngatààyi mvensa wa 20 mwaba ewu mene:

Ne bwalu busokoka bwà mitootò mwandamutekète
iyùvàmònu mu cyanza cyànyì cyà dyàbalùme
ayi, ne bitèèkedi byà myêndù byà ngôlò
mwandamutekète. Mitootò mwandamutekète ayi
yìdi banjèlò mwandamutekète (anyi misànjeelà
mwandamutekète, bambi mwandamutekète) bâà
èkèleeziyà mwandamutekète: ne bitèèkedi byà myêndù
mwandamutekète byûdì mumònè abi bìdi ng’èkèleeziyà
mwandamutekète.

²⁰⁴ Ùdi ùmuumvwijaci bwà kakwikkadiku ntùpàkànyì nànsha mikesè to. Mwanjèlò bwà cikondo ne cikondo cyà èkèleeziyà. Kaa, aci's necììkalè cilenga be, lumingu elu, patwàlukilà mu maalu-malonda mwàmwa bwà twétù kwangata banjèlò abu ne kumònà mudimu mwine wa bwambi ùvvabo naawu awu. Bavwa ne mudimu wa bwambi ùmwèùmwè awu. Byà mwomùmwè ànu menemene munda mwà cikondo cijimà aci mu Èkèleeziyà mukesè awu.

²⁰⁵ Kukaadi cikondo kampànda, muntu mukwabo kwamba ne: “Udi mumanye’s, èkèleeziyà wa Kàtòlikè, kùtu kasùmwìnù kímpè, kàà ne: ‘Ng’èkèleeziyà mulelèlè bwalu mmutwè makàsà pansi munda mwà bikondo byônsò.’”

²⁰⁶ Mêmè ne: “Aci kí mbwalu busokoka to, pavwayi ne bukalenge bwônsò ne bikwàbò byônsò abi paanyimà apu, nènku’s ki mwàkatwayi makàsà pansi ne kutàmba bipùpu bikolè. Kàdi bwalu busokoka kundi mêmè mmùshindù ùvwa kasùmbù kakesè, kancìng aku mwà kutamba cipùpu cikolè aci, bôbò bàvwa basaaya ne nsî, ne bakùpila nyama yà ntambwe, ne basunsulula, ne badya, ne bwosha, ne kùdì nyama yà ntambwe... ne bashebeya ne bikwabo byônsò, ne mùshindù wàkapandukabokù.” Bìdi bileeja ne cyanza cyà Nzambì ciwva

naabo. Kwajiki. Kàdi nànsha leelù ewu Bukénkè bwèndè bùcìdi ànu beutema. Amen! Èyowà's, mukalenge!

²⁰⁷ Mpindyewu: "Mitootò mwandamutekète yìvvà mu cyanza Cyànyì cyà dyàbalùme ayi." Ùvwa ne mitootò mwandamutekète mu cyanza Cyèndè cyà dyàbalùme, cìdì cyumvwija bambi mwandamutekète bàà bikondo mwandamutekète. Kaa, abi's—abi's mbilenga be. Mùshindù utùdi twalukila bwà kwangata mwambi awu—awu wàkatwadila èkèleeyiyà wa Efeso Mukenji awu's. Nènku mwambi wàkatwala Mukenji ne kuWàmbula too ne ku lufù, too ne ku èkèleeyiyà wa Seemùnà mwàmwa, ne kùdì èkèleeyiyà wa Peegàmo, wa Twatilà, ànu nànku mu bikondo byônsò, nànsha ne mu cikondo eci patudi twakulangana apa. Bambi bààkalama ne kutwala Bukénkè abu, ne kuBùlama ànu muvwabu bwà ku muji ku cibangidilu amu, ne kutwalabo Bukénkè mu yéyè amu.

²⁰⁸ "Ùvwa mubakwate mu cyanza Cyèndè cyà dyàbalùme." Elààyibi meeji's! Cyanza cyà dyàbalùme kî mbwena kwamba menemene bu ne Kilistò mmusòmbe ku cyanza cyà dyàbalùme cyà Nzambì nànsha. Kî mbwena kwamba ne Nzambì ùdi ne cyanza cyà dyàbalùme to, bwalu Nzambì n'Nyumà. Kàdi Kilistò nguvwa cyanza cyà dyàbalùme cyà bukolè. Muntu udi ku cyèbè cyanza cyà dyàbalùme, mmukwènù—mukwènù udi mwimane ku luseke lwèbè aku, udi mutambe kwikala pabwípi neebè awu's.

²⁰⁹ Nènku, vùlukààyi ne, mìtootò mwandamutekète ayi yìvwa mu cyanza Cyèndè cyà dyàbalùme. Anji elààyibi ànu meeji, bàvva basunyina nzembu yàbò, Bukénkè bwàbò kùdìYe. Bavva mu kaabujimà mu bukòntonyi Bwèndè, mu cyanza Cyèndè cyà dyàbalùme. Kaa! Musadidi yônsò mulelèlà wa Nzambì ewu ùdi mùshindù ùmwèùmwè awu. Mukwata mu... Nganyi udi mwà kubenzela bibì? Nganyi udi mwà kubenzela bibì? Bu mwàkeela umwe wa banjèlo lubila kale ku cibangidilu aku. Vùlukààyi ne *mwanjèlò* udi ùmvwija ne "mùsànjeelà." Tudi tubwela mu maalu à ndondo awu pashìshe mu lumingu emu. *Mwanjèlò* mbwena kwamba ne "mùsànjeelà." Ki yéyè ne: "Ncinyi cìdì mwà kutùpandulula ne dinanga dyà Nzambì dìdì mu Kilistò? Ke disaamà anyi? Ke njiwù anyi? Ke butakà anyi? Ke mwele wa mvità anyi? Ke lufù anyi? Ndi mutwishiùlbwe" mwàkamba Pôlò, "ne kakwena cintu nànsha cìmwè cìdì mwà kutùpandulula ne dinanga dyà Nzambì dìdì mu Kilistò to," bwalu tudi badilambule mu kaabujimà ku cyanza Cyèndè cyà dyàbalùme.

²¹⁰ Muntu kampànda wamba ne: "Munsantu mubunguluki wa mu malaba! Munsantu mubunguluki wa mu malaba!" Aci kacyena cimutacisha to nànsha kakesé. "Wéwé's udi mukoleshì wa maalu wa mu ntèndeelul!" Kabéena nànsha bacitéèleja to. Mbadiłambule mu kaabujima ne basunyina Mwoyi wàbò ku dibòkò Dyèndè dyàbalùme dyà bukolè, uleeja Bukénkè Bwèndè mu kalolo, ne musàngeelu, ne bupolè, ne lutùulu; bimanyinu, ne maalu à kukema, ne bishima. Bàà pa buloba baCibiìkile

ne “mmupongo,” cyônsò cìdìbo baswè aci, kabyena ne cìdibì bishintulula to, bwalu tudi bamanye ne tudi badìlambule ne tudi mu cyanza Cyèndè cyà dyàbalùme. Abi kî mbilenga bilayà anyi? Ekèlekèle!

²¹¹ Mpindyewu tulwijakajààyaaku, bwalu katwena baswè kunùcyòkesha to. “Mu cyanza Cyèndè cyà dyàbalùme, mìtootò mwandamutekète.”

²¹² Mpindyewu cimfwanyi cyà mwandamutekète ne cyà ndekeelu cyà mupersona Wèndè:

...ne mukana mwèndè muvwa mupatuka mwelè wà
mvitâ mutwisha nseke yibidî:...

Mvwa muswe kwamba ne, aci ki ciisambòmbò.

...mukana mwèndè muvwa mupatuka mwelè wà
mvitâ mutwisha nseke yibidî:...

²¹³ Mpindyewu, Dîyì dyà mâyì àbûngì, ne mukana Mwèndè...
Mu cyanza Cyèndè cyà dyàbalùme Ùvwa ne mìtootò.

...ne mukana mwèndè muvwa mupatuka mwelè wà
mvitâ mutwisha nseke yibidî:...

²¹⁴ Mpindyewu, nudi bamanye cìdì mwelè wà mvitâ musakisha nseke yibidî wa mu Bible awu anyi? Twànjì tucìbàkùlaayi ànu bwà nwénù kumanya. Twàngataàyi Ebèlu 4.2, alùkilaayibi ànu dibéji dìmwè paanyimà anyi àbìdì nènku nenùcipe, nwamònù's. Ebèlu ùdi ùsanganyiibwa ànu paanyimà pàà Bwàkabuulwibwà apa; Yuda, ne pashiìshe ng'Ebèlu's. Mpindyewu, cyumvwaayi bîmpè mpindyewu. Anyi...Ebèlu, nshapità mwi4 wa Ebèlu, ki cyôcì eci. Eyo, Ebèlu nshapità mwi4 ku mvensa wa 12:

*Bwalu dîyì dyà Nzambì didì ditamba kuya lukasa
ditambe bukolè, ne nditambà kusakisha kupita mwelè
wà mvitâ kanà wà nseke yibidî ewu, dibwela mene too
ne ku ditapulula dyà musùükà ne nyumà, ne manungu
ne bwôngù bwà mifuba, ne didi dijinguludi dyà meeji ne
mapàngadikà à mu mwoyi.*

²¹⁵ Nènku dîbà adi bâdi bâkubììkila ne “mubadi wa meeji.” N'Dîyì dyà Nzambì dimwènèshìibwe mu Èkèleziyà Wendè's wè! Ditamba kusakisha kupita mwelè kanà ônso wà mvitâ wa nseke yibidî ewu. Amba tûng, s'nyewù ngédi meeji ku cintu cikwabo mwab'awu. Ncyêna mumanye ní ndi mufünde Mufundi... Twàngataàyi Bwàkabuulwibwà 19, bwà katancì kakesè cyanàànà. Twàngataàyi cyàkàbìdì eci, ngeela meeji ne ncyà bushùwà. Ndi pàmwâpa...Bwàkabuulwibwà 19, lwà ku 11 aku:

*Ki mêmè kumònà maulu munzùlùke, ne mònàayi
kabalu katòòke;...(Ki katòòke kàlwalwà aka
cyàkàbìdì, cilumbulwidi)...ne ewu uvwa
mushikàmepù ùvwa ùbììkidiibwa ne Wa lulamatu ne*

Mulelèlà, ne mu bwakane ke mùdiye... ulumbulwisha ne wenza mvitâ. (S'nudi bamanye ne nganyi mwine awu, kî mmwômò anyi? Èyo.)

Mêsiù èndè àwwa... bu ndimi yà kapyà, ... (Yéyè ùvwa nganyi?)... ne pa mutù wèndè pàvwa... bifulu byà butùmbi; ... (Ah-kaa. Yéyè ùkaadi mumane kubwela mu bukalenge mpindyewu.) ... ne yéyè ùvwa ne... ne—ne ùvwa ne dînà difûnda, dìvwà muntu nànsha umwe kàyi mumanye to, pakuumusha... yéyè mwine.

Ne ùvwa muuwâle cinkùtù cizabika mu mashì, ne dînà dyèndè dìdi dibùkidiibwa ne Dîyì dyà Nzambì.

²¹⁶ Cyàkapatuka mukana Mwèndè ncinyi? Cyàkapatukà ncinyi? Mubàndi wa pa kabalu katòòke awu. Ne Bwàkabuulwibwà, kàbìdì, 7, pàvvà... ngeela meeji ne 8. Pàvvà kabalu katòòke... to, m'mwi6. Pààkapatukà mubàndi wa kabalu katòòke, Wàkapèèbwa bu—butà, bwà kukòòkesha ne kucimuna.

²¹⁷ Ki mwelè wà mvitâ kupatukawu mukana Mwèndè. Ùvwa cinyi? Mubàndi wa kabalu katòòke wa Bwàkabuulwibwà awu's. Mònaayi mwelè wà mvitâ. "Mukana Mwèndè mupatuka mwelè wà mvitâ musàkisha nseke yìbìdì," Dîyì adi. Nènku, ndekeelu wa byônsò, ku Dîyì Dyèndè, pàdìDi dimwènèshìibwe kùdi bânà bônsò bàà Nzambì, Yéyè neàdyatakajè ditunga dyônsò ku makàsà ne Dîyì Dyèndè, ku mwelè wà mvitâ musàkisha ewu's. Tàngilààyi kuneeku cyàkenzekà, patùdì tucyàngata apa:

Nènku... cyanza cyèndè cyà dyàbalùme... ne mukana mwèndè mùvwa mupatuka mwelè wà mvitâ musàkisha nseke yìbìdì: ne mpàla wendè ùvwa bu mütù dîbà dikenka mu bukolè bwàdi.

²¹⁸ "Mwelè wà mvitâ musàkisha nseke yìbìdì." Cìvwà cipatuka mukana mwà muntu ewu ncinyi? Dîyì dyà Nzambì. Mwelè wà mvitâ musàkisha nseke yìbìdì. Ùvwa wenza cinyi? Ùjingulula meeji à mu mwoyi, mapàngadika; ùbwela too ne mu ndondò mene kupita munyiinyi, musunya, tubulubulu twà mashì, ùbwela ne mu mufùba, too ne mu bwôngù bwà mufùba, ùya too ne dyàmwamwà dyà aci, nànsha ne ku dijinguludi dyà meeji ne mapàngadika à mu mwoyi. Ki cìdì Dîyì dyà Nzambì dyenza ncyôci aci.

²¹⁹ "Ne Dîyì dyàkavwijiibwa mubidi ne dyàkasòmbela munkaci mwètù." Nènku mpindyewu Dîyì ndivwijiibwe mubidi mu Èkèleeyiyà Wendè, disòmbe munkaci mwètù. Banjèlò Bèndè mu cyanza Cyèndè, bàkwata mudimu wà bwambi. Nzambì mmutangidile Èkèleeyiyà Wendè. Nzambì mmutweyémene twêtù bàà cikondo eci bwà kutwala Bukènkè bwà Èvànjeeliyò ebu kùdi bukwa panu bùdi bùpùngà ne lufù, buswìkùibwe ku cimpàngaanu, ne ku bilelè ebu's. Nzambì mmutwambike bujitu abu wêwè ne mêmè. Dyàkabi dyètù piikala bampàngaanu mwà kufwa kabàyi bamanye. Kaa, bààkabatwadila dibala, difûnda,

ne dilonga dyà makumi a bishifèri, ne malòòshììlè makesè à butèndeеди, kàdi's mbalwe kwenza ànu mûngà mushiki wà beena kwitabuuja bààbò. Ndi ngàamba mêmè Èvànjeelìyò's wè! Èvànjeelìyò kéné ànu Dîyì nkààyaadi to. Pôlò ngwâkamba nànnku. Pôlò wàkamba ne: "Èvànjeelìyò kààkalwa kutùdì ku Dîyì nkààyaadi to, kàdi ku Dîyì adi dimwènèshììbwe." Pàdi Dîyì, ku Nyumà Mwîmpè, diikale... Dîyì ndikùna munda mwà mwoyi ùdì ne Nyumà Mwîmpè ne didi dipatula cìdì Dîyì dyàmba ne Dyôdì nedipâtule. Ne Dîyì didi mwà kujingulula meeji à mu mwoyi! Butùmbi's wè! Kaa, ekèlekèle! Kaa! Dijinguludi dyà meeji ne mapàngadika à mu mwoyi, s'ki cìdì Dîyì.

²²⁰ Dìpàtuka mukana Mwèndè, mwelè wà mvità musàkisha nseke yibìdì, ùtâbuluja bampàngaanu's. Bikèngela bwà cintu kampànda cyenzeke dimwè dyà ku matùkù àdì pansi aa. Èyowa! Dîyì dyà Nzambì, Dînà Dyèndè dìvwa Dîyì dyà Nzambì, Dîyì dimwènèshììbwe. Tàngilààyi, Yesù wàkamba ne: "Ndaayi pa buloba bujima," Maako 16, Mèyì Èndè à ndekeelu à dilayangana ne èkèleeziyà kumpàla kwà kupingana Yè bwà kuDìbuulula mu cikondo cyà èkèleeziyà. Wàkatùma Èkèleeziyà ne mudimu ne: "Ndaayi pa buloba bujima nùkayiishe cifùkùlbwà cyônsò Èvànjeelìyò." Cinyi? Kuyiisha Èvànjeelìyò. Maako 16: "Nuiishe cifùkùlbwà cyônsò Èvànjeelìyò." Ncinyi ciine aci? Mu ngaakwilu mukwàbò ne: "kuleeja patòòke bukolè bwà Nyumà Mwîmpè," bìvwa bikèngela bìlkale nànnku's.

²²¹ Mpindyewu tàngilààyi, "kùdì yônsò..." Ki ng'ànú kulongesha Dîyì to; Kààkambaku ne: "Ndaayi nukalongeshe Dîyì to." Yéyè wàkamba ne: "Ndaayi nukayiishe Èvànjeelìyò." Kî nkulongesha Dîyì to, kuyiisha Èvànjeelìyò. "Ne bimanyinu ebi nebìfile aba bìtabuuja Èvànjeelìyò ewu; mu Dînà Dyànyì bôbò nebìipate badémons, nebààkule myakulu mipyamipyà, bôbò mwà kukwata nyoka anyi kunwa cintu cyà cishebeyangana kî ncifwanyine kubenzela bwalu bubì to; bôbò batentèkele babèèdì byanza, babèèdì nebàsàngale."

²²² "Ki kupàtukabò," mwàkambà Mufùndu, "bayiisha myaba yônsò; Mukalenge ukwata naabo mudimu, ûshindika Dîyì ne bimanyinu byènda bilonda." Ki Èvànjeelìyò nyéyè awu, Èvànjeelìyò dileeja patòòke.

²²³ Bimanyinu ebi nebìfile bûngì kaayi? Too ne ku ndekeelu kwà buloba, ku cikondo ne cikondo cyônsò. Ki banyààbanyà abu benda bâtungùnùka, balame Bukénkè abu. Kabyena bikemesha to pààkamba Yesù ne: "Kanùciinyi to, nwêñù kasùmbù kakesè kàà mìkòòkò, ndiswa dîmpè dyà Taatù wenù bwà kunùpèësha Bukalenge." Kasùmbù kakesè kàà mìkòòkò; mbanyààbanya misangu yônsò, kî nciibûngì nànnsha.

²²⁴ Èyo, mpindyewu dîyì dyamba dikwabo dìmwèpelè. Nènku tudi twangata wa 20, nànnku mpindyewu twänjì tumònààyibi mwaba ewu ku mvensa ewu mwaba ewu. Mpindyewu wa 16:

*Nènku ùvwa ne mìtootò mwandamutekète mu cyanza
cyèndè cyà dyàbalùme: . . .*

²²⁵ Mpindyewu twàngatààyi . . . ne kùdì . . . Mpàla Wendè:

*. . . mukana mwèndè mùvwa mupatuka mwèlè wà
mvità musàkisha nseke yìbìdì: ne mpàla wendè uvwa bu
dibà dikenkesha mu bukole bwàdì.*

²²⁶ Nwênu babuulùlè mu . . . twanjìbi kumònà tûng, Maatààyì 17. Twàngatààyi ànu mwaba ewu mene patùcìdipu apa; pa nànkú tudi ànu tucìkenketa, ne bààbûngì bàà ku bantu bàdì bacyàngata abu, tûbàlekela . . . anyi bâcifùnda, netùbàlekele ànu bâcìbàlè bwà twamònà mwà kumanya.

²²⁷ Maatààyì 17, èyo:

*. . . paanyimà pàà matùkù àsambòmbò Yesù kwangata
Peetelo, Yakòbò, ne Yone . . . ku mukuna mutùmbuke
kule,*

*Ne wàkakùdimuka mpàla mwìsù mwàbo: ne mpàla
wendè wàkakenka bu dibà, ne civwàlù cyèndè civwà
citòòke bu bukénkè.*

²²⁸ Wàkashintuluka. CyàkenzaYe ncinyi? Kuditwa Yéyè mwine mu dishintuluka, kubwela ne mu ditükù dyà dilwa Dyèndè. Mpindyewu tàngilààyi, ànu mêmà makesè kumpàla kwà cyôci eci, Yesù wàkatèèla díyì dyamba edi kaaba aka mu nshapítà udi ulonda ewu, “Bulelèlà Ndi nnwàmbila ne, bakwabo bàdì biimane mwab’ewu aba . . .” Mbanganyi bàdi bamanye cîndì njinga kwamba aci? “Bàmwè bàdì biimane mwab’ewu, kabààkufwa to, too ne pààmònàbo Mwânà wa muntu ùlwà mu Butùmbi.” Ncyà bushùwà anyi? Ki kwangataYe Peetèlo, Yakòbò, ne Yone, bantemu bàsàtu abu, bwalu mu Dipungila Dikulukulu mu byônsò, díyì ne díyì dyônsò dikesè, dìvwa dijaadikiibwa kùdì bantemu bàsàtu, ne kubanda nààbò ku mukùna.

²²⁹ Mònaayi cyàkenzekà dyàmbedi. Kaa, ncyéna ànu mwà kwimanyina mwab’ewu to, bìdi bìkèngela ànu bwà mêmè kfika ku eci. Tàngilààyi! Cintu cyà kumpàla cyàkamunabo ncinyi? Bâàkaya ne Yesù ku mukùnà . . . anyì Yéyè ngwakabànda naaboku, ne Wàkakùdimunyìibwa mpàla mwìsù mwàbo, mushintuluke. Civwàlù Cyèndè kukenkaci bu dibà munkacìnkaci mwà bukolè bwàdì, ne kùdì Ye aka kwàkamweneka Môsà ne Eliyà. Mmu mmwenekelu kaayi mulwalwà Mwânà wa muntu mpindyewu? Nènku dyàmbedi, neàmwèneke, nekwikale Môsà ne Eliyà.

²³⁰ Mpindyewu, mònaayi, kumpàla kwà Yesù kwalukila pa buloba . . . Mpindyewu, eci ndambù kumpàla kwà dibà, kàdi Nyumà wa Eliyà neàpingane pa buloba bwà kwaluja myoyi yà bânà kùdì baataatù. Bible ngudi mwambe nànkú. Yesù wàkamumònà kaaba aka, bapostòlò bààkamumònà kaaba aka, dilondanga dyà dilwa dyà Mwânà wa muntu

mutumbìshìibwe. Bìkèngela Yéyè àtumbishiibwè ne àlukile. Cintu cyà kumpàla, bangabanga ne kuMumònabo, cìvwa ncinyì? Eliyà. Pashiìshe cinyì? Môsà; Izàlèèlè munkaci mwà kwalukila kuntu kwàka, balami bàà mikeni. Ne pashiìshe Mwâna wa muntu mutumbishìibwe. Àlèluuyà! Nudi numòna dilondangana dyà dilwa Dyèndè anyi? Nyumà wa Eliyà, anyì bujaadiki bwà cikondo cyà ndekeelu cyà èkèleezìyà. Nwamònù's, ulwa mu bukolè bwà kuMumwènesha.

²³¹ Pashiìshe beena Yuda binunu lukàmà ne makumi anaayi ne binaayi bwà kudìsangabò pa Mukùnà wà Sinààyì, mwaba ùdì Izàlèèlè mushààla ditunga yéyè mwine; ditunga dyà kale ne kalèèle pa buloba, dìbèndelà dyà kale ne kalèèle ku wônsò à pa buloba; bâdi ne ditunga dyàbò sungsunga, dìbèndelà dyàbò sungsunga, cilwilu cyàbò sungsunga, mfranga yàbò sungsunga, ne bikwàbò byônsò. Bâkaadi cìmwè cyà ku bidimba byà nsangilu yà matunga bwalu bâkaadi ditunga. Yesù wàkamba ne kabìvwa bìkèngela bwà kwikalabò biimanshìibwe too ne piìkalà bintu byônsò byûle to.

²³² Bwalu busokoka bwà mùshindù ùvvà musùmbà wà beena Yuda, mukèngèshiibwe myaba yônsò, ne biipàcìibwe, ne beediìibwe mbilu ne biimanshìibwe, bu mùvvà Èkèleezìyà munda mwà bikondo byà dibèngiibwa ebi, kâdi Yesù wàkamba kâbìdì ne: “Panwàmòna mucì wà mfigi wela ntòngà, ditunga adi dyàlukila cyàkâbìdì bwà kwikalala ditunga, cikondo cìkaadi pabwípi, nànsha ku ciibi mene. Bulelèlè Ndi nnwàmbila ne, lükòngò Elu kalwàkujimina bintu byônsò ebi kabiyì byûle to.” Dilubakana edi... Bantu aba kabààkujiminaku to. Hitler wàkateeta kubashipa, Mussolini wàkateeta kubashipa, Stalin wàkateeta kubashipa, bantu bakwabo bônsò, kâdi kabààkwikalà ne katòba to, anyi babùtula pa buloba nànsha, nebiìkalè cisàmbà ne ditunga biimane kuntu kwàka. Amen!

²³³ Nekùlwé Môsà ne Eliyà. Kaa! Ndi ntèkemena ne nudi bacyúmvwè.

²³⁴ Èyo, “Dìbà dikenkesha mu bukolè bwàdì,” mpàla Wendè, mushintùlùdììibwe, mukùdìmuke. Mpindyewu cikwàbò cintu, mu Bwàkabuwulwibwà 21:23, panwìkala baswè kucifùnda. Mu Yélusàlèmà Mupyamùpyà, 21:23, Yéyè m’Mwâna wa mùkòòkò udi mu Cimenga, udi Bukénkè bwàci, bwikalale bùkenka; bwalu kabavwa dijinga ne bukénkè mu Cimenga aci to, dìbà kadyàkujuukamu to, bwalu Mwâna wa mùkòòkò udi munkaci mwà Cimenga awu ki wíkala Bukénkè bwàci. Ne matunga àdì masùngidììbwe neènede mu Bukénkè bwà Mwâna wa mùkòòkò! Amen! Yéyè ki Bukénkè bwà Mwâna wa mùkòòkò. Kaa, kanwenaayiku ne disànkà bwà bwalu abu anyi?

²³⁵ Kaciyi ànu aci to, kâdi Yéyè ùdì kâbìdì, mu dilwa adi (Yone wàkaMumònà mu ditùkù dyà Mukalenge), Dìbà dyà

bwakane. Tuyaayi ku Maalàki. Maalàkì, mupròfetà wa ndekeelu wa Dipungila Dikulukulu. Maalàkì, nshapità mwi4.

²³⁶ Mvwa ne kaabwalu kakesè kàà kulonda bwà mukàjàànyì wa mushinga mukolè udi musòmbe paanyimà pààpa wàwa. Ngâkamunwishila mâyì ku lusona kumpàla kwà twêtù kuselangana, ngâkateeta bwà kucilongolola paanyimà pàà bamane kuselangana. Nènku ncìvwa mumanye ne mvwa muswè kusela kàbìdì anyì to, ki nànku awu yéyè kucìbuluka yéyè yônsò. Nènku mvwa ndyambidila ne ùvwa mwânà wa bakàjì mwîmpè bikolè bwà kumulekela aye, bwà mulùme kampànda mwîmpè kumusèlaye uvwa mufwànyine kumukòwelela. Nènku mêmè kudyambidila ne ncìvwa mene mucìkumbànyine to; ne ncyêna ànu mukumbanyine to, bwà bwîmpè bwèndè abu, mu mìshindù yônsò. Pa nànku yéyè wàkacibuluka yônsò ne kààkamanya cyà dyenza to. Eci's nkukaadi bidimu, kukaadi bidimu bitwè ku makumi àbìdì. Wàkatàmba kucìbuluka bikolè, kubangaye kudila butùku ne muunyà. Nènku mvwa nteeta bwà kukosa nendè malanda, kabiyi ne mbwalu ncìvwa mumunange to, bwalu ncìvwa muswè kumupicishila dîbà dyèndè to; bwa, kumulekela apete muntu kampànda, muntu mwîmpè, bwalu yéyè mmwânà wa bakàjì mutambe bwîmpe bikolè ànu bwà kutùngùnuka nànku, nènku mêmè kwangata... ànu bwà kupatuka nendè ne bintu byà mìshindù awu. Ki mêmè—mêmè kudyambidila ne yéyè ùvwa munrange, ne mvwa mumanye ne mvwa mumunange. Ki dîbà adi mêmè kudyambidila ne: “Èè, nênditacishè ànu bwà... Nênkebè ditùkù kampànda bwà kupàtuka ne nsongààkaji mukwàbò, bwà kumufikisha ku dinguumvwila bibì.” S'mvwa kwikala mumushipe, byàkantonda bibi bikolè paanyimà pàà matùkù; yéyè wàkacibuluka yônsò. Mêmè kumwambila, kwamba ne: “Wêwè udi ànu mwânà wa bakàjì mwîmpè be, ncyêna—ncyêna muswè kukupicishila dîbà dyèbè mìshindù awu to.”

²³⁷ Ki yéyè ne: “Kàdi mêmè—mêmè ndi mukunange ànu wêwè, Bill, ne wêwè's ki umwèpelè ûndì mwà kunanga.” Yéyè ne: “Ntu—ntu ànu mukunange misangu yônsò.”

Mêmè ne: “Mêmè—mêmè ntu mwanyishe ciine aci. Kàdi,” mêmè ne, “udi mumanye's,” mêmè ne, “mêmè ntu mudyambike wa mu cipèèla.” Mêmè ne: “Mêmè—mêmè nêngìikalè ànu ne nsòmbelu bu wa mudyambike wa mu cipèèla. Wamònou's, mêmè—mêmè ncyàkuselanganaku to nànsha kakesè.”

²³⁸ Nenku ùvwa musùminyinekù bikolè, nudi bamanye's, mukwàcikwètù. Ki kupàtukayè kuya ku—ku kaacisaasa aku. Nènku kufikaye kuntwaku, ne kutwaye binù, ki kwambaye ne: “Mukalenge, mêmè ncyêna mumanye cyà dyenza to. Ncyêna—ncyêna muswè kuKushikukila to, kàdi pàànyì munange Bill, ne ncyêna mumanye cyà dyenza to. Mukalenge, Udiku mwà kumpa ndambù wa disambibwa anyì? Udiku mwà kunkwacisha ndambù anyì? Kacya ncitu mwanji kuKulòmba bwalu ebu

kwônsò ne kwônsò eku to kacya bandela, Mukalenge, ne ndi ntèkemena ne kabyàkukengela bwà mêmè kuKulòmba kàbìdì to,” yéyè ne: “kàdi bu Wéwè ànu mwà kunkwacishaku, ne kundekela nkangula Bible ewu, ne Wéwè kumpa Mufùndu kampànda. Ntu muumvùmvwe bantu bàmba ne Wéwè utu mwenze nànkú.” Nènku mmwenze ànu uwùkangula, civwa m’Maalàkì 4:

*Mònaayi, Ndi nnupa... anyi nnutumina Elìyà
mupròfetà kumpàla kwà ditùkù dìdì—dìdì dikwacisha
bwôwà dyà MUKALENGE adi:*

²³⁹ Yéyè ne: “Mêmè kuuuka mwaba awu mwikale ànu mutwishiìbwé ne netùselangane ànu bu cintu kanà cyônsò eci.” Nwamònù anyì?

*Bwalu, mònaayi, ditùkù dìlwalwa, dììkalà mwà
kwosha bu mfuulù; ne badítambishi bônsò, èyo,...aba
bônsò bàdì beena lwonji, nebììkale nsona: ne ditùkù
dìlwalwà nedììkale mwà kubòòsha, mùdì MUKALENGE wa
bililu wàmba, ne kadyàkubashììlaku nànscha muji anyi
ditàmbà nànscha.*

*Kàdi bwènù nwènù bàdì baciina dìnà dyànyì...
Dibà (D-í-b-à) Dibà dyà bwakane nedijuuke diikale ne
lwondapu mu mapwapwà ààdì;...*

²⁴⁰ “Dibà diikale dìkenka mu dikàndà dyàdì.” Kaa! Dikàndà dyà Mwâna wa Nzambì diikale dìkenka munkaci mwètù dilòòlò edi. Mwimane munkaci mwà bitèèkedi byà myêndù mwandamutekète mu buumuntù Bwèndè misangu mwandamutekète mwab’ewu bu nzugi. Bu Ewu wâkakèngà ne wâkatùfwila awu, ne wâkambula cilumbulwidi cyà Nzambì pambidi Pèndè, ne wâkadyata ku makàsà cikaminu cyà mvinyo, wa ciji cikolè cyà Nzambì awu. Bwà ngènzàmpèkààtù Yéyè ùdi cisàbàsaba cyà cikwàcishà bwôwà, bwèbè wêwè musùùkà mujimine ùdi pa mbû wa mwoyi. Nènku bwà Èkèleeziyà, m’Musùngidi wà kalolo, mwele lwongo mu diikisha, ne munkaci mwà kutèèleja kasùlù kàà mâyì kàsàba paùdì mudyàdije ne mwikishe musankishììbwé menemene mu Kilistò. Cikondo kaayipù’s wè! Mwikale utukenkeshila ne nsesà Yèndè yà luuya ne: “Kanùciìnyi to, Ndi Ewu wàkadiku, udiku, ne wâlwa awu. Ndi wa Bukolè bwônsò, pa kuumusha Mêmè kakwèna mukwàbò nànscha umwe to. Ndi byônsò bìbìdì Alpha ne Omega, ne kùdì ewu udi ne nyòtà Mêmè némmupèèshè mishimì yà mâyì à Mwoyi cyanàànà.” Kaa, mulayi kaayipu’s ne mwandà wà dinanga kaayipu’s wè! Ne Mwâna wa mùkòòkò munkaci mwà Cimenga cìdì kaciyi cìkèngela bukénkè aci, ne Yéyè ùdi Dibà dyà bwakàne ne dyondopa mu mapwapwà Èndè.

Yéyè ke Mbata wa mu Cibanda, Mùtootò ùdi
ùbàlakana wà mu Dìndà,
Yéyè ki udi mutàmbe bulenga mu binunu
dikumi bwà musùùkà wànyì;

Mu tunyinganyinga Yéyè ke bwànyì busàmbi,
 mu lutatu Yéyè ke cisokomenu cyànyì,
 Mmungambile bwà mmupwile ntatu yànyì
 yônsò.

Àlèluuyàh!

Yéyè ke Mbata wa mu Cibanda, Mùtootò ùdì
 ùbàlakana wà mu Dìndà,
 Yéyè ki mutambe bulenga ku binunu dikumi
 bwà musùùkà wànyì.

²⁴¹ Èyowa's, mukalenge! Kaa, Mùtootò munène wà mu Dìndà awu pàdìwu wùpàtuka bwà kukanwa, usekeleela ditùkù dìlwalwa adi, wàkula ne civuma, wàmba ne: "Ditùkù dìdì pabwípì ne kumweneka, Mwâna awu wàtambi kuseemena," ne Ùdi ùDikokela paanyimà pàà mìtootò mikwabo yônsò (Kaa, ekèlekèlè.) ne dyondopa mu mapwapwà Èndè.

²⁴² Mpindyewu twàlukilààyi ku mukenji wètù. Nènku tukààdi tujikija mpindyewu, bwà kudilongolola bwà mààlabà dilòòlò, bwalu nkushààle tusunsa dikumi ne tutaanu bwà dìbà citèèmà, katwena baswe kulama muntu nànsha umwe ntanta mupitepite bule to, ànu bwà twàmòna mwà kwikalà kaaba aka.

²⁴³ Èyo, Dìbà dyà bwakane ne dyondopa mu mapwapwà Ààdì. Mpindyewu mmwenekelu Yèndè. Yéyè uvwa nziji, anyi cintu cikwabo bwà kuleeja ne ùvwa mubwele mu ditùkù dyà Mukalenge. Nudi nwitatuuja nànnku anyi? Wàkaya kabwela mu ditùkù dyà Mukalenge ne kumònaye Mukalenge bu nziji; kàiyì bu mwakwidi to, kàiyì bu mfùmù to, kàdi bu nziji. Yéyè n'Nziji. Kanwena nwitatuuja aci anyi? Bible ùdi wàmba ne Yéyè n'Nziji. Kàdi's ki Yéyè ewu muvwale bilàmbà ànu bu Nziji, uleeja cyàkenzaYe aci; civwàYe aci: civwàYe bwà ngènzàmpèkààtù, civwàYe bwà mwena Kilistò. Nènku ke Yéyè ewu mwimane mpindyewu ne Dîyì dyà mâyì àbûngì, ne mpàla Wendè ùvwa bu mùdì dìbà dikenka mu dikàndà dyàdì.

²⁴⁴ Mpindyewu bipeta, mvensa wa 16. "Nènku . . ." To, mfwilaayiku luse, mmvensa wa 17:

Nènku pângààkamumònà, ngâkapòna ku makàsà èndè bu mufwè.

²⁴⁵ Ekèlekèlè! Mupròfetà kavwa mwà kutwala kàbìdì cintu nànsha cìmwè to, pakumònà cikèènà-kumònà bu nànnku awu. Uvwa—Uvwa mumukama ànu bukolè bwèndè bwônsò, ne kuponaye ànu pansi ku makàsà Èndè aku bu mufwè. Mpindyewu tàngilààyi:

Ne yéyè wàkantentekela cyanza cyèndè cyà dyàbalùme pambidi pàanyì, ùngambilà ne: Kùcùnyi to; mêmè ndi wa kumpàlà ne wa ndekeelu:

²⁴⁶ Kaa, ekelekele! Kayi muprofeta to, Nzambi! "Mêmè ndi wa kumpala ne wa ndekeelu. Mêmè ndi wa kumpala wa Dibuulula, wa ndekeelu wa Dibuulula. Mêmè ki Yéyè wàkadiku awu,

Mêmè ki Yéyè ùdiku awu, Mêmè ki Yéyè wâlwa awu.” Twânjì kumònayibi:

Mêmè ndi . . . Ndi . . .

Ne yéyè wàkantentekela cyanza cyèndè cyà dyàbalùme pambidi pàanyì, ùngambila ne: Kùciìnyi to; mêmè ndi wa kumpàla ne wa ndekeelu:

Ndi ewu udi ne mwoyi, ne uvwa mufwe; ne, mònaayi, ndi ne mwoyi bwà kashidi ne kashidi, (Mpindyewu mene. Ki díbà adi kwelayè lubìllà lukolè ne:) Amen; ne ndi ne nsapi yà iferno ne . . . lufù.

²⁴⁷ Mpindyewu, kanuumvu bwòwà to. Mbwà cinyi butùdì bafwanyine kuciina's? Bwà cinyi Èkèleeyiyà mmufwanyine kupangila bwà kulama Dyèndè . . . bwà kwela meeji ku Dìyì Dyèndè? Twânjì twimanàayi mwab'ewu bwà katancì kakesè cyanàànà, bwalu tukààdi tujikija. Mbwà cinyi bùdì Èkèleeyiyà ewu mufwanyineku kuciina's? Ncinyi cìdìYe kacya mulaye cítùYe kàyì mumweneshe kumpàla kwètù? Bwà cinyi bunùdì bafwanyine kuciïna dinyoka anyi cikondo cyà pashiishe? “Kuciìnyi to! Ndi Ewu wàkadiku, Ewu udiku, ne wâlwa awu. Mêmè ki wa kumpàla ne wa ndekeelu. Mêmè ndi ne nsapi yà iferno ne yà lufù kaaba aka mene.” Bwà cinyi? “Ndi mucimùne ne mucimùne byônsò bìbìdì iferno ne lufù (Abi's mbyônsò bìbìdì lukita ne ngenà; lufù lwine, ngenà mwine's.) bwèbè wêwè. Ndi mubicimùne byônsò's. Ndi mucimùne iferno, lufù, lukita.” PavwaYe pa buloba, Yéyè uvwa ànu mutambe bun- . . .

²⁴⁸ Bantu bààbûngì bààkapatuka bwà kucimuna. Nuvwaku bamanye nànkü anyi? Napoléon wàkapatuka bwà kucimuna buloba bujima, ne wàkacyenza pavwaye ne bidimu makumi asatu ne bisatu. Mu bidimu dikumi ne mwandamutekète too ne makumi àbìdì ne bitaanu, Napoléon ùvwa mukandikyanganyi wa maalà, kàvwa witabuuja dinwa dyà maluvu anyi ní ncinyi ní ncinyi to. Wákaya ku France. Kàvwa mwena France to, ùvwa mufumine ku cisanga kampànda, kuyaye kuntwaku bwà kasombwela France mene bwalu kavwa mumuswe to, kavwa muswe France to. Kàdi yéyè wàkacimunyiibwa's. Nènku kutungunukaye ne kucimunaye France, ne kwangataye beena France abu ne kucimunaye buloba bujima. Nènku pààkakumbajaye bidimu makumi asatu ne bisatu yéyè kusòmbela pansi e kwasaye mwadi bwalu kakuvwa muntu mukwabo nànscha umwe wa kucimuna to, kàdi kufwaye kanwayi wa maalà à kapyà. Mucimunyiibwe, kàvwa nànscha mwà kudicimuna yéyè mwine to. Nwamònú anyi? Nenku pashiishe kutwilanganaye ne Waterloo wendè ku Waterloo, bwalu bwèndè kudikoselabu ku Waterloo. Ntu mukafike kuntwaku ne mumòne bimanyinu bikulukulu byà kale abi byà bishààdila ne bintu kuntwaku, patùvvà tusanganyiibwa mu ditunga amu. Mpindyewu, tudi twangata mucimuni awu,

wàkabanga ùcìdi nsongààlùme ne kwangataye luseke lubì bwà kucìmuna, kàdi kufwaye, bu cintu cyà bundu.

²⁴⁹ Kàdi kwàkalwa mukwàbò Nsongààlùme pa buloba musangu kampànda. Wàkafwà ne bidimu makumi asatu ne bisatu ne Wàkacìmuna byônsò bìvvà mwà kucìmuniibwa abi. PavwaYe pa buloba Yéyè wàkacìmuna nkuka, budìsu, Wàkacìmuna bubèdì, Wàkacìmuna baadémons. PààkafwaYe, Wàkacìmuna lufù. PààkabiïkaYe, Wàkacìmuna iferno. PààkabandaYe ke kucìmuna bintu byônsò bìvvà bilwisha bukwabantu, byàkaya mu cikaminu cyà mvinyo wà Nzambì ne kucìzaazaye ne kucìmuna lufù, iferno, lukita, dìsaamà, bintu byà kwísùkwíssù, bikwabo byônsò, ne kubìcìmuna byônsò, ne kubìika mu ditùkù dísààtu ne kucìmuna byuluulu byônsò byà muulu, ne kukosa difwima dìvvà pankaci pàà Nzambì ne bantu adi, kàdi kutwangaja Dyulu ne buloba pàmwè. Butùmbi's wè! Kaa, ekèlekèle! Yoyøyò!

²⁵⁰ S'ki Yéyè udi mwimane wàwa Mucìmunyi wa Bukolè kacya ànu wàpanda cilàmbà cikudika bipese bìbìdì, s'ki Yéyè awu. Nsapi yà lufù ne yà iferno yônsò milembelele ku luseke Lwànyìaku: "Kuciìnyi to." KutèèkaYe cyanza Cyèndè cyà dyàbalùme (bukolè Bwèndè) pambidi pèndè, ne kumubiisha ku bukolè bwà cyanza Cyèndè cyà dyàbalùme, yéyè ne: "Kuciìnyi to, Ndi Ewu wàkadiku, ne Ewu udiku, ne wâlwa awu. Mêmè ndi wa kumpàla ne wa ndekeelu. Ndi Ewu wâkadi ne mwoyi, ne wâkafwà, ne udi cyàkàbìdì ne mwoyi kashidi ne kashidi. Amen!" Kaa!

Mònaayi! Mònaayi Mucìmunyi wa Bukolè,
Mònaayi! Mumònaayi patòoke tòò,
Ki Yéyè awu mwimane, Mucìmunyi wa Bukolè,
Kacya ànu Wàpanda cilàmbà cikùdika aci
bipese bìbìdì.

²⁵¹ Amen! Kuumushila bantu cipumbishi cyônsò, bwà bààmònà mwà kwikalà batwangajìibwe bu mu budimi bwà Edènà. Mpindyewu, mutu...Nkaavwa muswe kucilama, kàdi nênciyàmbè. Muntu ùtu wa bukolè bwônsò. Kanwêna nwitatuuja aci to, kàdi ke cidiyè. Muntu mudilekelele kùdì Nzambì mu byônsò ngwa bukolè bwônsò. Yéyè kààkambaku, mu Maako 11.22 ne: "Bintu byônsò byûdì wamba, ne kuyi wela mpatà mu mwoyi wèbè to, necyènzeke. Udi mwà kupeta ciwàmbì aci" anyi?

²⁵² Cìdì cyenzeka ncinyi pàdì bàà bukolè bônsò bàbìdì batwilangana? Pàdì Nzambì ne muntu basangila, bààbukolè bônsò babidì, cintu kampànda cìdì ne cyà kunyukuka. Cikampà...Cyônsò cyûdì mufwanyine kwamba ne bukolè bufuki bwà bukolè bônsò bwà Nzambì abu, mumanye ne Yéyè mmucilaye, ne mMucyàmbe mu Dîyì Dyèndè, cìdì cifuka bukolè kampànda bùdì bupàtuka kwaka ne bufikisha bintu ku dyenzeka, bintu bìtù kabiyiku abi, bùdì bubìvwija, bu ne bìdiku,

bwalu bààbukolè bônsò bàbìdì mbatwilangane. S'ki Yéyè awu mwimane! Kaa, Yéyè kí mmulenga wa dikema anyi!

²⁵³ Twänjì tumònààyibi tünd ní tudi ne bikwàbò bintu bîmpè. Mvensa wa 18, mpindyewu mvensa wa 19. Yone's; Cyakenze ka ncinyi pààkamònaye mmwenekelu Wendè? Cipeta civwa cinyi? Wàkapona ku makàsà Èndè; kàvwaku kàbìdì mwà kwimana kuulu to, mwoyi wèndè wa buntu awu wakuuminyina, kavwaku ànu mwà kwimana to. Yéyè ûvwa Mucimunyi, Ükaavwa mumane kucìmuna.

²⁵⁴ Mpindyewu Yéyè ùdi ùtùma dìyì, ne pashiìshe tudi tubanga kujikija nshapità, mvensa wa 19 ewu:

Funda bintu byûdì mumòne, ne bintu bìdiku, ne bintu bììkalaku pashiìshe;

²⁵⁵ Tudi twangata mvensa wa 20:

Bwalu busokoka bwà mìtootò mwandamutekète iwämònu mu cyanza cyà dyàbalàme ayi, . . . mbitèèkedi byà myéndù byà ngôlò mwandamutekète. Mìtootò mwandamutekète ayi yìdi banjèlo mwandamutekète bàà èkèleeziyà mwandamutekete: ne bitèèkedi byà myéndù mwandamutekete biwämònu abi ng'èkèleeziyà mwandamutekète.

²⁵⁶ Kaa! Ncyà cifwanyine kwimanyika mweyelu's, mulunda wanyi. KuMumònà mwimane mwaba awu mu butumbuke . . . butumbuke bwà Bunzambì Bwèndè's. Yéyè n'Nzuji, Mwakwidi, Mfùmù, Mukanku, Mwânà wa mùkòòkò, Ntambwe, Alpha, Omega, Taatù, Mwânà, Nyumà Mwîmpè; Ewu wàkadiku, udiku, ne wâlwa awu. Mudyatakaje cikaminyi cyà mvinyo wa ciji cikolè cyà Nzambì, ne musankishe mu bintu byônsò, mu mùshindù wà ne Nzambì (Kwamba ku nkùruse,), pààkajuukulukaYe (KwambaYe ne: "Kwajiki."), musankishe Nzambì *bikolè*, mu mùshindù wà ne Nyumà wàkapatuka mu Yéyè awu wàkaalukila mu dìndà dyà Paasàkà ne kuMujuulaye ne kuMubììshaye cyákàbìdì bwà dibingishiibwa dyètù.

²⁵⁷ Ki Yone kubandishaye mésù e kuMumònà mwimane mwaba awu ne makàsà à cyamu cyà kabanda, mésù bu ndimi yà kapyà atwa eku ne kwaka pa buloba bujima. Danyèlè wàkaMumònà bidimu nkàmà mwandamutekète kumpàlà kwà cyòcì aci, mu mwaba wùmwèwùmwè awu, mùshindù wùmwèwùmwè awu, muntu umweumwe awu mwimane mwaba awu, Mukulumpile matùkù, ne kampànda wa mufwànàngane ne Mwânà wa muntu wàkàdisanga Nendè pàmwè, ne bààkaMoomekela cilumbulwidi cyônsò, mwimane ku Cilumbulwidi cyà Nkwasa Mutòòke.

²⁵⁸ Pa kumònà bintu ebi, bìvwa bìkèngela bwà twêtù kwikala bantu bàà mùshindù kaayi, balunda bàànyì? Nzambì ànùbènèshe ki dyànyì disambila. Nwamònà anyi? Nudi baMunange anyi? Nudi nuMwitabuuja anyi? Nudi beeble lwongò lwà musùùkà wènù munda Mwèndè anyi?

²⁵⁹ Twìnyikààyaaku mitù yètù bwà katancì kakesè cyanàànà.

²⁶⁰ Ànu bitekètebitekète ne bitùùlùbitùulu, patwìkala mwà kwimba bitekètebitekète ne, *Ndi Mwele Lwongo Lwà Musùùkà Wànyì Mu Mwaba Mutualale Wà Diikisha*, “Ncyàdyàkuumvwaku bisàbàsaba bìdi bikungula abi bwà kuya ne musùùkà wànyì kule to, kàdi Cyôcì necítwadile musùùkà wànyì ditalala dyà kalolo’s.” Bitekètebitekète mpindyewu, ne kaneemu kônsò, muntu ne muntu.

Ndi mwele lwongo lwà musùùkà wànyì mu
mwaba mutualale wà diikisha,
Ncyàkwendelakù kàbìdì ne màzuwà pa mbû
mutombòke awu to;
Cipeepà cikolè cidi mwà kujuuka ne cikisu,
cipèèpele cikolè cyà ndondo,
Mu Yesù mêmè ndi mu dikùbiibwa bwà
kashidi.

Ndi mwele lwongo lwà musùùkà wànyì mu
mwaba mutualale wà diikisha,
Ncyàkwendelakù kàbìdì ne màzuwà pa mbû
mutombòke ewu to;
Cipeepà cikolè cìdi mwà kujuuka ne cikisu,
cipèèpele cikolè cyà ndondo,
Mu Yesù mêmè ndi mu dikùbiibwa bwà
kashidi.

Nkenkèshìlèku, (lekelaku Nsèsà yà Butùmbi
ayi, Mukalenge,) Mukalenge, nkenkèshìlèku,
Enzàku bwà Bukènkè bwà ku Kaleyì
bùnkenkèshìlèku;
Kaa, nkenkèshìlèku, Mukalenge,
nkenkèshìlèku,

Tubandishààyi byanza byètù kudiYe.

Bukènkè bwà ku Kaleyì bùnkenkèshìlèku.

Kwikala bu Yesù, (Èyowà’s, Mukalenge.)
kwikalà bu Yesù,
Pa buloba ndi njinga bwà kwikalà bu Yêyè;
Mu lwendo lwônsò lwà mwoyi wànyì pa buloba
too ne ku Butùmbi,
Ndi ndòmba ànu bwà kwikalà bu Yêyè.

. . . Éyì Musùngidi wa ukemesha,
Pa buloba ndi njinga bwà kwikalà bu Yêyè;
Mu lwendo lwônsò lwà mwoyi wànyì pa buloba
too ne ku Butùmbi,

²⁶¹ Nudiku baswe kwikalà ne Mwoyi Wèndè awu munda mwènù,
mwikalè uleeja Bwikadi Bwèndè anyi? Bu nwènù mwà kuswa,
ne kanùyi banji kuwùpeta to, nudiku mwà kujuukila kuulu

bwà disambila anyi? aba bádi bàswè bwà kubàvulukabò mu disambila. Nzambi ànùbènèshè.

Mu cidiilu cyà Betèlèhèma . . .

Shààlaayi ànu biimane mpindyewu, ànu biimane's.

. . . kupatukamu Mwenyi, (Newikale mwenyi
kùdì báà pa buloba.)

Pa buloba ndi njinga bwà kwikala bu Yéyè;
Mu lwendu lwônsò lwà mwoyi wànyì pa buloba
too ne ku Butùmbi,
Ndi ndòmba ànu bwà kwikala bu Yéyè.

Ànu kwikala bu Yesù, kwikala bu Yesù, (Ke
dyànyì dijinga ndyôdî adi.)

Pa buloba ndi njinga ànu kwikala bu Yéyè;
Mu lwendu lwônsò lwà mwoyi wànyì pa buloba
too ne ku Butùmbi,
Ndi ndòmba ànu bwà kwikala bu Yéyè.

. . . wa mmwenekelu mupwekele, wa
didipwekesha ne wa mmwenekelu
mupwekele.

²⁶² Mpindyewu, Taatù wa mu Dyulu, bantu báàbûngì bádi
bàswè kuKupeta mbôbò aba biimanyine kuulu. Mbacyòke
ne dipambuka, kabàyi bamanye kuyaayabo to, bapulumuna
kùdì nkawaka wa mwoyi; ne bamanye ne pàmwâpa kumpàla
kwà kucyabu mwoyi newikalè mulekele dituuta, díbà adi
císàbàsaba cinène, bibila, kumpàla kwabo aku, kwà musùkà
mupambuke. Bâvwa ànu mùdìbò bôbò biine, bâvwa bu mùdì
báà pa buloba, kàdi mbaswè kwikala bu Wéwè mpindyewu,
Mukalenge. Bákidileku mu Bukalenge Bwèbè, mbéebè Wéwè,
Taatù, bwalu Wéwè udi mumanye myoyi yàbo ne meeji à mu
myoyi yàbò. Ne Wéwè udi mucifünde nènku, ne mucyâmbè
ne mishiku Yébè wéwè mwine ne: "Ewu udi umvwâ Méyì
Àànyì, ne witabuuja Ewu wâkantùma Mémè, ùdi ne Mwoyi wà
Cyendèlèlè." Mukalenge, Wàkamba kàbìdì, ne: "Wa disânsa
ng'ewu udi ubala ne ewu udi uteeleja mèyì à cipròfetà cyà
Mukàndà ewu, bwalu cikondo cikaadi pabwîpì." Bâàkafika ku
dyumvwa ne cikondo cikaadi pabwîpì. Kabèèna kàbìdì mwà
kutungunuka ne kupambuka to, Mukalenge. Pwekesha nshinga
wa disùngila, ubabweja Wéwè nkààyebè, Mukalenge. Swâku
bwà kupatukabo kubangila ànu dilòòlò edi, biikale baleeja
Bukènkè bwà Yesù Kilistò. Ndi mbalambula kûdì Wéwè, Taatù
Nzambi, mu Dínà dyà Yesù Kilistò. Swâku bwà balondeku
Mukalenge ne didipwekesha dyônsò mu dibatiiza mwab'ewu mu
èkèleeziyà emu; bambike Nyumà Mwîmpè mu nsòmbelu wabo
bwà bâàmòna mwà kwikala bu Yesù matùkù abo ônsò à mwoyi.
Tudi tulòmba nùnku mu Dínà Dyèndè.

Ànu kwikala bu Yesù, kwikala bu . . .

²⁶³ Bâmwè bàà ku nwénù bônsò bàdì biimane pabwîpì anyì basòmbe pabwîpì ne bantu abu, bàdì biikale beena Kilistò, ololaayi cyanza nukwateku cyanza cyàbò nubalabule ku cyanza. Nubatentèkele cyanza ne: “Nzambì àtumbe bwà musùùkà wèbè.” Byoshedi byètù mbyule byônsò mwab’ewu ne bânà ne bikwabo, katwakukùmbana bwà kubatwala kuneeku to.

. . . mu lwendu lwà mwoyi wànyì pa buloba too
ne ku Butùmbi,
Ndi ndòmba ànu bwà kwikala bu Yéyè.
Nkenkèshìlèku, kaa, nkenkèshileku,
Kaa, Bukénkè bwà ku Kaleyì,
bunkenkèshìlèku;
Kaa, nkenkèshìlèku, Mukalenge,
nkenkèshìlèku,
Bukénkè bwà ku Kaleyì, nkenkèshìlèku.

²⁶⁴ Nudi badyúmvwè bilenga byà menemene anyi? Kanwenaayiku nudiyumvwa bímpe anyi? Kwenaku ne disànkà dyà ne udi mwena Kilistò anyi? Labulanganaayi ku byanza ne muntu udi musòmbe pabwîpì neebè mpindyewu awu, patùdì twimba musambu wà kasàlà apa, “Netwèndele mu bukénkè, Bukénkè bulenga ebu,” Bukénkè bwà Mukalenge Yesù Kilistò munkaci mwà kumwèneshiibwa mu mubidi.

Netwèndelè mu Bukénkè, Bukénkè bulenga be,
Bùlwa mwaba wùdì mamata à lumuma à luse
àbàlakana;
Kenkèshàku mu nyùngulukilu wetù mwônsò
muunyà ne butùku,
Yesù, Bukénkè bwà bàà pa buloba.

Wímbààyi, bantu bônsò!

Netwèndele mu Bukénkè ebu, m’Bukénkè
bulenga be,
Bùlwa mwaba wùdì mamata à lumuma à luse
àbàlakana;
Kenkèshàku mu nyùngulukilu wetù mwônsò
muunyà ne butùku,
Yesù, Bukénkè bwà bàà pa buloba.

Lwâyi, nwénù bansantu bônsò bàà Bukénkè
kobolààyi,
Yesù, Bukénkè bwà bàà pa buloba;
Dîbà adi ngonga yà mu Dyulu neyìdilè,
Kaa, Yesù, Bukénkè bwà bàà pa buloba.

Elaayi byanza byènù muulu mpindyewu.

Netwèndelè mu Bukénkè ebu, Bukénkè
bulenga be,
Bùlwa mwaba wùdì mamata à lumuma à luse
àbàlakana;

Kenkèshàku mu nyùngulukilu wetù mwônsò
muunyà ne butùku,
Yesù, Bukénkè bwà bàà pa buloba.

Netùtùngunukè ne kwenda mu Bukénkè ebu,
M'Bukénkè bulenga bwà kacya's,
Bùdi bùlwa mwaba wùdì mamata à lumuma à
luse akenkeshà;

Bùkenkeshè mu nyungulukilu wetù mwônsò
muunyà ne butùku,
Yesù, Yéyé's ki Bukénkè bwà bàà pa buloba.

Netwèndele mu Bukénkè ebu, (Bukénkè bwà
Èvànjeeliyò) Bukénkè bulenga be,
Bùlwa mwaba wùdì mamata à lumuma à luse
àbàlakana;

Kenkèshàku mu nyùngulukilu wetù mwônsò
muunyà ne butùku,
Yesù, Bukénkè bwà bàà pa buloba.

²⁶⁵ Kale ku cibangidilu, ku Mpenta pààkapona Nyumà Mwîmpè pa Èkèleziyà. Mukenji kupwekelawu mu Seemunà; ke Irénée kwimanaye, munsantu munène wa Nzambì awu, wàkula mu myakulu, bukolè bwà Nzambì, bubììsha bafwè, bwondopa babèèdù, ùvwa wendela mu Bukénkè. Paanyimà pèndè kulwaku Colomban, munsantu munène wa bukolè wa Nzambì. Bâàbûngì bàà ku bansantu banène bambule Mukenji benda bapweka, benda mu Bukénkè, Bukénkè bwà Èvànjeelìyò, Bukénkè bùmwèbùmwè bwàkakenkeshà mu Ditùkù dyà Mpenta abu; Kilistò mwimane munkaci mwà cisàmbà Cyèndè, ne biteèekedi byà myêndù byà ngôlò mwandamutekète abi bileeja nsèsà Yèndè ànu mutù díbà mu nkankalà amu's.

²⁶⁶ S'ki twêtù aba mu cidimu cyà 1961:

Tudi twendela mu Bukénkè ebu, M'Bukénkè
bulenga bwà kacya's,
Bùdi bùlwa mwaba wùdì mamata à lumuma à
luse àbàlakana;
Kaa, bùkenkeshè mu nyungulukilu wetù
mwônsò muunyà ne butùku,
Éyì Yesù, Bukénkè bwà bàà pa buloba.

Tujuukilààyì kuulu.

Tudi batungunuke ne kwendela mu Bukénkè
ebu, M'Bukénkè bulenga bwà kacya's,
Bùdi bùlwa mwaba wùdì mamata à lumuma à
luse àbàlakana;
Kenkèshàku mu nyùngulukilu wetù mwônsò
muunyà ne butùku,
Yesù, Bukénkè bwà bàà pa buloba.

Nudi baMunangè anyì?

Ndi muMunange, ndi muMunange,
 Bwalu (ànu bwalu) Yêyè wakannanga
 kumpàla,
 Ne wakampetela lupàndu
 Pa mucì wâ Kàlvariò.

²⁶⁷ Ncìyikù kàbìdì mwà kukùdimukila ku maalu à pa buloba to. Ndi mufwe ku maalu à pa buloba ne maalu à pa buloba mmafwoba bwànyì mêmè. Mêmè ndi ànu ngendela mu Kilistò, mulombola kùdi Nyumà Mwímpè. Ndi muMunange bwalu Yêyè mmunangè, ne ùkenkeshila mabènesha Èndè pambidi pànyi, undabula ne cyanza cyà dyàbalùme cyà bwobùmwè umbweja mu Bukalenge Bwèndè. Mpindyewu tudi bânà bàà balùme ne bàà bakàjì bàà Nzambì, kàdi citwikalà ku ndekeelu kî ncyanji kumweneka to; kàdi tudi bamanye ne netwikale ne mubidi mufwanangane ne mubidi Wèndè Yêyè wà butùmbi awu, bwalu netùMumone ànu mùdìYe amu.

Pashiìshe netwèndelè mu Bukénkè, Bukénkè
 bulenga be,
 Büdì bùlwa mwaba wùdì mamata à lumuma à
 luse àbàlakana;
 Kenkeshàku mu nyùngulukilu wetù mwônsò
 muunyà ne butùku,
 Yesù, Bukénkè bwà bàà pa buloba.

²⁶⁸ Nudi baMunange anyi? Nudi bamanye's, paanyimà pàà diyiisha dyà dítapa ne bikwabo byónsò, ntu muswe kuumvwa bantu bàditwa mu misambu yà tusàlà ne batukina mu dikuukwila ne dimba mu Nyumà. Kakwena cintu nànscha cimwè citambe bwímpè kupita ngimbilù wà kale to. Ncyà bushuwà. Mêmè ntu munange ngimbilu wa cyena mpenta mwímpè wa cyena kale awu; kî mméyì matwisha ngwéngwéngwe ádibo balaminyina myeyelu mu mùshindù wà beela mikunda kwísù kwônsò kushààla bleu, kàdi kabàyi bamanye cidibo bimba aci ne ncinyi to. Ntu munange muntu udi pàmwápa kàyi mwà kwakaja cyonà cyà díyì to kàdi nànscha nànku mwikale ne Dibènesha dyà Mpenta, mpindyewu mwikale wimba cyôci aci. Kaa, mùshindù—mùshindù mwine ùdi misambu yà miyenga yà ku nkùruse ayi yà butùmbi's wè! Kaa, ekèlekèle!

Musambu wètù wa ditangalajangana naawu awu mpindyewu's:

Angata Dînà dyà Yesù wéndè naadì,
 Wêwè mwânà wa tunyinganyinga ne dikènga;
 Nedikupè disànkà ne busàmbi,
 Nda naaDi kwônsò kûyaayà.

Mààlaba dilòòlò pa díbà mwandamutekète, pa díbà mwandamutekète jaajaaja, masangisha neàbange.

Twinamina mu Dînà dyà Yesù,
 Tupòna mikookwela ku makàsà Èndè,
 Mfùmù wa bamfùmù mu Dyulu netùMwasè
 cifulu cyà butùmbi,
 Pààjika lwendu lwètù.

Twimbààyi bônsò mpindyewu.

Angata Dînà dyà Yesù wéndè naadi,
 Wéwè mwânà wa tunyinganyinga ne dikènga;
 Nedìkupè disànkà ne busàmbi,
 Kaa, ndà naaDì kwônsò kûyaayà.

Dînà dyà mushinga, Éyì dyà bupolè be!
 Ditèkemena dyà buloba ne disànkà dyà Dyulu;
 Dînà dyà mushinga, Éyì dyà bupolè be! (Dyà
 bupolè be!)

Ditèkemena dyà buloba ne disànkà dyà Dyulu.

²⁶⁹ Mpindyewu, tudi bacijikije dilòòlò edi. Kùdì . . . wàkankonka ànu mpindyewu ne: “Ní twikala mwà kwenza masangisha mu dindà?” To, kî mmààlabà to, ikishaayi bímpe mààlabà. Pàmwàpa mààlabà dilòòlò, ncyàkukùmbana mwà kujikija diyiisha adi to, pa nànku nêndyangâtè ditùkù dìdì dilondà. Dibà dyônsò dîndì mpangila kujikija . . . diyiisha edi dijima, ndi nya naadi too ne mu ditùkù dìdì dilondà adi. Kàdi twàjikiji edi, ngeela meeji ne nukààdi badilongolole bwà Bikondo Byà Èkèleeziyà. Ki mmwômò anyi?

Èyo, twinyikààyi mitù yètù patùdì twimba bitekètebitekète mpindyewu apa:

Twinamina mu Dînà dyà Yesù, (Ludimi lwônsò
 nelùDìjikule.)

Tupòna mikookwela ku makàsà Èndè,
 Mfùmu wa bamfùmù mu Dyulu netùMwasè
 cifulu cyà butùmbi,
 Pààjika lwendu lwètù

Dînà dyà mushinga, Éyì dyà bupolè be!
 Ditèkemena dyà buloba ne disànkà dyà Dyulu;
 Dînà dyà mushinga, Éyì dyà bupolè be! (Dyà
 bupolè be!)

Ditèkemena dyà buloba ne disànkà dyà
 Dyulu.



CIKÈÈNÀ-KUMÒNA CYÀ PAATÈMÒ LUA60-1204E
(The Patmos Vision)

DILONDANGANA DYÀ MALONGESHA PA DIBULUDIIBWA DYÀ YESÙ KILISTÒ

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyàlumingu dilòòlò, matùkù 4 à ngondo wa ciswà-munène, cidimu cyà 1960, mu Branham Tabernacle mu Jeffersonville, mu Indiana, U.S.A. Ndyumusha pa mukaba wa mèyì ne dituuta ku cyamu mu kaabujima kààdì mu Anglais. Nkudimwinu wa mu Ciluba ewu mmutuuta ku cyamu ne mwabanya kùdì Voice Of God Recordings.

CILUBA

©2024 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Dîyì dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lüntândalà, kulamiibwa mu cikàlwîlà, kukudimunyibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyì wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org